

॥ श्री राधासर्वेश्वरो विजयते ॥



॥ श्री भगवद्भवाकी चार्याय नमः ॥

शोधपूर्ण धार्मिक मासिक पत्र 'श्रीसर्वेश्वर' का विशेषाङ्क

ब्रजविहार - अंक (श्री नारायणस्वामीजी की वाणी)



सखियों से संसंवित नित्यनिकुञ्जविहारी श्रीश्यामाश्याम

सम्पादक :

जयकिशोरशरण

प्रकाशक :

श्री 'श्रीजी' की बड़ी कुञ्ज
रैतिया बाजार, श्रीधाम वृन्दावन (मथुरा)

व्यवस्थापक :

गोवर्धनशरण

॥ श्रीराधासर्वेश्वरो जयति ॥



• श्रीभगवन्निम्बार्काचार्याय नमः •

शोधपूर्णं धार्मिक मासिक पत्र 'श्रीसर्वेश्वर' का विशेषाङ्क—

ब्रजविहार-अंक

(श्रीनारायणरुवामीजी की वाणी)



सम्पादक :

जयकिशोरशरण

प्रकाशक :

श्री 'श्रीजी' की बड़ी कुञ्ज

रेतिया बाजार, भीवृन्दावन

प्रेरक :

अनन्तश्री विभूषित जगद्गुरु निम्बार्काचार्यपीठाधीश्वर
श्रीराधासर्वेश्वरशरणदेवाचार्य श्री 'श्रीजी' महाराज
म. भा. श्रीनिम्बार्काचार्यपीठ, निम्बार्कतीर्थ-सलेमाबाद (राज०)

❀

प्रकाशक :

गोबर्धनशरण

प्रबन्धक श्री 'श्रीजी' की बड़ी कुञ्ज
रेतिया बाजार, वृन्दावन (मथुरा)

❀

प्रकाशन तिथि :

श्रीनिम्बार्क जयन्ती, वि. सं. २०७१

७ नवम्बर, २०१४

❀

द्वितीय संस्करण :

१००० प्रतियां

❀

न्योछावर :

७५ रुपया मात्र

❀

पुस्तक प्राप्तिस्थान :

श्री 'श्रीजी' की बड़ी कुञ्ज
रेतिया बाजार, वृन्दावन

❀

मुद्रक :

श्रीराम बेरीवाला

श्रीसर्वेश्वर प्रेस

श्री 'श्रीजी' की बड़ी कुञ्ज
रेतिया बाजार, श्रीग्राम वृन्दावन

सुखकीप

धनि वृन्दावन धाम है, धनि वृन्दावन नाम ।
धनि वृन्दावन रसिकजन, सुमिरे राधेश्याम ॥

(श्रीनारायणस्वामी)

आकाश में पक्षी स्वच्छंद विचरण जब तक करता है, तब तक कि वह बाज के ससर्ग से दूर है। ऐसे ही यह मानवरूपी पक्षी जगत् में जब तक भ्रमण करता रहेगा, तब तक कि वह प्रेमरूपी बाज के वशीभूत न हो जाय। श्रीसर्वेश्वर प्रभु के प्रेम-पाश में आबद्ध होते ही प्राणी के सकल भ्रम-भ्रमण त्वरित समाप्त हो जाते हैं। श्रीहरि-सत्गुरु कृपा से जिस महाभागी को प्रेम-रस-महोदधि श्रीवज-वृन्दावन धाम एवं धामी श्रीश्यामाश्याम के दिव्य प्रेम-रस का स्वल्प-सा भी आस्वादन हो गया, उसी क्षण वह कृत-कृत्य हो जाता है। उसका अहं भाव समाप्त हो जाता है और वह प्राणी श्रीप्रियालाल का परम प्रेमी बन जाता है। ऐसे ही श्रीराधाकृष्ण के परम प्रेम-रसप्रवाह में प्रवाहित होने वाले रसिक अनन्य श्रीनारायणस्वामीजी थे। आपने योग-ध्यान, नाम-रूप मिथ्या, निर्गुण-निराकार, ज्योति तथा अपने से अभिन्न ब्रह्म-तत्त्व का पूर्ण ज्ञान-अनुभव प्राप्त किया। श्रीराधाकृष्ण की कृपा से आप रावर्लपिंडी से श्रीवृन्दावन धाम पधारे और श्रीगुगल के प्रेमरस-रूपमाधुर्य में ऐसे निमग्न हुए कि आपका पूर्वानुभव-ब्रह्मज्ञान सब कुछ श्रीप्रियालाल के प्रेमप्रवाह में प्रवाहित हो गया। श्यामघन-स्वरूप श्रीकृष्ण के दर्शनानन्द से आपका मन-मयूर मत्त होकर नृत्य करने लगा और प्रेमरस से परिपूरित आपकी मधुर वाणी निजानुभूति को अमिव्यक्त करने के लिये मुखरित हो उठी—

चाहे योग करि झकुटी के मध्य ध्यान धरि,
चाहे नाम रूप मिथ्या जानिके निहारलं ।
निर्गुण निर्भय निराकार ज्योति व्याप रह्यौ,
ऐसो तत्वज्ञान निज मनमें तू धारलं ॥

(चार)

‘नारायण’ अपने को आपही बखान करि,
मोते वह भिन्न नहीं याविधि पुकारलै ।
जौलौं तोहि नन्दको कुमार नहीं दृष्टि परै,
तौलौं तू भले बैठि ब्रह्म को विचारलै ॥

(श्रीनारायणस्वामी, ति. ११)

वि० सं० १९१६ में आपने गृह का परित्याग कर ३२-३३ वर्ष की अवस्था में आप श्रीवृन्दावन धाम आ गये । श्रीगुगल-प्रेम-वाण में बिधे श्रीस्वामीजी यहाँ नित्य श्रीभगवत्-स्वरूपों के दर्शन तथा रात्रि में रासलीला का दर्शनानन्द लेते और अपने निवास स्थान पर लौटकर लीला सम्बन्धी सरस पदों की रचना भी करते । रासमण्डलियों में आपकी बड़ी प्रतिष्ठा थी । रास-मण्डलियों में आपके द्वारा रचित लीलाओं का अनुकरण भी आपके निर्देशन में होने लगा था । एक बार आप श्रीगोवर्द्धन दर्शनार्थ गये, वहाँ कुसुम-सरोवर पर आपको श्रीश्यामा-श्याम का दर्शन प्राप्त हुआ । साक्षात्कार के पश्चात् फिर आप कुसुम-सरोवर पर ही निवास करने लगे । वहीं पर उद्धव-कुण्ड के पास स्थित आपकी समाधी आज भी इस बात का साक्ष्य दे रही है ।

आपकी वाणी प्रेम-भाव से पूरित है । भाषा और भावों की दुरुहता का कहीं भी लेशाभास भी नहीं है । सामान्य हिन्दी का ज्ञान रखने वाले पाठक भी इसका सुख अपनी भावना और सहृदयता के अनुसार भली प्रकार ले सकते हैं । व्रज की विशाल और रहस्यपूर्ण वाणी साहित्य में प्रवेश पाने के लिये यह वाणी-ग्रन्थ श्रेष्ठतम माध्यम है ।

वि० सं० २०२७, मार्च १९७१ में श्रीस्वामीजी की वाणी ‘श्रीसर्वेश्वर’ मासिक पत्र के विशेषाङ्क के रूप में प्रकाशित हुई थी । पाठकों के अत्यधिक आग्रह पर इसका पुनर्मुद्रण किया गया है । इसके अनुशीलन से सभी प्रेमी पाठक बन्धु लाभान्वित होंगे । श्री ‘श्रीजी’ की बड़ी कुञ्ज द्वारा प्रकाशित श्रीनारायणस्वामीजी की वाणी का यह द्वितीय संस्करण श्रीराधाकृष्ण-चरणानुरागी रक्तिक प्रेमीभक्तों के आस्वादन हेतु सादर समर्पित है ।

सम्पादक : ‘श्रीसर्वेश्वर’ मासिक पत्र
‘श्रीजी’ की बड़ी कुञ्ज, वृन्दावन

श्रीगुगलचरणरजाकांक्षी
जयकिशोरशरण

भूमिका

अखिलेश्वर्य-माधुर्य-सौन्दर्य-रसामृत-सिन्धु श्रीश्यामाश्याम के अनन्य रसिक श्रीनारायणस्वामी कृत 'व्रजविहार' भगवद्भक्तों के लिये विशेष उपयोगी और निरन्तर मनन एवं गान करने योग्य वस्तु है। इसके पदों एवं अन्याऽन्य छन्दों में मधुरता, सरसता और भावों की गम्भीरता सभी अनुपम है। जो व्यक्ति इन्हें एक बार पढ़ लेता है उसका चित्त फिर इनमें से इधर उधर नहीं जाना चाहता। भगवान की कई—एक ऐसी अद्भुत लीलायें आपने लिखी हैं जो स्वयं की अनुभूति ही कही जा सकती है। उनका उल्लेख आपसे पहले किसी ने नहीं किया है, न किसी आर्ष ग्रन्थ में उनका उल्लेख मिल रहा है।

व्रजविहार में लीलापुरषोत्तम भगवान श्रीनन्दनन्दन की लीलाओं का चित्रण है। अनुराग रस में आपके सर्वजनोपयोगी उपदेश हैं।

प्रकाशन :—व्रजविहार का प्रकाशन कई बार हो चुका है। सर्वप्रथम श्रीनारायणस्वामी की विद्यमानता में वि. सं. १९४० में धीमणेशीलाल साहूकार लोहागढ़वाले ने छपवा कर अमूल्य वितरण किया था।

उस संस्करण की समालोचना भारतन्दु के सम्पादक गोस्वामी श्रीराधाचरणजी ने इस प्रकार की थी—

“व्रजविहार” परमहंस परिव्राजकाचार्य श्रील श्रीयुक्त महानुभाव श्रीनारायणस्वामीजी की वाणी है। स्वामीजी महाराज इस समय वृन्दावन में महात्माओं की श्रेणी में अग्रगण्य हैं। आपने जो कुछ समय-२ पर लीलारस अनुभव किया है वही पदों द्वारा रसिक भक्तोंकी तृप्तिके लिये पुस्तक-पयोद के द्वारा बरसाया है। यह पद कुछ हमारी प्रशंसा के आश्रित नहीं, इनमें कुछ ऐसा चमत्कार है कि सैकड़ों पुस्तक लिखकर और हजारों पुस्तक छपकर भारतवर्ष के इस छोर से उस छोर तक प्रसिद्ध हुईं पर प्रेमीजनों की तृष्णा उत्तरोत्तर बढ़ती ही जाती है। इससे अधिक रासधारियों की मंडलियों में तो इनका राज्य है। जब तक आपके पद नहीं गाये जात दर्शनीक चित्र-लिखित ही नहीं होते, फिर आपके पदों का भाव विलक्षण, राग सद्योमतोहर और अक्षर तो जादू का वाण है। कैंता ही कुटिक कल्मषी क्यों न हो एक बार तो मोहित हो ही जाता है। इसी से आज स्वामीजी

की वाणी प्राणीमात्र को धारी लगती है। इसी बाण के बेधे अनेक अनुरागी घर-बार छोड़कर ब्रजमण्डल में फिरते हैं। अब आपकी सरल रचना पर हमें कुछ कहने की आवश्यकता नहीं। आपने पञ्जाबी होकर भी ब्रजभाषा की जो उपासना की है वह सराहनीय और स्तुत्य है।

(यह अंश पं० नन्दलालजी की सहायता से ब्रजमाधुरी सार से उद्धृत करके वि० सं० १९६५ में श्रीवैकटेश्वर प्रेस बम्बई से प्रकाशित छठे संस्करण के आरम्भ में प्रकाशित किया गया था)

उसी में श्रीनारायणस्वामीजी की जीवनी के सम्बन्ध में लिखा गया है—श्रीनारायणस्वामीजी का जन्म लगभग संवत् वैक्रमीय १८८५ रावल-पिण्डी (पंजाब) जिले में हुआ, यह सारस्वत ब्राह्मण थे। स० १९६६ के लगभग श्रीवृन्दावन में आकर आपने श्रीलालाबाबू के मन्दिर में बपतर की नौकरी करली, दिन में नौकरी बजाते और रात्रिके समय में रास-विलास देखते तथा सत्सङ्ग में लगे रहते। उस समय गृहस्थ आश्रम में थे, परन्तु साथ में स्त्री पुत्र नहीं रखते थे। सबसे पहले आपने गजलों की एक पुस्तक छपाई थी। रेखता और पद भी जब कभी रच लिया करते थे। महारानी टिकारी के मन्दिर में जो मण्डली रास करती थी उसके द्वारा ये अपने पदों का अभिनय कराते थे। प्रेम रङ्ग कुछ ऐसा बढ़ गया कि आपने नौकरी छोड़कर संन्यास ग्रहण कर लिया, इधर आपके पदों की ओर रसिक प्रेमियों का प्रेम दिन दिन बढ़ने लगा। स्वामीजी नीरस अद्वैतवासी संन्यासी नहीं थे, आपने दण्ड आदि भी कभी धारण नहीं किया। आप केशीघाट पर छपाटिया के घरे में यमुना घट पर छत्री में निवास करते थे। स्वभाव बड़ा सरल और वयालु था। परोपकार पर सर्वदृष्टि रखते थे, हृदय में यह भाव सदा जागता रहता था कि किसी तरह से जीव लालजी की ओर लगे, जिससे उसका कल्याण हो। आपकी वाणी बड़ी मधुर थी, जिससे जो उनके पास पहुँचता वह प्रभावित हो जाता था। पदों के लालित्य का वर्णन गोस्वामी श्रीराधाचरणजी ने अपने नव भक्तमाल में इस प्रकार किया है।

छप्पय—अक्षर अर्थ अनूप अलंकारन तु अलंकृत ।

भाव हृदय गम्भीर अनुप्रासन गुन गुम्फित ॥

राग नवीन नवीन प्रवीनन को मन मोहै ।
 नृत्य करत गति भरत रासमण्डल अति सोहै ॥
 देश विदेश प्रचार श्री वृन्दावन विश्राम ।
 श्रीनारायणस्वामी नवल (पद) रचना ललित ललाम ॥

आप यही उपदेश देते थे कि—चाहे जिस स्थितिमें रहो, खूब हरिनाम जपते रहो । गुरुदेव की महिमा सुनाते जुगल सरकार के प्रेम में सदा मग्न रहते, आंसुओं का तार बंध जाता, घण्टों तक प्रेमानन्द समुद्र में निमग्न हो जाते थे । आप कभी धातु स्पर्श नहीं करते थे, कामिनी-कंचन से बहुत बचा करते थे । वृन्दावन से बाहर कहीं नहीं जाते थे । वर्षा में भतरोड की ओर और गर्मियों में यमुना पार शौच जाते थे ।

वि. सम्बत् १६५५ में आपने गोवर्धन की यात्रा की, बड़ी प्रसन्नता हुई । वहाँ कुछ दिन निवास किया । एक दिन कुसुम सरोवर पर उनको प्रिया-प्रियातम के दर्शन हुए । आप उनके पीछे-पीछे दौड़े, किन्तु हाथ नहीं आये । हारकर इमली के नीचे बैठ गये । तब से कुसुम-सरोवर के पास उदब-कुण्ड पर एक चौबारे में रहने लगे, और उसी स्थान पर वि. स. १६५७ की फाल्गुन कृष्णा ११ को भौतिक शरीर को त्याग करके आप प्रिया-प्रियातम की सन्निधि में जा पहुँचे । आपके सेवक ठाकुर महाचन्द्रजी ने उसी स्थान के पास आपकी समाधी (छत्री) बनवा दी है ।

इस प्रकार की जीवनी सम्भवतः ब्रजमाधुरी सार के आधार पर लिखी गई है । ब्रजमाधुरी सार के लेखक बाहर रहनेवाले महानुभाव हैं, जैसा उनको पता चला वैसा ही अङ्कित कर दिया । श्रीनारायणस्वामी के जन्म सम्बत् और वृन्दावन आगमन के सम्बन्ध में जो लगभग शब्द का प्रयोग किया है इससे भी यह धारणा बलवती हो जाती है । सम्भव है इसी कारण से उन्होंने नारायणस्वामी के गुरुदेव, सम्प्रदाय आदि के सम्बन्ध में कुछ भी सर्चा नहीं की है । निम्बार्क-माधुरीकार वृन्दावन का रहने वाला था, अतः उनका अनुसन्धान विशिष्ट महत्वपूर्ण होता चाहिये । निम्बार्क माधुरीकार ने लिखा है कि—श्रीनारायणस्वामी निम्बार्क-सम्प्रदाय के अनुयायी थे, किन्तु यह नहीं लिखा कि उन्होंने निम्बार्क-सम्प्रदाय के कौन से महानुभाव से दीक्षा ली थी ।

कुछ सज्जन श्रीनिम्बार्क-माधुरीकार की बातों में इसलिये सन्देह कर बैठते हैं कि वे श्रीनिम्बार्क-सम्प्रदाय के अनुयायी थे। अतः उन्होंने स्वसम्प्रदाय की अभिवृद्धि के लिये नारायणस्वामी को निम्बार्कीय लिख डाला होगा। किन्तु उनकी यह भावना ठीक नहीं। कारण.....गोस्वामी यमुनावल्लभजी निम्बार्कीय नहीं थे। उन्होंने स्वरचित भक्तमाल में जिन जिन श्रीनिम्बार्कीय महानुभावों का उल्लेख किया है, उनमें किसी पर भी कोई सज्जन सन्देह नहीं कर सकता, ऐसी स्थिति में श्रीनारायणस्वामी पर भी सन्देह नहीं होना चाहिये। श्रीयमुनावल्लभजी ने जो छप्पय लिखा है वह इस प्रकार है—

निर्गुण तज वृन्दाविपिन, नारायण सेये सगुण ।

श्रीनिम्बार्क कृपालु पाव रज आश्रय लीयो ।

ताके फल में सरस कृष्ण कविता रस पीयो ॥

'ब्रजविहार' हिय हार ग्रन्थ निज रच्यो विचक्षण ।

तामें रस अनुराग भर्यो अत्यन्त बिलक्षण ॥

श्रीरासविहारी की कृपा पायो रस सर्वस वरण !

यद्यपि गोस्वामीजी ने श्रीनारायणस्वामीजी के गुरुदेव के नाम का उल्लेख नहीं किया तथापि बेंकटेश्वर प्रेस बम्बई से प्रकाशित छठे संस्करण के ह्यमु पृष्ठ पर ही 'श्रीयुत महाराज मुकुन्द स्वामीजी के चरणकमल सेवी' ऐसा विशेषण श्रीनारायणस्वामीजी के नाम के पूर्व अंकित है। इससे यह ज्ञात होता है कि उनके गुरुदेव का नाम मुकुन्द स्वामी या मुकुन्ददेव था। आज से ३० वर्ष पूर्व श्रीनारायणस्वामी के एक कृपापात्र शिष्य मास्टर मिट्ठनलालजी जो पहले श्रीगिरधारीजी के मन्दिर में रहा करते थे, बाद में उन्होंने श्रीराधारमण के घरे में कोई मकान किराये पर लेकर निवास किया। यद्यपि उस समय श्रीनारायणस्वामीजी के संबंध में मैं अनुसन्धान नहीं करता था तथापि प्रसङ्गवश उक्त मास्टर साहब ने हमें यह बतलाया था कि हम निम्बार्कीय हैं, हमारे गुरुदेव श्रीनिम्बार्क-सम्प्रदाय में दीक्षित थे, हमें उन्होंने ही महावाणी के अनुशीलन का आदेश दिया था, तदनुसार हम निरन्तर महावाणी का पाठ और मनन करते हैं। पूज्य पं. श्रीअमोलकराम शास्त्रीजी उस समय उनके साथ ही

यहाँ कुञ्ज में पधारे थे, उन्होंने मास्टरजी की प्रशंसा करते हुए कहा देखो, इन्होंने महावाणी के आरम्भक गुरु-परम्परा वन्दना के श्लोकों का कंसा सुन्दर पद्यानुवाद किया है। मैंने भी उनके वे ३६ कवित्त सबैया पढ़े। इससे ज्ञात होता है कि श्रीनारायणस्वामी निश्चित रूपसे श्रीनिम्बार्कीय थे।

हमने लालाबाबू मन्दिर के बपतर का रिकार्ड देखने का भी प्रयत्न किया, किन्तु वर्तमान इंचार्ज पुलिनबाबू से पता चला कि अब जमींदारी समाप्त होने के कारण पुराना रिकार्ड अस्तव्यस्त हो गया है।

श्रीभट्टदेवाचार्यजी से लेकर श्रीशुकसुधी तक बहुत से निम्बार्कीय महानुभावों की जन्मस्थली मथुरापुरी रही है। गौड़ द्विजों के कई घराने अब भी विद्यमान हैं। मण्डी रामदास मथुरा में श्रीराधा-गोपालजी का एक सुन्दर सुप्रतिष्ठित मन्दिर है, उस मन्दिर के दर्शन और उसके अर्चक वयोवृद्ध पंडित श्रीसुधाधरजी से मिलने का सुअवसर इसी वर्ष प्राप्त हुआ। डॉ. श्रीनारायणवल्लभजी शर्मा ने उनसे हमें मिलाया, तब पता चला कि इस घराने में अच्छे-अच्छे विद्वान् हो चुके हैं। लाहौर, अमृतसर, रावल-पिण्डी आदि जिलों में इस मन्दिर के बहुत शिष्य-सेवक हैं। पं० श्रीउदय प्रकाशजी जो स्वामी श्रीदयानन्दजी के सहपाठी थे, वे पञ्जाब जाते थे। उनके दो पुत्र थे, बड़े श्रीनन्दकिशोरजी और छोटे श्रीमुकुन्ददेवजी। ये संस्कृत के विशिष्ट विद्वान् और कवि थे। उन्होंने ४२ सुन्दर श्लोकों में अपनी गुरुपरम्परा लिखी है। जो इसी सन्दर्भ में आगे दी जायेगी। सुधाधरजी की आयु उस समय ८० वर्ष से अधिक थी। उन्हीं श्रीमुकुन्द-देवजी से श्रीनारायण स्वामी ने दीक्षाग्रहण की हो, अनुराग-रस के आरम्भ में उन्होंने सर्वप्रथम—

श्रीगुरु चरण सरोज रज, वन्दौ बारम्बार।

‘नारायण’ भवसिधु हित, जे नवका सुखसार ॥

गुरु-वन्दना करके इष्टदेव की वन्दना इस प्रकार की है :—

श्रीराधा गोपाल पद, कर प्रणाम उर धार।

‘नारायण’ अनुराग रस कहूं बुद्धि अनुसार ॥

मथुरास्थ श्रीमुकुन्ददेवजी के यहाँ जो भगवत्प्रतिमा है—उनका नाम श्रीराधागोपालजी ही है। स्वामीजी ने गुरुदेव का स्पष्ट नामोल्लेख

सम्भव है—धर्म शास्त्रीय नियम के अनुसार न किया हो जंसा कि धर्म-शास्त्र का आदेश है :—

आत्म-नाम गुरोर्नाम नामातिकृपणस्य च ।

श्रेयस्कामो न गृह्णीयात् जेष्ठापत्यकलत्रयोः ॥

यह निश्चित है कि श्रीनारायणस्वामी वास्तव में एक संस्कारी भगवद्भक्त थे । बाल्यकाल से ही उनका भगवान में अनुराग था । श्रीउदयप्रकाशजी मधुरा से प्रतिवर्ष रावलपिण्डी में जाते थे । उनसे सम्पर्क होने पर उन्होंने वृन्दावन वास की अनुमति दी, तदनुसार स्वामीजी यहाँ आये और वृन्दावन वास करने लगे ।

संभव है श्रीउदयप्रकाशजी से नामोपदेश मिला हो, फिर श्रीवृन्दावन आने और स्थायी निवास का विचार होने पर श्रीमुकुन्ददेवजी से वीक्षा ली हो । श्रीमुकुन्ददेवजी का जन्म वि० सं० १६१० कार्तिक शुक्ला १० गुरुवार को हुआ था । श्रीनारायण स्वामी जब वि० १६१६ में वृन्दावन आये तब उनकी आयु ३२ वर्ष के लगभग थी और मुकुन्ददेवजी ६ वर्ष के ही थे । जब १५-२० वर्ष बाद श्रीनारायणस्वामी ने लालाबाबू मन्दिर की नौकरी छोड़कर पृथक् निवास करने का निश्चय किया तब मुकुन्ददेवजी से शरणागति ग्रहण की हो । गुरुदेव की बाल्यावस्था और शिष्य वयोवृद्ध" ऐसे अनेकों उदाहरण मिलते हैं ।

मुकुन्द शब्द का तात्पर्य है—मुक्ति-भुक्ति, ददाति इति मुकुन्दः इस भाव को नारायणस्वामी ने व्रजविहार के आरम्भिक मंगलाचरण रूप पद में व्यक्त किया है :—

बन्दीं श्रीगुरु चरण कमल वर ।

जिनको नाम सकल मंगल निधि ध्यान धरत अघ रहत न पलभर ॥

परम उदार सार निगमागम भक्ति ज्ञान की खान मनोहर ।

'नारायण' भोहि डीन जानि के वास दियो वृन्दावन गहि कर ॥

श्रीनारायणस्वामी के घराना का यही मुकुन्ददेवजी का घराना गुरु-घराना रहा है, अतः उदयप्रकाशजी उन्हें हाथ पकड़ कर वृन्दावन लाये, बाद में श्रीमुकुन्ददेवजी से मन्त्रोपदेश मिला ।

श्रीनारायणस्वामी के पदों को देखने से ज्ञात होता है कि उन पर

श्रीभट्टदेव, श्रीहरिव्यासदेव आदि निम्बाकं-सम्प्रदाय के आचार्यों और उनकी रचनाओं का स्पष्ट प्रभाव है :—युगलशतक महावाणी की मूर्ति पद्यों की ही स्वामीजी ने रचना की है ।

इस प्रकार श्रीनारायणस्वामीजी के सम्प्रदाय और गुरुदेव का जो परिचय प्राप्त होता है, वही युक्तियुक्त और समीचीन प्रतीत होता है । श्रीनारायणस्वामी की गुरुपरम्परा जो श्रीमुकुन्ददेवजी ने उन्हें बनाकर दी थी वह इस प्रकार है :—

श्रीवादिशान्त पदाब्ज रेणवो वेणवो मम ।

केणवो यत्पुरो देवा न देवा मवतुमुद्यता ॥१॥

युगलस्वरूप र्हाचरेण परम्परार्णा तत्त्वं बभाण परमं सनकादिकेभ्यः ।

भक्तस्य तापहननाय विवेचनाश्च हंसं वदन्ति मुनयस्तमहं प्रपद्ये ॥१॥

वशीकृती येन निजप्रभावाद्ब्रह्मेश चन्द्रेन्द्रमुखः प्रपञ्चः ।

कुत्सायने सोऽपि बलेन यस्य मारः कुमारं तमहं नमामि ॥२॥

नारं तमोद्यति हि यस्स्वजनाऽनुकम्पी नारं च ज्ञानमखिलं प्रददाति भूरि ।

नारं प्रपन्नहृदयं प्रददी दयालुस्तं नारदं गुरुवरं शरणं प्रपद्ये ॥३॥

संसाररोग शमने खलु निम्बवधो हाद्वान्धकारहरणेऽकं वदेव यश्च ।

श्रीकृष्णपादपरिचारक तुष्टचेता निम्बार्कदेशिकवरस्तमहं प्रदद्ये ॥४॥

यो ब्रह्मेशमहेन्द्रपूज्यचरणः श्रीश्रीनिवासाभिधः ।

कारुण्यादियशोवतीर्य ह्यवनावालङ्घयत्योयधिम् ॥

वेदार्थश्च निरूप्य भाष्यममृतं चापाययत्स्वाश्रितान् ।

सगतत्याख्यधियं स्ववक्षसि दधत्तं चाश्रये सद्गुरुम् ॥५॥

विश्वं विष्णुमयं चराचरमिदं योपश्यदत्युत्तमो,

विश्वाचार्यगुरुं नमामि तमहं भक्त्यार्द्रचित्तं प्रभुम् ॥६॥

सर्वास्त्रेव पुरीष यः स्वपिति भूमा यत्पुरुषेष्वपि,

मुह्यत्वात्पुरषोत्तमो जगति तं वन्दे गुरुं प्रेमतः ।

विलासितं येन जगत्समग्रं स्वशिक्षया ज्ञानविरागभक्त्या ।

सम्प्रापयामास हरिं स्वकीयास्तं श्रीवलासार्यमहं व्रजामि ॥७॥

स्वरूपमास्थाय हरेर्महात्मा निरूपयामास परात्सतत्त्वम् ।

प्रदर्शयामास स्वकान् स्वरूपं स्वरूपमाख्यं शरणं व्रजामि ॥८॥

मातोधवो येन गुरुपदेशच्छास्त्रादिमानैर्भगवान् रमेशः ।
 आदेशयामास तमेव जन्तूस्तं माधवाचार्यं महं प्रपद्ये ॥६॥
 बलेन भद्रं वितनोति पुंसां भक्त्या कृतार्थी कृतभूतसर्गः ।
 तन्नामधेयं शरणं प्रपद्ये कारुण्यवात्सल्यवयादिसिन्धुम् ॥१०॥
 पद्यायत यो हि निजाभिते जने पद्मागुणं वत्सलतादयादिभिः ।
 आचार्यविज्ञानविरागभक्तिकं पद्याभिधं तं प्रणतोऽस्मि देशिकम् ॥११॥
 श्यामं पश्यति हृत्सरोज इति तं कृष्णं सदा शिक्षयन् ।
 स्वीर्यास्तं कमलाभिलालितपदं सौन्दर्यरत्नाकरम् ।
 ब्रह्मेशेन्द्रमर्हद्विवन्दितपदं वेदान्तवेद्यं उच्यते,
 स्तं श्यामेति समाच्यया हिजिवितं आचार्यमीडे मूढा ॥१२॥
 गोपायिता योहि निजाश्रितानां गवां गणस्यामितक्षोभ (कोप) कर्तुः ॥१३॥
 दीनाऽनुकम्पी भगवान् मुकुन्दो विलोक्य संसारदवाग्निदग्धान् ।
 कृपावशाद्दृशिकरूपधारी कृपाभिधं श्रीगुरुमानतोऽस्मि ॥१४॥
 विनिजिता येन दिशः समग्रा निराकृताः शास्त्रविरुद्धतर्काः ।
 विद्योतयामास रमेशभक्ति श्रीदेवमाचार्यपरं नमस्ये ॥१५॥
 भट्टस्यसौ सुन्दरमत्युदारं रूपं वरेण्यं परमस्य पुंसः ।
 तं सुन्दरं भट्टमदभ्रसहीहृदं (सारं) ब्रजामि नित्यं प्रणतार्तिहारम् ॥१६॥
 पद्मनाभाभिधं भट्टं पद्मनाभगुणान्वितम् ।
 इयार्णवमहं वन्दे ज्ञानचैराभ्यदं गुरुम् ॥१७॥
 उपेन्द्रं विब्रमं भट्टमुपेन्द्राख्यं कृपार्णवम् ।
 समाश्रये महात्मानं मोक्षस्वाराज्यदं नृणाम् ॥१८॥
 रामचन्द्राभिधं भट्टं रामचन्द्रगुणं गुरुम् ।
 समाश्रये सदाभक्त्या (बुद्ध्या) दयापीयूषतोषदम् ॥१९॥
 भट्टं श्रीवामनं वन्दे दयाज्ञानादिसागरम् ।
 वैद्यं संसाररोगस्य बलेशकर्मादि वामनान् ॥२०॥
 श्रीकृष्णं कृष्णकर्माणं भट्टं वन्दे दयार्णवम् ।
 प्रपन्नजनतानन्दं पदं मृत्योर्विमोचकम् ॥२१॥
 पद्या हि ब्रह्मविद्यादया नित्यं यस्य करे स्थिता (शुभा) ।
 तं पद्याकरभट्टाख्यं नतोऽस्मि गुरुमीश्वरम् ॥२२॥

धृत्वात्मतत्त्वं ह्यनुभूय नित्यं, संभावयामास निजप्रपन्नान् ।
 विमोक्षयामास तमोर्गलाद्यस्तमाश्रयं श्रीश्रवणेश भट्टम् ॥२३॥
 भट्टत्यसौ भूरिमहानुभावः, श्रुत्यन्ततत्त्वं विषयं निजेभ्यः ।
 भजाभ्यनन्तस्य पदस्य दाता, यो भूरिभट्टो गुरुमीश्वरं तम् ॥२४॥
 श्रीमाधवं भटति सर्वजगन्निदानं वेदान्तवेद्यचरणं शरणं निजानाम् ।
 यस्तंगुरुं परमतत्त्वप्रदं महान्तं श्रीमाधवञ्च सततं प्रणतोऽस्मि भट्टम् ॥२५॥
 श्यामं हिरण्यपरिधिं सततं भटन्तं, गोविन्दमादिपुरुषं श्रुतिसारगम्यम् ।
 श्यामं हि भट्टमनिशं गुरुमीशमीडे, मोक्षप्रदं स्वदयया चरणानुगामाम् ॥२६॥
 गोप्ता श्रुतीनां परतत्त्ववेत्ता (वक्ता) त्राताऽश्रितानाञ्च भवार्णयाद्यः ।
 गोपालभट्टं तमहं प्रपद्ये विज्ञानवैराग्यदयाविसिन्धुम् ॥२७॥
 वामादिरूपो बलवान् प्रलम्ब-पदाश्रितानां निहतश्च येन [पूर्णम्] ।
 तं देवमीडे बलमद्रभट्टं क्षमादयाज्ञानविरागयुक्तम् ॥२८॥
 गोपीनाथं भटति सततं शास्त्रमानेन यो वः
 श्रीगोविन्दं परमपुरुषं दर्शयामास शिष्यान् ।
 गोपीनाथं परमसुखदं भट्टमीडे विभूतम्,
 प्रेमानन्दं मृदुलहृदयं ब्रह्माविज्ञानभूतिम् ॥२९॥
 श्रीकेशवं व्रजपतिं ब्रह्मिणादिवन्द्यां, कृष्णं भरन्तमनिशं श्रुतिसारगम्यम् ।
 भक्तस्य तापशमनाय निवद्धकक्षं, भट्टञ्च केशवमहं शरणं प्रपद्ये ॥३०॥
 गंगास्पदं चरणपंकजमीश्वरस्य, ब्रह्माकुशध्वजसरोरुहलाञ्छनाद्दयम् ।
 यो लाति आश्रितजनाय कृपाभियोगं तं गांगलञ्च प्रणतोऽस्मिगुरुं हिभट्टम् ३१
 यो बंजघान यवनं मुञ्चुकुन्दहृष्ट्या, श्रीकेशवो यदुपतिश्रवणीयलीलः ।
 भूयः स एव मुनिरूपधरश्च भट्टो भक्ताविता तमनिशं शरणं व्रजामि ॥३२॥
 व्रजेशप्रेमाख्यभ्रियाऽभिषिक्तं भटन्तमीशं पुरुषं वरेष्यम् ।
 श्रीभट्टदेवं परमं भजेऽहं विज्ञानवैराग्यदयासुधादिधम् ॥३३॥
 तं श्रीगुरुं मुनिवरं करुणादिसिन्धुं, विद्याविरागपरभक्तिदयादिपूर्णम् ।
 श्रीव्यासदेवमनिशं हरिणाऽभिषिक्तं विज्ञानवारिदमहं शरणं व्रजामि ॥३४॥
 ज्ञानं बाणनिभं कृत्वा विद्यां कृत्वा महद्बनुः ।
 महिम्त्यामविद्यायां बलेशा ह्यह्य बंशजाः ॥३५॥
 भगवन्नामनादेन कुठारेणोपमदिताः,
 वन्दे परशुरामं तं भक्तर्षो योऽभिरक्षकः ॥३६॥
 तद्भ्रातृजं गोकुलचन्द्रसंज्ञं नैदेशिकं तत्सुतमात्मरामम् ।
 गेहाश्रमस्थं व्रजराजदेवं तदात्मजं वामनदेवमीड्यम् ॥३७॥

श्रीवल्लभं तत्तनयं महेशं तज्जं हृषीकेशमहानुभावम् ।
 तज्जं रमेशं मधुरेशदेवं तदात्मजं माधवदेवमीडे ॥३८॥
 श्रीहृषिमणीवल्लभमेव तज्जं दामोदरं चक्रधरश्च तज्जम् ।
 जनार्दनं प्रेमनिधिं गरिष्ठं तत्सूनुमीडे मखसूदनाख्यम् ॥३९॥
 कृष्णप्रसादं झटिति प्रसादं तदात्मजं श्रील मनोरथाख्यम् ।
 तत्सूनुमर्यञ्च विहारिलाल्यं नैदेशिकं देवमहं नमामि ॥४०॥
 तदात्मजं योगबिदां बरिष्ठं गोविन्ददेवं गुरुमार्यमीड्प्रम् ।
 संन्यस्य [सन्धस्त] सर्वं सितधामकक्षं गोविन्दकल्पं तमहं नमामि ॥४१॥
 तदासनं तत्कृतपुण्यपुञ्जः संप्राथितो भक्तगर्जरजसम् ।
 यो ब्रुभुषत् कौशिक एकधीरो देवं हि तं नोम्युदयप्रकाशम् ॥४२॥
 तदात्मजो नन्दकिशोरदेवं मुकुन्ददेवं सततं नमामि ।
 तदं गजौ श्रीलगदाधरञ्च सुधाधरं देवमहं नमामि ॥४३॥

विषय-सूची

विषय	पृष्ठ	विषय	पृष्ठ
सम्पादकीय	तीन	श्रीसंभ्रम-मानलीला	८२
भूमिका	५	रूपगविता मानलीला	८८
अनुराग-रस—		नवपनिहारी-लीला	९३
श्रीगुरु, इष्ट, श्रीधाम वन्दना	१	श्रीश्यामविरहिनी-लीला	१०४
चेतावनी पुनि गुण-दोष लक्षण	२	गुणलक्षण-लीला	१११
सन्त लक्षण	८	श्रीप्रथम अनुराग-लीला	११७
कृपानिधान की शोभा	९	चौतर-लीला	१२५
प्रेम-लक्षण	११	सखी खण्डिता-लीला	१२८
श्रीगोपालाष्टक प्रारम्भ	१७	बंगी-लीला	१३३
श्रीश्रजविहार	१९	निकुञ्जहिडोरा-लीला	१३७
बघाई के भजन	२२	शयन-लीला	१३८
स्तुति यमलाजुंन की	२४	साँवरीछा मूलनलीला	१४०
माखनचोर-लीला	२६	वनझूलन-लीला	१४२
उराहनो-लीला	३०	वसन्त-लीला	१४८
आँखमिचीनी-लीला	३५	होरी-लीला	१५१
श्रीजानकी की उत्पादन लीला	३७	गलोहारी-लीला	१५४
पनघट-लीला	४१	छाँहारी-लीला	१५८
नखलसखी की दानलीला	४९	प्रेमपरीक्षा-लीला	१६४
श्रीछाँद दानलीला	५६	रातपञ्चाध्यायी-लीला	१६९
देवी-पूजनलीला	५९	सखीअनुराग-लीला	१७६
नव दुलहिन-लीला	६१	साँक्षी-लीला	१७७
मान-लीला	६५	फुटकर पद	१७९
खण्डिता मानलीला	७७		

श्रीनारायणस्वामी के गुरु श्रीमुकुन्ददेवजी की वंश परम्परा

श्रीपरशुराम देवाचार्यजी के भाई के पुत्र—

श्रीगोकुलचन्द्रजी

आत्माराम

स्रजराजदेव

वामनदेव

महेश

हृषीकेश

रमेश

मधुरेश

माधवदेव

चक्रधर

दामोदर

जनार्दन

मखसूदन

कृष्णप्रसाद

मनोरथ

विहारीलाल

गोविन्ददेव

उदयप्रकाश (जन्म सं० १८८४ वि०)

परमधाम १९४५ वि०)

नन्दकिशोर (जन्म सं० १९०७

फाल्गुन कृ० ७

परमधाम १९८३

आषाढ कृ० १ जगि०

मुकुन्ददेव (जन्म सं० १९१० का०

शु० १० गुरुवार

परमधाम १९८४ वै०

कृ० १३

गदाधर

सुधाधर

ले०—गोलोकवासी श्रीब्रजवल्लभशरण वेदान्ताचार्य, पञ्चतीर्थ

एष सर्वेश्वर एष सर्वज्ञ एषोऽस्तव्यन्मिषेय योनिः सर्वस्य प्रभवाण्यवो हि भूतानाम् (मा. उ. ५)



निकुञ्जेषु तौरीप्रतीरे सुशोभं रत्नं रामलीलारसाब्धी रसेशम् ।
सखी रङ्गदेवी सदोपासनीयं परं ब्रह्म सर्वेश्वरं तौमि नित्यम् ॥

पर्य १६) श्रीधाम वृन्दावन, चंद्र वि. सं. २०२७, मार्च १९७१, श्रीनिम्बार्काब्द ५०६६ अंक (१, २)

जुगल-चरण अनुराग

करु मन जुगल-चरण अनुराग ।

बहुत दिवस तोहिं सोवत बीते, जाग रे मूरख जाग ॥
बेमुखियन की संगति सों तू, जैते बनें त्यो भाग ॥
उनको साथ सदा दुखवाई, जिमि ढिग कारे नाग ॥
है वंरी पुनि भीत हूँ मारें, मृग को बरुवा राग ॥
या विधि तोहिं विषं दुख देंगे, चेत रे मंद अभाग ॥
बस वृन्दावन भज राधाधर, भूलिके अन्त न लाग ॥
'नारायण' बनि जायगी तेरो, अब तू भ्रमना त्याग ॥

—श्रीनारायण स्वामीजी

ॐ श्रीराधासर्वेश्वरो विजयते ॐ



ॐ श्रीभगवन्निम्बार्काचार्याय नमः ॐ

अनन्तश्री विभूषित जगद्गुरु निम्बार्काचार्यपीठाधीश्वर
श्रीराधासर्वेश्वरशरणदेवाचार्य श्री 'श्रीजी' महाराज

अ० भा० श्रीनिम्बार्काचार्यपीठ, श्रीनिम्बार्कतीर्थ (सलेमाबाद) किशनगढ़ राज०

शुभाशीर्वादात्मक मङ्गलमयी अभिकामजा

श्रीनारायण स्वामी रावलपिंडी (पञ्जाब) से श्रीधाम वृन्दावन में निवास किया। आप का अतीव पावन जीवन था, रासविहारी श्रीराधाकृष्ण भगवान् के अनन्य उपासक थे और इनमें विलक्षण कवित्व शक्ति थी। श्रीधाम वृन्दावन किवा गुमुसरोवर (नोवधन) जाकर अपने परमाराध्य भीश्यामाश्याम नित्यनवकिशोर निकुञ्जविहारी श्रीराधाकृष्ण भगवान् के रसमयी ललित लीला चिन्तन में सतत अभिरत रहते थे। ये अनन्तश्री विभूषित जगद्गुरु निम्बार्काचार्य-पीठाधीश्वर श्रीपरशुरामदेवाचार्यजी महाराज की आचार्य-परम्परा के अनुगामी श्रीनिम्बार्क-सम्प्रदाय के प्रख्यात महानुभाव थे। इनके द्वारा प्रणीत "श्रीव्रजविहार" ग्रन्थ सुप्रसिद्ध है।

अनन्तश्री विभूषित जगद्गुरु श्रीनिम्बार्काचार्य-पीठाधीश्वर श्रीबालकृष्णशरणदेवाचार्य जी महाराज जो हमारे स्वर्ण के श्रीगुरुवर्य थे। आपकी से जब भी श्रीनारायण स्वामी की चर्चा होती तो यह कहते जब हम श्रीवृन्दावन निवास करते, तब इनसे तीन-चार बार मिलना हुआ। इनसे चर्चा प्रसङ्ग में ये अपने को निम्बार्क-सम्प्रदाय अनुयायी ही

निर्देश करते थे । वस्तुतः उनकी श्रीयुगलकिशोर श्रीराधाकृष्ण भगवान् में अनन्य अनुरक्ति थी ।

वस्तुतः इस प्रकार श्रीनारायण स्वामी एकान्त में ब्रज कुञ्ज-लताओं के मध्य अवस्थित होकर श्रीयुगल-प्रियालाल के चिन्तन अभिरत रहते ।

अतीव प्रसन्नता है कि “श्रीब्रजविहार” ग्रन्थ का पुनर्मुद्रण हो रहा है, जो रासलीला रसिक भगवज्जनों के लिए परम हितप्रद होगा । इसके प्रकाशन में श्रीजयकिशोरशरण जी का प्रयास अतीव अनुकरणीय है ।

मिति पौष शुक्लपक्ष, एकादशी, गुरुवार, वि० सं० २०७१
श्रीधाम वृन्दावन





श्रीयुगल सरकार अष्टसखी सेवित

❀ श्रीराधाकृष्णाभ्यां नमः ❀

श्रीनारायणरत्नामीजीकृत—

❀ अनुरागरस ❀

—❀❀❀❀❀❀❀❀❀❀

❀ श्रीगुरु वन्दना ❀

दोहा—श्रीगुरुचरण सरोजरज, वन्दौ बारम्बार ।
नारायण भवसिन्धु हित, जे नवका सुखसार ॥१॥
कृपा करो मो दीन पै, हरौ तिमिर अज्ञान ।
नारायण अनुरागरस, निजमति कहूं बखान ॥२॥

❀ श्रीराधागोपाल वन्दना ❀

श्रीराधा गोपाल पद, कर प्रणाम उरधार ।
नारायण अनुरागरस, कहूँ बुद्धि अनुसार ॥३॥
दयासिन्धु अति सुखसदन, सदा रहौ अनुकूल ।
नारायण जिन उर धरो, मो पामर की भूल ॥४॥

❀ श्रीवृन्दावन वन्दना ❀

धनि वृन्दावन धाम है, धनि वृन्दावन नाम ।
धनि वृन्दावन रसिक जन, सुमिरे राधे श्याम ॥५॥
वृन्दावन जे वास कर, शाक पात नित खार्य ।
तिनके भागिन को निरख, ब्रह्मादिक ललचार्य ॥६॥
हम न भये ब्रज में प्रगट, यही रहौ मन आस ।
नितप्रति निरखत युगल छवि, कर वृन्दावनवास ॥७॥

नारायण व्रज भूमिकूँ, सुरपति नावें माथ ।
जहां आय गोपी भये, श्रीगोपेश्वर नाथ ॥८॥

* चेतावनी पुनि गुणदोष लक्षण *

बहुत गई थोरी रही, नारायण अब चेत ।
काल चिरैया चुग रही, निशिदिन आयू खेत ॥६॥
नारायण सुख भोग में, तू लम्पट दिन रैन ।
अंतसमय आयो निकट, देख खोलके नैन ॥१०॥
धन यौवन यों जायगो, जा विधि उड़त कपूर ।
नारायण गोपाल भजि, क्यों चाटे जग धूर ॥११॥
रम्भक शुम्भ निशुम्भ अरु, त्रिपुर आदि लं शूर ।
नारायण या कालने, किये सकल भट चूर ॥१२॥
हिरण्याक्ष जगमें विदित, हिरण्यकशिपु बलवान ।
नारायण क्षणमें भये, यह सब राख मसान ॥१३॥
सगर नहूष ययाति षट, और अनेक महीप ।
नारायण अब वह कहां, भुजबल जीते द्वीप ॥१४॥
कुम्भकरण दशकण्ठसे, नारायण रणधीर ।
भये सकल भट कालवश, जिनके कुलिश शरीर ॥१५॥
दुर्योधन जग में प्रगट, जरासन्ध शिशुपाल ।
नारायण सो अब कहां, अभिमानी भूपाल ॥१६॥
नारायण संसार में, भूपति भये अनेक ।
मैं मेरी करते रहे, लं न गये तृण एक ॥१७॥
भुजबल जीते लोक सब, निरभय सुख धनधाम ।
नारायण तिन नृपनको, लिख्यो रहगयो नाम ॥१८॥
हाथ जोरि ठाढ़ो रह्यो, जिनके सनमुख काल ।
नारायण सोऊ बलो, परे काल के गाल ॥१९॥

नारायण नवखण्ड में, निरमय जिनको राज ।
 ऐसे विदितमहीप जग, ग्रसे काल महाराज ॥२०॥
 गज तुरंग रथ सेन अति, निशि दिन जिनके द्वार ।
 नारायण सो अब कहां, देखौ आँख पसार ॥२१॥
 नारायण निज हाथ पै, जे नर धरत सुमेर ।
 सोउ वीर या भूमि पै, भये राखके ढेर ॥२२॥
 जिनके सहजहि पग धरत, रज सम होत पषान ।
 नारायण तिनको कहैं, रह्यो न नाम निशान ॥२३॥
 नारायण जिनके भवन, विधि सम भोग विलास ।
 अन्त समय सब छाँडि के, भये काल के प्राप्त ॥२४॥
 जिनको रूप निहार के, रवि शशि रथ ठहरात ।
 नारायण ते स्वप्न सम, भये मनोहर गात ॥२५॥
 रे मन क्यों भटकत फिरत, भज श्रीनन्दकुमार ।
 नारायण अबहूँ समझ, भयो न कछु बिगार ॥२६॥
 नारायण तू भजन कर, कहा करेंगे कूर ।
 स्तुति अरु निन्दा जगत की, दोउन के शिर धूर ॥२७॥
 नारायण शुभकाज ते, या विधि आवं लाज ।
 जो ऐसे अघ सों करे, फिर क्यों होय अकाज ॥२८॥
 चार दिनन की चांदनी, यह सम्पति संसार ।
 नारायण हरि भजन करि, जासों होय उबार ॥२९॥
 उर भीतर अति चाहना, बाहर राखत त्याग ।
 नारायण वा त्याग पै, परो भार की आग ॥३०॥
 मान बड़ाई ईरषा, मन में भरौ अनेक ।
 नारायण साधु बने, देखो अचरज एक ॥३१॥
 तेरे भावे कछु करौ, भलो बुरो संसार ।
 नारायण तू बंठि के, अपनो भवन बुहार ॥३२॥

बात बनावै ज्ञान की, भोगन को ललचात ।
 नारायण कलिकाल के, कौतुक कहे न जात ॥३३॥
 नारायण सत्संग कर, सीख भजन की रीति ।
 काम क्रोध मद लोभ में, गई आयुबल बीति ॥३४॥
 तनक बढ़ाई पाय के, मन में अधिक गरूर ।
 नारायण जिन बठ मग, साहब को घर दूर ॥३५॥
 यह शोभा संसार की, ज्यों टेसू के फूल ।
 नारायण फल आश तजि, ललित देख जिन भूल ॥३६॥
 धन विद्या गुण और बल, यह न बढ़प्पन वेत ।
 नारायण सोई बड़ो, जाको हरिसों हेत ॥३७॥
 सो दुख भोगत आपही, जो दुख अपनी टांट ।
 नारायण भवरोग को, को लेवंगो बांट ॥३८॥
 निज स्वारथ के मित्र सब, यही जगत को चाल ।
 नारायण बिन स्वारथी, हितू नन्द को लाल ॥३९॥
 तात मात त्रिय भ्रात सुत, और सकल परिवार ।
 नारायण अपनो बही, जाको हरिसों प्यार ॥४०॥
 नारायण हरि भजन में, तू जिन देर लगाय ।
 का जाने या देर में, स्वास रहै के जाय ॥४१॥
 नारायण बिन बोध के, पण्डित पशू समान ।
 तासों अति मूरख भलो, जो सुमिरै भगवान ॥४२॥
 ज्ञान कथा सीखी घनी, प्रश्न करत अति गूढ़ ।
 नारायण बिन धारणा, वृथा बकत है मूढ़ ॥४३॥
 पुण्य पाठ पूजा प्रगट, करत सहित हंकार ।
 नारायण रीझै नहीं, चतुरन को सरदार ॥४४॥
 नारायण जाकी विभौ, तन धन धरा निकेत ।
 तेहि हित कौड़ी देत में, कर भरकर जल लेत ॥४५॥

भाव भक्ति सत्संग की, स्वप्नेह नहिं सार ।
 नारायण समझें बड़ी, सुत दारा की लार ॥४६॥
 दृग सों नाव निहार के, पुनि गज होय अरूढ़ ।
 भोगन ते तरिबो चहै, नारायण मति मूढ़ ॥४७॥
 चटक मटक नित छैल बन, तकत चलत चहुँ ओर ।
 नारायण यह सुधि नहीं, आज मरं कै भोर ॥४८॥
 नारायण जब अंत में, यम पकरेंगे बाँह ।
 तिनहूँ सों कहियो हमें, अभी सोफतो नाँह ॥४९॥
 कोऊ नहीं अपना सगो, बिन राधा गोपाल ।
 नारायण तू वृथा मति, परं जगत के जाल ॥५०॥
 मन लाग्यो सुख भोग में, तरन चहै संसार ।
 नारायण कैसे बने, दिवस रैन को प्यार ॥५१॥
 काम क्रोध मद लोभ की, लगी हियेमें आग ।
 नारायण वैराग भट, सहित ज्ञान गये भाग ॥५२॥
 विद्यावंत स्वरूप गुण, सुत दारा सुख भोग ।
 नारायण हरि भक्ति बिन, यह सबही हैं रोग ॥५३॥
 नारायण निज हिये में, अपने दोष विचार ।
 ता पोछे तू और के, औगुण भलें निहार ॥५४॥
 संत सभा झांकी नहीं, कियो न हरिगुण गान ।
 नारायण फिर कौन विधि, तू चाहत कल्याण ॥५५॥
 जिन संतनके वरश सों, नारायण अघ जात ।
 तिनें कहत ये फिरत हैं, घर घर दुकड़े खात ॥५६॥
 बहु विधि पूजा दान व्रत, करत गरबके साथ ।
 नारायण बिन दीनता, द्रवें न दीनानाथ ॥५७॥
 नारायण मैं सत्य कहूँ, भुज उठायके आज ।
 जो जिय बने गरीब तू, मिलें गरीबनिवाज ॥५८॥

विद्या पढ़ करतौ फिरै, औरन को अपमान ।
 नारायण विद्या नहीं, ताहि अविद्या जान ॥५६॥
 कथा सुनत गइ आयुबल, भयो न मन अनुराग ।
 नारायण तिन श्रवणसों, भवन भले हैं नाग ॥६०॥
 कथनी कथि केते गये, कर्म उपासना ज्ञान ।
 नारायण चारों जुगन, करनी है परमान ॥६१॥
 भीतरसों मेलो हियो, बाहर रूप अनेक ।
 नारायण तासों भलो, कौआ तन मन एक ॥६२॥
 नारायण ऐसे घने, बकैं अनाप सनाप ।
 दोष लगावैं सन्त को, आप पापके बाप ॥६३॥
 अपनो साखी आप तू, निज मनमाहि विचार ।
 नारायण जो खोट है, ताकूं तुरत निकार ॥६४॥
 जिनको मन निज वश भयो, तजकर विषै विलास ।
 नारायण ते घर रहैं, चहैं करैं वनवास ॥६५॥
 नारायण सुख भोग में, मस्त सभी संसार ।
 कोऊ मस्त वा मौँज में, देख्यो आंख पसार ॥६६॥
 छवि निहार गोपाल की, जिहि न होय आनंद ।
 नारायण तिहि जानिये, यही चौथ को चंद ॥६७॥
 नारायण ते धन्य नर, जिन वश कीये पांच ।
 साहिब सों मुख ऊजरे, जग की लगी न आंच ॥६८॥
 एक नारि औगुण भरी, एक तिया गुणवंत ।
 नारायण सोई भली, जापै रोजत कंत ॥६९॥
 रूप रंग सुन्दर घनो, चतुर कुलवती नार ।
 नारायण तौ का भयो, प्रीतम करत न प्यार ॥७०॥
 चंद्रबदन मृग सम नयन, गति गयंद मृदुबोल ।
 नारायण हरिभक्ति बिन, यह कौड़ी के मोल ॥७१॥

नारायण तौ का भयो, पाये नैन विशाल ।
 नैन वही जिन में बसें, श्रीराधा गोपाल ॥७२॥
 लखी न जिन छवि श्यामकी, कियो न पलभर ध्यान ।
 नारायण ते जगत में, प्रगट निपट पाषाण ॥७३॥
 नारायण या जगत में, यह दो वस्तू सार ।
 सब सों मीठो बोलिबो, करिबौ पर उपकार ॥७४॥
 नारायण परलोक में, यह दो आवत काम ।
 देना मुष्टी अन्न की, लेना भगवत नाम ॥७५॥
 बांट खाय हरि को भजे, तजे सकल अभिमान ।
 नारायण ता पुरुष को, उभय लोक कल्याण ॥७६॥
 कियो न मानत और को, परहित करत न आप ।
 नारायण ता पुरुष को, मुख देखे सों पाप ॥७७॥
 रक्षा करी न जीव की, दियो न आदर दान ।
 नारायण ता पुरुष सों, रुख भलो फलवान ॥७८॥
 देत फूल फल पात दल, तनक नीर तरु पाय ।
 नारायण तासों गयो, खीर खाँड़ नित खाय ॥७९॥
 नारायण दो बात को, दीज सदा बिसार ।
 करी बुराई और ने, आप कियो उपकार ॥८०॥
 दो बातन को भूलि मति, जो चाहत कल्याण ।
 नारायण इक मौतकूँ, दूजे श्रीभगवान ॥८१॥
 वशीकरण के मंत्र हैं, नारायण यह चार ।
 रूप राग आधीनता, सेवा भली प्रकार ॥८२॥
 नारायण कीजै सदा, दुष्ट संग को त्याग ।
 जिमि लुहारके ढिग परै, बदन चिंगारी आग ॥८३॥
 फूली लता करीलकी, खिले मनोहर फूल ।
 नारायण ताके निकट, भ्रमर न बैठत भूल ॥८४॥

नारायण ढिङ्ग सन्त के, गये न होत बिगार ।
उपों बिन मोल सुगन्धिता, मिलै समीप अतार ॥८५॥

* सन्त लक्षण *

तजि पर औगुण नीरको, क्षीर गुणनसों प्रीति ।
हंस सन्तकी सर्वदा, नारायण यह रीति ॥८६॥
तनक मान मनमें नहीं, सब सों राखत प्यार ।
नारायण ता सन्त पै, बार बार बलिहार ॥८७॥
अति कृपालु संतोषवृत्ति, युगल चरण में प्रीति ।
नारायणते सन्त बर, कोमल वचन विनीति ॥८८॥
उदासीन जगसों रहै, यथा मान अपमान ।
नारायण ते सन्तजन, निपुण भावना ध्यान ॥८९॥
मगन रहैं नित भजन में, चलत न चाल कुचाल ।
नारायणते जानिये, यह लालन के लाल ॥९०॥
परहित प्रीति उदार चित, विगत दंभ मद रोष ।
नारायण दुखमें लखे, निज कर्मन को दोष ॥९१॥
भक्ति कल्पतरु पात गुण, कथा फूल बहु रंग ।
नारायण हरिप्रेम फल, चाहत सन्त विहंग ॥९२॥
सन्त जगतमें सो सुखी, मैं मेरी को त्याग ।
नारायण गोविन्द पद, दृढ़ राखत अनुराग ॥९३॥
जिनको पूरण भक्ति है, ते सब सों आधीन ।
नारायण तजि मान मद, ध्यान सलिलके मीन ॥९४॥
नारायण हरि भक्ति की, प्रथम यही पहचान ।
आप अमानो हूँ रहै, देत और को मान ॥९५॥
कपट गाँठ मनमें नहीं, सबसों सरल सुभाव ।
नारायण ता भक्तकी, लगी किनारे नाँव ॥९६॥

जिनको मन हरिपद कमल, निशिदिन झमर समान ।
 नारायण तिनसों मिले, कबूँ न होवै हान ॥६७॥
 नारायण जो कृपा करि, सन्त पधारें धाम ।
 आगे ते उठि प्रीति सौं, कीजें दण्ड-प्रणाम ॥६८॥
 सन्त दरशकी लालसा, नारायण जो होय ।
 रीते कर नहिं जाइये, फूल पत्र फल तोय ॥६९॥
 अजापुत्र मैं मैं कहत, दिये आपने प्रान ।
 नारायण मंन भली, खाय मलीदा सान ॥१००॥
 नारायण दुख सुख उभै, भ्रमत यथा दिन रात ।
 बिन बुलाय ज्यों आ रहै, बिना कहै त्यों जात ॥१०१॥
 नारायण हरिकृपाकी, तकत रहै नित बाट ।
 जानहार जिमि पार को, निरखत नौका घाट ॥१०२॥

❀ कृपानिधान की शोभा ❀

रतिपतिछबिनिन्दितवदन, नीलजलज समश्याम ।
 नवयौवन मृदु हास वर, रूपराशि सुखधाम ॥१०३॥
 ऋतु अनुसार सुहावने, अद्भुत पहरे चीर ।
 जो निज छबिसों हरत हैं, धीरजहू को धीर ॥१०४॥
 मोरमुकुटकी निरखि छबि, लाजत मदन करोर ।
 चन्द्रवदन सुख सदन पं, भावक नैन चकोर ॥१०५॥
 जिन मोरन के पंख हरि, राखत अपने शीश ।
 तिनके भागिन की सखी, कौन कर सके रीस ॥१०६॥
 घुंघरारी अलकावली, मुख पं देत बहार ।
 रसिक मीन मनके लिये, कांटे अति अनियार ॥१०७॥
 मकराकृत कुण्डल श्रवण, झाँई परत कपोल ।
 रूपसरोवर माहिं द्वै, मछरी करत कलोल ॥१०८॥

शुक लजात लखि नासिका, अद्भुत छबिकी सार ।
 तामें इक मोती परघो, अजब सुराही दार ॥१०६॥
 दशन पाँति मुतियन लरी, अधर ललाई पान ।
 ताहू पै हैंसि हेरबो, को लखि बचै सुजान ॥११०॥
 मृदुमुसिक्यान निहारिके, धीर धरत है कौन ।
 नारायण कै तन तज, कै बौरा कै मौन ॥१११॥
 अधरामृत सम अधर रस, जानत बंशी सार ।
 सस सुरन सों सस कर, कहत पुकार पुकार ॥११२॥
 रतनन को कण्ठी गरें, मुक्तमाल वनमाल ।
 त्रिविध ताप तीनों हरें, जो निरखत नैदलाल ॥११३॥
 हस्त कमल पै मणोमय, जगमगात कर फूल ।
 जिनकी छबिलखि शम्भुरिपु, गयो सकल सुधिभूल ॥११४॥
 उदर माहिं त्रिवली सुभग, नाभि रुचिर गंभीर ।
 छबि समुद्र के निकट अति, भई त्रिवेणी भीर ॥११५॥
 गजमुक्ता को लरी द्वै, अति अमोल छबिकन्द ।
 सो अद्भुत कटि कौंधनी, पहिर रद्यो ब्रजचन्द ॥११६॥
 गोल गुलफ पै सजि रहे, नूपुर शोभा ऐन ।
 जिनकी धुनि सुनि जगत सों, मिटै लैन अरु दैन ॥११७॥
 युगल चरण दश अँगुरियां, दशधा भक्ति सुहाय ।
 नखनज्योतिलखि चन्द्रमा, गयो अकाश उडाय ॥११८॥
 तरुवनकी लखि अरुणता, कविजन मन सकुचात ।
 इनकी उपमा का कहैं, पटतर नाहिं दिखात ॥११९॥
 ब्रजजीथिन जब साँवरो, चलत सुचाल मतंग ।
 पग पगमें छबिकी झरी, होत चलै इवसंग ॥१२०॥
 जे रसिकन उर नित बसैं, निगमागम को सार ।
 नारायण तिन चरणकी, बार बार बलिहार ॥१२१॥

नन्दलाल कीरति कुमरि, कहिबेकूं यह दोय ।
 ज्यों तनकी छाया प्रगट, तनसों बिलग न होय ॥१२२॥
 याविधि सों जो रसिकजन, धरत दिवसनिशि ध्यान ।
 नारायण ताकूं सदा, गावत वेद पुरान ॥१२३॥
 चलत फिरत बँठत उठत, लगी रहै यह आस ।
 श्याम राधिका निरखिबो, वृन्दाविपिन निवास ॥१२४॥
 नारायण होवै भलें, जो कुछ होवनहार ।
 हरिसों प्रीति लगायके, अब कहा सोचविचार ॥१२५॥
 नारायण अति कठिन है, हरि मिलिबेकी बाट ।
 या मारग तब पग धरै, प्रथम शीश दे काट ॥१२६॥

❀ अथ प्रेमलक्षण ❀

नारायण मन में बसी, लोकलाज कुलकान ।
 आशक होना श्याम को, हाँसी-खेल न जान ॥१२७॥
 नेहडगर में पग धरै, फेर विचारै लाज ।
 नारायण नेही नहीं, बातन को महाराज ॥१२८॥
 चौंसर बिछी सनेहकी, लगे शीशके दाँव ।
 नारायण आशक बिना, को खेलै चितचाव ॥१२९॥
 गढ़ि गढ़ि कें बातें कहे, मन में तनक न प्रीति ।
 नारायण कैसे मिले, साहब सांचे मीत ॥१३०॥
 जो शिर सांटे हरि मिले, तो पुनि लीजै दौर ।
 नारायण ऐसे न हो, गाहक आवे और ॥१३१॥
 सो क्यों सेवे बाग बन, गुल्मलता तरु मूल ।
 नारायण जाके हृदय, फूल रझो वह फूल ॥१३२॥
 नारायण प्रीतम निकट, सोई पहुँचनहार ।
 गेंद बनावै शीश को, खेले बीच बजार ॥१३३॥

लगन लगन सबही कहें, लगन कहावे सोय ।
 नारायण जा लगनमें, तन मन दीजे खोय ॥१३४॥
 नर संसारी लगनमें, दुख सुख सहै करोर ।
 नारायण हरि प्रीति में, जो होवै सो थोर ॥१३५॥
 नारायण हरि लगन में, यह पांचों न सुहात ।
 विषय भोग निद्रा हँसी, जगत प्रीति बहुबात ॥१३६॥
 नारायण घाटी कठिन, जहां नेह को घाम ।
 बिकल मूर्च्छा सिसकिबौ, यह मगमें विधाम ॥१३७॥
 नारायण या डगर में, कोउ चलत है बीर ।
 पग पग में बरछी लगै, श्वास श्वासमें तीर ॥१३८॥
 लगन लगी गोपालको, भूली तन की सार ।
 नारायण मछरी भयो, श्यामरूप जलधार ॥१३९॥
 वर्णाश्रम उरझें कोऊ, विधि निषेध व्रत नेम ।
 नारायण बिरले लखें, जिन मिलि उपजे प्रेम ॥१४०॥
 प्रेम नगर प्रीतम बसै, पं नारायण नेत ।
 जानहार या गाम को, कोउ दिखाई देत ॥१४१॥
 प्रेमी छुट या प्रेम को, और न जानत सार ।
 नारायण बिन जौहरी, जैसे लाल बजार ॥१४२॥
 तौलों यह फांसी गरे, वर्णाश्रम व्रत नेम ।
 नारायण जौलों नहीं, मुँह दिखरायो प्रेम ॥१४३॥
 प्रेम सहित अँतुवन भरें, धरे युगलको ध्यान ।
 नारायण ता भक्त को, जग में दुर्लभ जान ॥१४४॥
 नारायण जाके हिये, उपजत प्रेम प्रधान ।
 प्रथम हिया की हरत है, लोकलाज कुलकान ॥१४५॥
 नारायण या प्रेम को, नद उमड़त जा ठौर ।
 पलमें लाज म्रजादके, तट काटत है दौर ॥१४६॥

विधि निषेध श्रुति वेदकी, मँड़ देत सब मेट ।
 नारायण जाके बदन, लागत प्रेम चपेट ॥१४७॥
 नारायण ज्ञाता अगम, सबकी सम्मति येह ।
 बिना प्रेम कर्मादि विधि, ज्यों ऊसर में मेह ॥१४८॥
 नारायण जप योग तप, सबसों प्रेम प्रवीन ।
 प्रेम हरीकूँ करत है, प्रेमी के आधीन ॥१४९॥
 नारायण यह प्रेम सुख, मुखसों कष्टो न जाय ।
 ज्यों गूँगो गुड़ खात है, सँनन स्वाद लखाय ॥१५०॥
 प्रेम खेल सबसों कठिन, खेलत कोउ सुजान ।
 नारायण बिन प्रेम के, कहा प्रेम पहचान ॥१५१॥
 जिनें प्रेम प्यालो पियो, झूमत तिनके नैन ।
 नारायण वा रूप मद, छके रहैं दिन रैन ॥१५२॥
 नारायण जाके हिये, लगी प्रेमकी रौर ।
 ताही को जीवन सुफल, दिन काटै सब और ॥१५३॥
 नेक धर्म धीरज समझ, सोच विचार अनेक ।
 नारायण प्रेमी निकट, इनमें रहैं न एक ॥१५४॥
 रूप छके झूमत रहैं, तन को तनक न जान ।
 नारायण दृग जल भरे, यही प्रेम पहचान ॥१५५॥
 है न्यारो सब पन्थ ते, प्रेम पन्थ अभिराम ।
 नारायण यामें चलत, वेगि मिलै पिय धाम ॥१५६॥
 मन में लागी चटपटी, कब निरखूँ घनश्याम ।
 नारायण भूल्यो सभी, खान पान विधाम ॥१५७॥
 सुनत न काहू को कही, कहै न अपनी बात ।
 नारायण वा रूप में, मगन रहैं दिन रात ॥१५८॥

देह गेह की सुधि नहीं, दूटि गई जग प्रीत ।
 नारायण गावत फिरै, प्रेम भरे रसगीत ॥१५६॥
 धरत कहूँ पग परत कित, सुरति नहीं इकठौर ।
 नारायण प्रीतम बिना, दीखत नहि कछु और ॥१६०॥
 भयो बावरो प्रेम में, डोलत गलियन माहि ।
 नारायण हरिलगन में, यह कछु अचरज नाहि ॥१६१॥
 लतन तरें ठाड़ो कबूँ, कबहूँ यमुना तीर ।
 नारायण नैनन बसी, मूरति श्याम शरीर ॥१६२॥
 प्रेम सहित गदगद गिरा, कढ़त न मुखसों बात ।
 नारायण महबूब बिन, और न कछु सुहात ॥१६३॥
 कबहूँ चहै कछु कहत कछु, नयन नीर सुरभंग ।
 नारायण बौरा भयो, लग्यो प्रेमको रंग ॥१६४॥
 कबूँ हँसै रोवै कबूँ, नाचत करि गुण गान ।
 नारायण सुधि तन नहीं, लग्यो प्रेमको बान ॥१६५॥
 सुरति लगी वा ध्यानमें, सुनत और की बात ।
 नारायण उत्तर दियो, मृदुल मनोहर गात ॥१६६॥
 जाके मन यह छवि बसी, सोवतहूँ बररात ।
 नारायण कुण्डल निकट, अद्भुत अकल सुहात ॥१६७॥
 नारायण जाके दृगन, सुन्दर श्याम समाय ।
 फूल पात फल डार में, ताकूँ वही दिखाय ॥१६८॥
 ब्रह्मादिक के भोग सुख, विष सम लागत ताहि ।
 नारायण ब्रजचन्दकी, लगन लगी है जाहि ॥१६९॥
 नारायण हरि प्रीतिमें, जाको तन मन चूर ।
 ताहि न ममता औरसों, निकट रही वा दूर ॥१७०॥

गुण गाव गोपालके, भरि लावें दृग नीर ।
 नारायण नहि कल परं, बिन देखे बलबीर ॥१७१॥
 जाके मन में बसि रही, मोहन की मुसिक्यान ।
 नारायण ताके हिये, और न लागत ज्ञान ॥१७२॥
 जो घायल हरि दृगनके, परे प्रेमके खेत ।
 नारायण सुनि श्याम गुण, एक संग रो देत ॥१७३॥
 नारायण जाको हियो, बिध्यो, श्याम दृग बान ।
 जगके भावें जीवतो, है वह मृतक समान ॥१७४॥
 सुख सम्पति धन धामकी, ताहि न मनमें आस ।
 नारायण जाके हिये, निशिदिन प्रेम प्रकास ॥१७५॥
 नारायण जिनके हृदय, प्रीति लगी घनश्याम ।
 जाति पांति कुल सों गये, रहे न काहू काम ॥१७६॥
 नारायण तब जानिये, लगन लगी या काल ।
 जित तित में दृष्टी परं, दीखें मोहनलाल ॥१७७॥
 नारायण ब्रजचन्द्र के, रूप पयोनिधि माहि ।
 डूबत बहुत एक जन, उछरत एकौ नाहि ॥१७८॥
 परा भक्ति अरु ज्ञान में, नेक नहीं कछु भेद ।
 नारायण सुख प्रेम है, कहैं सन्त अरु वेद ॥१७९॥
 परा भक्ति याको कहैं, जित तित श्याम दिखात ।
 नारायण सो ज्ञान है, पूरण ब्रह्म लखात ॥१८०॥
 नन्दलाल दशरथ सुवन, उभय एक सरकार ।
 नारायण जो दो कहैं, ते नर विना बिचार ॥१८१॥
 नारायण सब एक हैं, रंग रूप तिल रेख ।
 उनके दृग गम्भीर हैं, इनके चपल विशेष ॥१८२॥

नारायण दो बात सों, अधिक और नहिं बात ।
 रसिकनको सत्संग नित, युगलध्यान दिनरात ॥१८३॥
 गुण मन्दिर सुन्दर युगल, मंगल मोदनिधान ।
 नारायण निज चरण रति, यह दीजै वरदान ॥१८४॥

इति श्रीवृन्दावननिवासी श्रीनारायणस्वामाजी कृत—

श्रीअनुरागरस सम्पूर्ण



ॐ श्रीराधाकृष्णाभ्यां नमः ॐ

अथ श्रीगोपालाष्टक प्रारम्भः

—सुखं सुखं—

विहरत स्वच्छन्दं आनन्दकन्दं श्रीब्रजचन्द ब्रह्मपरम् ।
पूरणशशिवदनं शोभासदनं जितछविमदनं रूपवरम् ॥
हलधरवरवीरं श्यामशरीरं गुणगम्भीरं धीरधरम् ।
भज श्रीगोपालं दीनदयालं वचनरसालं तापहरम् ॥१॥

राजत वनमाला रूपविशाला चालमराला सुरतहरम् ।
कुण्डलघृतकरणं गिरवरधरणं निज जन शरणं कृपाकरम् ॥
गोपन कृतसंगं ललित त्रिभंगं लजित अनंगं निरिच्छ परम् ।
भज श्रीगोपालं दीनदयालं वचनरसालं तापहरम् ॥२॥

जलधर वर श्यामं पूरण कामं अतिसुखधामं दुःखहरम् ।
वृन्दावन क्रीडित असुरनपीडित ब्रजतियवीडित रसिकवरम् ॥
नूपुर ध्वनि चरणं मुनिमनहरणं तारण तरणं तुष्टतरम् ।
भज श्रीगोपालं दीनदयालं वचनरसालं तापहरम् ॥३॥

राधा उर हारं रूप अपारं नीर विहारं चौर हरम् ।
कुंचित वरकेशं मुकुट विशेषं गोपसवेषं निगम वरम् ॥
कोमल अति चरणं वेदविवरणं जगदुद्धरणं मृदुलतरम् ।
भज श्रीगोपालं दीनदयालं वचनरसालं तापहरम् ॥४॥

अलकन मुखराजत मन्मथलाजत किकिणि बाजत मधुरस्वरम् ।
वंशोकृत नादं हरत विषादं युगवर पादं तिमिर हरम् ॥
भक्तन आधीनं चरित नवीनं परम प्रवीणं प्रेम परम् ।
भज श्रीगोपालं दीनदयालं वचन रसालं तापहरम् ॥५॥

अति नृत्यप्रवीरे धीरसमीरे यमुना तीरे रास करम् ।
 कल गान अनूपं श्यामस्वरूपं त्रिभुवन भूपं मोद भरम् ॥
 राधागुणगायक व्रजसुखदायक सुरवर नायक वेणु धरम् ।
 भज श्रीगोपालं दीनदयालं वचन रसालं ताप हरम् ॥६॥
 सुन्दर मृदुहासं विपिन विलासं कुञ्ज निवासं केलिकरम् ।
 युवतीदृगञ्जन जनमनरञ्जन केशीभञ्जन भारहरम् ॥
 भूषणनिजभवनं गजगतिगमनं कालिय दमनं नृत्य करम् ।
 भज श्रीगोपालं दीनदयालं वचन रसालं ताप हरम् ॥७॥
 गोरजमुख शोभित सुरनरलोभित मन्मथ क्षोभित दृश्य परम् ।
 गोपनसहभुञ्जे विपिननिकुञ्जे वत्सनपुंजे दुहिण हरम् ॥
 यह छवितारायण लखिनारायण भयेपरायण अखिल नरम् ।
 भज श्रीगोपालं दीनदयालं वचन रसालं ताप हरम् ॥८॥

इति श्रीनारायण स्वामीजी विरचितं

श्रीगोपालाष्टकं सम्पूर्णम्



❁ श्रीनिकुञ्जविहारिणे नमः ❁

* अथ श्रीब्रजविहार *

श्रीनारायण स्वामीजी कृत—



❁ अथ पदसिद्धान्त ❁

राग शहानी

वन्दौ श्रीगुरु चरण कमलवर ॥
जिनको नाम सकलमंगलनिधि, ध्यान धरत अघ रहत न पलभर ॥
परम उदार सार निगमागम, भक्ति ज्ञान की खान मनोहर ॥
नारायण मोहिं दीन जानिके, वास दियो वृन्दावन गहि कर ॥१॥

राग शहानी

धनि धनि श्रीवृन्दावन धाम ॥
जाकी महिमा बेद बखानत, सब विधि पूरण काम ॥
आश करत हैं जाकी रज की, ब्रह्मादिक सुर ग्राम ॥
लाडिलीलाल जहाँ नित विहरत, रतिपति छबि अभिराम ॥
रसिकनको जीवन धन कहियत, मंगल आठों याम ॥
नारायण बिन कृपा जुगलवर, छिन न मिलै विश्राम ॥२॥

राग शहानी

वन्दौ श्रीराधा ब्रजचन्द ॥
जिनके गुणगण अति अपार हैं, गावत वेद भेद बहु छन्द ॥
करत अनेक भांति सों लीला, भक्तजनन मन देत अनन्द ॥
एक वदन सों कहें लगि वरनें, नारायण मो सम मतिमन्द ॥३॥

भजन कालगढ़ा

कह मन जुगलचरण अनुराग ॥
 बहुत दिवस तोहिं सोवत वीते, जाग रे मूरख जाग ॥
 बेमुखियन की संगति सों तू, जैसे बन त्यों भाग ॥
 उनको साथ सदा दुखदाई, जिमि ढिग कारे नाग ॥
 है नैरी पुनि मोत हूँ मारें, मृगको बरुवा राग ॥
 या विधि तोहिं विष दुख देंगे, चेत रे मन्द अभाग ॥
 बस वृन्दावन भज राधावर, भूलिके अन्त न लाग ॥
 नारायण बनि जायगी तेरी, अब तू भ्रमना त्याग ॥४॥

राग काफो

मन चेतु नहीं पछितावंगो ॥
 भजिले रे श्रीनन्दनन्दनको, जो तोहि पार लगावंगो ॥
 झूठ सांचके ब्यौहारन सों, कहूँ ललि द्रव्य कमावंगो ॥
 निशि बासर याही चितामें, रो रोके मरि जावंगो ॥
 जिनके काज अनोति करत तू, काउ काम नहि आवंगो ॥
 जब यमदूत तोहि पकरेंगे, तब न कछू बस्यावंगो ॥
 नारायण तेरी-मेरी में, योंहीं उमरि गमावंगो ॥
 अन्त समय ढिग आय गयो अब, फिरि कब हरिगुण गावंगो ॥५॥

राग कालिगढ़ा

मूरख छाँडु वृथा अभिमान ॥
 औसर बीति चलयो है तेरो, द्व दिन को मेहमान ॥
 भूप अनेक भये पृथ्वी पै, रूप-तेज-बलवान ॥
 कौन बचे या काल ब्याल तें, मिटि गये नाम निशान ॥
 धवल धाम धन गज रथ सेना, नारी चंद्र समान ॥
 अंत समय सबही को तजिकें, जाय बसे शमशान ॥

तजि सतसंग भ्रमत विषयनमें, जाविधि मरकट श्वान ॥
छिनि भरि बैठि न सुमिरन कीनो, जासों होय कल्याण ॥
रे मन मूढ़ अन्त जिन भटकैं, मेरो कह्यो अब मान ॥
नारायण ब्रजराजकुंवर सों, बेगि करहु पहचान ॥६॥

राग सोरठा धीमाताल

टेर सुनो ब्रजराज दुलारे ॥
दीन मलीन होन शुभ गुण सों, आय परचो हूँ द्वार तिहारे ॥
काम क्रोध अति कपट लोभ मद, सोइ माने निज प्रीतम प्यारे ॥
भ्रमत रह्यो इन सँग विषयन में, तो पदकमल न मैं उर धारे ॥
कौन कुरुमं किये नहिं मैंने, जो गये भूलि सो लिये उधारे ॥
यहाँ लों खेप भरी रचिपचि के, चकित रहें लखिकें बनजारे ॥
अब तौ एकबेर कहौ हँसि कैं, आजही सों तुम भये हमारे ॥
याही कृपाते नारायण की, बेगि लगेगी नाव किनारे ॥७॥

राग कालिगड़ा धीमाताल

गोविन्द गोविन्द गोविन्द भज रे ॥
आदि अनन्त सार निगमागम, जाहि नवत सुरनर मुनि अज रे ॥
दंभ कपट कामादि मान मद, इन बैरिनको तुरतहि तज रे ॥
नारायण मन करु सतसंगति, काल ब्यालते निर्भय गज रे ॥८॥

राग बिहारी धीमाताल

करु मन नन्दनंदन को ध्यान ॥
यह अवसर तोहि फिरि न मिलंगो, मेरो कह्यो अब मान ॥
घूंघरवारी अलकें मुखपर, कुण्डल झलकत कान ॥
नारायण अलसाने नैना, भ्रमत रूपनिधान ॥९॥

राग कालिगड़ा तीनताल

भज मन श्रीराधा गोपाल ॥
गोल कपोल अधर बिबाफल, लोचन परम विशाल ॥

शुक नासा भौं दूज चन्द्र सम, अति सुन्दर हैं भाल ॥
 मुकुट चन्द्रिका शीश लसत है, घुंघरारे बर बाल ॥
 रतन जटित कुण्डल कर कंकण, गल मुतियनकी माल ॥
 पग नूपुर मणिखचित बजत जब, चलत हँसगति चाल ॥
 गौर श्याम तन बसन अमोलिक, कर महँदी सों लाल ॥
 मृदु मुसिक्यान मनोहर चितवन, बोलन अधिक रसाल ॥
 कुंज भवनमें बंठे दोऊ जन, गावत अद्भुत खयाल ॥
 नारायण या छबिको निरखत, पुनि पुनि होत निहाल ॥१०॥

कवित्त

चाहे योग करि भ्रुकुटी के मध्य ध्यान धरि,
 चाहे नाम रूप मिथ्या जानिके निहारलै ॥
 निर्गुण निर्भय निराकार ज्योति व्याप रह्यो,
 ऐसो तत्त्वज्ञान निज मनमें तू धारलै ॥
 नारायण अपने को आपही बखान करि,
 मोते वह भिन्न नहीं याविधि पुकारलै ॥
 जौलौं तोहि नन्दको कुनार नहि दृष्टि परं,
 तौलौं तू भले बंठि ब्रह्मको विचारलै ॥११॥

इति श्रीपद्मसिद्धान्त समाप्त



अथ बधाई के भजन

भूषव सारङ्ग

आजतौ बधाई माई भवन बाजि रहो,
 महाराज दशरथ गृह प्रगटे सुखधाम ॥
 रनवासे अति आनन्द, निरखि बदन अवधचन्द,
 पुनि पुनि उर लावत, सुख पावत सब वाम ॥

पुरजन मन अति उमंग, जहां तहां हूँ रागरंग,
देत ना प्रतीत बीत जात अष्टयाम ॥
विप्र करत वेदगान, पावत सनमान दान,
नारायण लोगन के पूरन भये काम ॥१॥

जंगले का जिला

आज अबधपुरी आनन्द छायो ॥
घर घर मंगलाचार बधाई, कौशल्या रानी सुत जायो ॥
शुभ नक्षत्र पुनर्वसु नीमी, चंद्रमास सब भाँति सुहायो ॥
शौमवार बर मध्य दिवसके, श्रीरघुवीर जनम तब पायो ॥
निगमागम जाकी महिमाको, गावत गावत पार न पायो ॥
सो महाराज काज भक्तनके, नृप दशरथको कुंवर कहायो ॥
जाके दरशन को सुर तरसें, ताहि धाय लै कण्ठ लगायो ॥
नारायण अपनो भक्ती को, जगमें प्रगट प्रभाव दिखायो ॥२॥

बधाई जंगले का जिला

आज महरि घर देउ रो बधाई ॥
शुभ लक्षण सुन्दर सुत जायो, बड़ भागिनि है यशुमति माई ॥
वृद्ध वधू सब जुरि मिलि आई, यथायोग्य कुलरीति कराई ॥
दान मान विप्रन को दीनो, मणि मुक्ता पट भूषणताई ॥
मृगनयनी कल कोकिलवयनी, करि श्रृङ्गार बैठी अँगनाई ॥
लँ लँ नाम नन्द यशुमति को, गावत गारी परम सुहाई ॥
ध्वज पताक तोरण मणिमाला, द्वारन बन्दनवार बंधाई ॥
नारायण ब्रज आनन्द छायो, प्रगट भये जहाँ कुंवर कन्हाई ॥३॥

बधाई राम श्रुपद

धन्य धन्य तू है रानी कियो उपकार घनो,
ऐसो सुत जायो जासों जगतहू तरंगौ ॥

जाको मुख निरखत ही दूर होत कालरोग,
 कौतुक करि गिरिवर निज कर पै लं धरंगो ॥
 पूतना प्रलम्ब तुणावतं केशि कंस आदि,
 महावीर असुरन के प्राणन (लं) हरंगो ॥
 नारायण ऐसे कछु परे हैं नक्षत्र याके,
 सुरपति को गर्व छिन में दूरि सब करंगो ॥४॥

बधाई राग सहाजी

देखि चरित मोहि अचरज आवैं ॥
 जो कर्ता जगपालक हर्ता, सो अब नंदको लाल कहावैं ॥
 बिन कर चरण श्रवण नासा दृग, नेति नेति जाको श्रुति गावैं ॥
 ताकूं पकरि महारि अंगुरी तें, आंगन में चलिबो सिखरावैं ॥
 ब्रह्म अनादि अलक्ष अगोचर, ज्योति अजन्म अनंत कहावैं ॥
 सो शशिवदन सदन शोभा को, नंदरानी निज गोद खिलावैं ॥
 जाके डर डोलत नभ धरनी, काल कराल सदा भय पावैं ॥
 सो व्रजराज आज जननी की, भौंह चढ़ी को निरख डरावैं ॥
 जाके सुमिरन ते जीवन को, भवबंधन छिन में छुटि जावैं ॥
 सोई आज बंध्यो उखल ते, निरखन को सिगरो ब्रज धावैं ॥
 पूरणकाम क्षीरसागर पति, मांगि मांगि बधि माखन खावैं ॥
 भक्ताधीन सदा नारायण, प्रेम की महिमा प्रगट दिखावैं ॥

इति श्रीबधाई के भजन सम्पूर्ण

❀ अथ स्तुति यमलार्जुन की ❀

गीतिका छंद—

पारब्रह्म परमेश्वर अवगति, भवन चतुर्दश नाथ हरी ॥
 जब जब भीर परी संतन पै, प्रगट होय प्रतिपाल करी ॥

आदि अन्त सब के तुम स्वामी, ब्रह्मादिक अनुगामी ।
 कृष्ण नमामि नमामि नमामी, दयासिन्धु अन्तर यामी ॥
 जाको ध्यान धरत योगी जन, शेष पती नित नाम नये ।
 सो भवतारन दुष्टनिवारण, संतन कारण प्रगट भये ॥
 जिनको नाम सुनत यम डरपत, थरथर काँपत काल हियो ।
 तिनको पकरि नन्द की रानी, ऊखलसों लै बाँधि दियो ॥
 जे दुखमोचन पंकजलोचन, उपमा जाय न कहत बनी ।
 जे सुखसागर सब गुणआगर, शोभा अंग अनंग घनी ॥
 नारदको हम अति गुण माने, शाप नहीं वरदान दियो ॥
 जा कारण ते प्रभु आपने, दर्शन दियो सनाथ कियो ॥
 जो हरह के ध्यान न आवत, अपर अमर हैं किहि लेखे ॥
 सो हरि प्रगट नन्दके आँगन, ऊखल संग बँधे देखे ॥
 जिनकी पदरज को सुर तरसैं, अगम अगोचर दनुजारी ॥
 त्राहि त्राहि प्रणतारत भंजन, जन मन रंजन सुखकारी ॥
 तुमरी माया जीव भुलानो, किहि बिधि नाथ तुमें जानें ॥
 तुमही कृपा करौ जब स्वामी, तबही तुमको पहिचानें ॥
 हे मुकुन्द मधुसूदन श्रीपति, कृपानिवास कृपा कीज ॥
 इन चरणन में सदा रहै मन, यह वरदान हमें दीज ॥
 जे केशव जे अधम उधारण, दयासिन्धु हरि नित्य मगन ॥
 जे सुन्दर ब्रजराज शशीमुख, सदा बसो मम हृदय गगन ॥
 रसना नित तुम्हरे गुण गावैं, श्रवण कथा सुनि मोद भरैं ॥
 कर नित करैं तुम्हारी सेवा, नैन सन्त जन दरश करैं ॥
 नेम धर्म व्रत जप तप संयम, योग यज्ञ आचार करैं ॥
 नारायण बिन भक्ति न रीझौ, वेद संत सब साख भरैं ॥१३॥

इति श्रीयमलार्जुन की स्तुति समाप्त

अथ माखनचोर-लीला प्रारम्भ

(समाजी वचन)

दोहा—नारायण इक व्रजवधू, चली न्हायबे प्रात ।
 ढिंग की सखी बुलायके, कही तासु यह बात ॥१॥
 बोर यहां पै तनक तू, बैठि चौकसी काज ।
 मेरे घर आवे नहीं, चोरन को शिरताज ॥२॥

राग कालिगड़ा

यमुना न्हात चली व्रजगोरी ॥
 सजनी एक चौकसी कारन, बंठारी निज घर की पौरी ॥
 ताके भवन धंसे मनमोहन, कियो चहत माखनकी चोरी ॥
 रूप ठगौरी डारि सखीपै, आप गये जहाँ धरी कमोरी ॥
 कछु खायो कछु भूमि गिरायो, आंगन माँहि मटुकिया फोरी ॥
 नारायण या बिधि कुचाल करि, भाजि गये निधिवनकी खोरी ॥३॥
 दोहा—जब द्वारे आई सखी, छोक भई ततकाल ।
 पुनि आंगनमें जायके, देखी अधिक कुचाल ॥४॥

* सखी वचन सखी प्रति परस्पर *

राग कालिगड़ा

किन मेरो माखन बिखरायो ॥
 फूटा परी मटुकिया आंगन, कहा भयो भीतर को आयो ॥
 मैं निज हितू जानिकें तोकों, रखवारी करिबे बंठायौ ॥
 अरी भद्र तुमहूँ रही सोवत, भलो चोरते भवन रखायो ॥
 आवत छोक भई मो सन्मुख, उन अपनो फल प्रगट दिखायो ॥
 नारायण तैं प्रेमिनि बनिके, मेरो घर सबरो लुटवायो ॥५॥

❀ सखी को उत्तर ❀

राग आसावरी

बाकी चौकसी कैसे कहूँ मैं, ना जानूँ कितसों वह आवे ॥
अचक अचक पग धरत द्वार पे, नूपुर की धुनि होन न पावे ॥
उझकि उझकि इत उतमें झाँकिके, फिर सैनन निज सखा बुलावे ॥
छोंके धरी कमोरी माखन, अँगुरीसों पुनि तिन्हें बतावे ॥
वस्तु चोर हो तार्कूँ पकरे, चाहै जितौ बलवान कहावे ॥
नारायण वा चितके चोरसों, काहू की न कछू बसियावे ॥६॥

❀ पुनि सखी वचन ❀

दोहा—तोहि चतुर जानूँ जबी, चोर न जावे भाज ।
हाथ पकरि पुनि लैचलें, यशुमतिके ढिंग आज ॥७॥

❀ समाजी वचन ❀

दोहा—कुलदेवी पूजन चलीं, इतनी कहि व्रजनार ।
पुनि ताके घरमें गये, चोरन के सरदार ॥८॥
झट किंवार की ओटते, निकसि नवेली बाल ।
लपकि झपकि निज अंक भरि, पकरि लिये गोपाल ॥९॥

❀ सखी वचन लालजी प्रति ❀

राग भैरव

मोहन अब कित भाजिके जैहौ ॥
बहुत अनीति करौ तुम व्रजमें, आज सबी फल पैहौ ॥
राखूँगे तोहि पकरि भवनमें, कौन सहाय बुलैहौ ॥
चंचल चपल चोर चूड़ागणि, पुनि माखन न चुरैहौ ॥
नाच गाय कछु करौ वीनती, गहरी भेट चढ़ैहौ ॥
नारायण जबही छुडीगे, फिर नहिं टेढ़े बतरैहौ ॥१०॥

* लालजी वचन सखी प्रति *

राग कालिगढ़ा

सखी मोहि चोर चोर मति भाख ॥
 तुही कहै मेरी दधि नीकी, तनक श्याम लै चाख ॥
 निशि दिन मेरे नन्द बबा घर, तोसी आवत लाख ॥
 मैं चोरीको नाम न जानूं, बूझि ले मेरी साख ॥
 मोहि कहा तेरे गोरस सी, चाहे गैलमें नाख ॥
 नारायण जो हमें देय तू, सो अपने घर राख ॥११॥

* सखी वचन लालजी प्रति *

राग मट

अब तूम कहां जावोगे भाज ॥
 चोरी करत फिरत नित घर घर, तनक न आवत लाज ॥
 बांधूंगी मैं हाथ तिहारे, भले मिले हौं आज ॥
 नारायण निज भवन होयगो, नन्दरायको राज ॥१२॥

बालिक

यों कहुके सखी श्रीलालजीके हाथ बांधवे लगी, तब लालजी बोले—अरी ! तोहि हाथ बांधबौऊ नहिं आवं, देख हम तोहि सिखावें ॥१३॥

दोहा—छल छली छल कपटसों, बांधि सखीके हाथ ।
 माखन ताहि दिखायके, जेवत ग्वालन साथ ॥१४॥

गिरितनया कूं पूजिके, घर आई ब्रजनार ।
 मगन भई निज हीय में, कौतुक नयो निहार ॥१५॥

❁ सखी वचन लालजी प्रति ❁

राग कालिंगदा

आज यहां कैसे तुम आये ॥

सूने भवन धंसत नहि डरपत, ऐसे निडर कौन के जाये ॥

छींके सो मटकी उतारते, नेक नहीं मनमें सकुचाये ॥

भले सपूत भये निज कुलमें, लाज शरम के खोज मिटाये ॥

काहेकों यह ग्वाल बाल सब, ओर पास तुमने बँठाये ॥

नारायण याही विधि घर घर, जँवत हो नित माल पराये ॥१६॥

❁ लालजी वचन ❁

राग लम्माच

मैं कहा कहूँ कष्ट कही न जावँ ॥

ऐसो समौ कबू नहि देखयो, कीजँ भलौ बुराई आवँ ॥

तो छींके इक चढ़ी बिलैया, माखन मटकी भूमि गिरावँ ॥

ताहि बिडारि करुं रखवारी, याहूपै मोहि दोष लगावँ ॥

यही समझके सखा बुलाये, मति कहूँ ग्वालिन फल मचावँ ॥

नारायण यह साख भरेंगे, घर बुलायके चोर बनावँ ॥१७॥

भारिक

यह वचन रसीले सुनिके सखी मुसक्याय गई, अरु शोभा-
धामकी शोभा निरखिके बोली, बलिहार या चतुराई पै, तब
आप बोले अरी सखी ! घबरावँ क्यों है अभी तौ कई बेर
बलिहार होयगी ॥१८॥

दोहा—नारायण मैं सत्य कहूँ, बिना कपट छलछंद ।

ये लीला जो नित पढ़ै, पावँ परमानन्द ॥१९॥

इति श्रीमाखनचोर लीला श्रीनारायण स्वामीजीकृत समाप्त ॥१॥

अथ उराहजो लीला प्रारम्भ

* समाजी वचन *

दोहा—विधू वदन शोभा घनी, मृगनैनी वरबाम ।
 सहजहि नन्द भवन गई, देखन सुन्दरश्याम ॥१॥
 निरखि रूप अति मुदित मन, घर आई व्रजनारि ।
 अपर सखी बूझन लगी, याकी दशा निहारि ॥२॥
 अरी सखी तू प्रातसों, नहि भाषत मुख बैन ।
 कियो न कछु शृङ्गार तन, दियो न काजर नैन ॥३॥

* उत्तर सखी को सखी प्रति *

राग सिन्दूरा

एरी मैं तो सहज सुभाव गई नन्दजू के, तहां देख्यो सुख और ॥
 इकले श्याम नई सज-धज सों, ठाड़े भवन को पौर ॥
 रतन शृङ्गार बहार हंसन की, माथे केशर खौर ॥
 नारायण सो छबि दृग छाई, रही न काजर ठौर ॥४॥

वात्तिक

यह सुनिके सखी आपस में कहन लगीं ॥५॥

राग परज

अब नन्दभवन में चलौ री वीर ॥
 सांवरे कन्हाई बिन कल न परत,
 घरी पल छिन मन न धरत है धीर ॥
 दृग अति अकुलावें, नहि पलक लगावें,
 पुनि उतही को धावें परी इनपं भीर ॥
 तन सुरत बिसारी, लगी चटपटी भारी,
 नारायण हमारी, को जानत पीर ॥७॥

बोहा—जुरि मिलकें पुनि सब गई, नवगोरी ब्रजबाल ।
मिस उराहनो करि सुघर, निरखत मोहनलाल ॥७॥

❀ सखी वचन यशोदा प्रति ❀

राग सम्भाव का जिला

हमारी पुकार सुनो नन्दरानी ॥
तेरो छैल गैल नित रोकें, नयो भयौ दधि दानी ॥
और कुचाल करत जो हमसों, सो हम कहत लजानी ॥
नारायण ताकूं तुम बरजो, बोलत अटपटि बानी ॥८॥

❀ अपर सखी वचन यशोदा प्रति ❀

राग जोगिया आसावरी

हमारो न्याव करौ महतारी ॥
या ब्रजमें प्रगट्यो उतपाती, तेरो छैल विहारी ॥
बिना बात हमसों नित अटकें, ढीठ बड़ो है भारी ॥
अचरा झटक पटक शिर गागरि, पुनि ठाढ़ो दे गारी ॥
तुम बाको घरमें नहि बरजति, कुलकी रीति बिगारी ॥
नारायण कछु जान परत है, एक सलाह तिहारी ॥९॥

❀ अपर सखी वचन यशोदा प्रति ❀

ब्रज में कंसे बसैं री माई ॥
जहाँ नित प्रति उत्पात करत है, तेरो कुँवर कन्हारी ॥
भोर ही मैं सोवत अँगना में, अचकहि आय जगारी ॥
उठ री सखी तोहि द्वारे पं, ढेरत कोउ लुगारी ॥
मैं तो द्वार पं देखिबे निकसी, कोहै कहाँ ते आई ॥
पीछे ते इन घर भीतर सों, सांकर तुरत लगाई ॥

मैं बाहर ये भवनमाहिं मन,—मानत धूम मचाई ॥
 बासन फोरि तोरि सब छोके, दधि गोरस ढरकाई ॥
 यह कौतुक सुनिके व्रजवनिता, निरखन को सब धाई ॥
 हँसि हँसि के मिलि बूझत मोसों, कहा लीला फँलाई ॥
 भाँति भाँति की बोली बोलत, जो जाके मन भाई ॥
 मैं अपने मन कहूँ नारायण, यह कहा कुमति कमाई ॥१०॥

* यशोदा वचन *

राग टोड़ी जीनपुरी

ग्वालिन झूठ उराहनो लाई ॥
 कब तेरे घर गयो साँवरो, कब गोरस ढरकाई ॥
 याही मिस मेरे मोहन को, तू अब देखन आई ॥
 नारायण तेरे मन की मैं, जानि गई चतुराई ॥११॥

* सखी वचन यशोदा प्रति *

राग बिलावल

यशुमति तेरी भली बनि आई ॥
 पूत सपूत प्रगट भयो जाको, नित उठ करत कमाई ॥
 भूषण चीर चुराय हमारे, मानत अधिक बड़ाई ॥
 घर में लाय तोहि पहरावत, भलौ कुंवर सुखदाई ॥
 घाट बाट नित माँगत डोलें, निज कुल रीति मिटाई ॥
 नारायण सोई करं कौतुक, जो तैं पट्टी पढ़ाई ॥१२॥

* यशोदा वचन सखी प्रति *

राग टोड़ी जीनपुरी

ग्वालिन रूप के मव इतरावें ॥
 तू अति तरुण मेरो सुत बालक, नाहक दोष लगावें ॥

तुही नई भई जोबनवारी, नेक लाज नहि आवै ॥
नारायण अब जा घर अपने, क्यों तू बात बनावै ॥१३॥

❀ सखी वचन यशोदा प्रति ❀

राम कालिगड़ा

बजरानी तैंने भलौ सुत जायो ॥
घर बाहर नित अटकत हमसों, करत जो जिय में भायो ॥
मेरे भवनमें आय अचानक, निज पट आप दुरायो ॥
द्वार निकसि कहि याही चोरटी, मेरो बसन चुरायो ॥
पार परोसिन देखि हँसैं सब, मो मन अति सकुचायो ॥
नारायण तुमहीं रहौ ब्रजमें, हम बसिबो भरि पायो ॥१४॥

❀ यशोदा वचन सखी प्रति ❀

राम लम्माचका जिला

मेरे सुत पोछे क्यों परीं ब्रजनारियां ॥
कोऊ तो नचावै, कोऊ चोर लै बनावै,
नित झूठ ही लगावै, दोष देतें मिल गारियां ॥
दौरी दौरी आवो, नहि नेक सकुचावो,
तुम रूप गरबीली, बड़े गोपकी कुमारियां ॥
कहां मेरो लाल, कहां तुम नारायण,
अचरज आवै बातें सुनिके तिहारियां ॥१५॥

❀ सखी वचन ❀

दोहा—नंदरानी तू धन्य है, धन्य तिहारो लाल ।
हमहूँ ब्रज में धन्य हैं, जो नित सहें कुचाल ॥१६॥

भारतिक

भलौ न्याव कियो ।

* नन्दरानी को वचन लालजी प्रति *

राग खम्माच

मोहन तू इतनी कही मान ॥
 बाहर मति उरझै काहू सों, मेरे जीवनप्रान ॥
 ब्रजवनिता तेरे गुन मोसों, नितप्रति करत बखान ॥
 मेरो कह्यो तू सांच न माने, सुनि लै अपने कान ॥
 इन बातन सों निंदा उपजे, ठकुरायत में हान ॥
 नारायण सुत बड़े बापके, तजि दै ऐसी बान ॥१७॥

* लालजी वचन मैया प्रति *

राग झंझोटी तीनताल

जननी तू इनकी मति माने ॥
 जाविध तू होवै रिस मोपे, सो यह कौतुक ठाने ॥
 धोखे सों मोहि निकट बोलके, उर लगाय लियो याने ॥
 जबही अचक आय पीछेतें, मुख चूमन कियो वाने ॥
 खंजन हृग चंचल चपला सी, अजहुँ कुटिल भौं ताने ॥
 नारायण जैसी वे आप हैं, तँसो और को जाने ॥१८॥

* यशोदा वचन लालजी प्रति *

दोहा—लाल कुचाल न तजत तू, समझायो बहुबार ।
 चोर कहावे आपको, हूँकै राजकुमार ॥१९॥

* लालजी वचन मैया प्रति *

राग झंझोटी तीनताल

मैया यह झूठही दोष लगावै ॥
 बूझलै मेरे सखा संगके, जो तोहि सांच न आवै ॥

भवन रहूँ तौ तुही कहैगी, गौ चारन नहिं जावँ ॥
 जो जाऊं तौ यह मग छेड़ें, फेर उराहनौ लावँ ॥
 त्रिया चरित्र रचै ढिंग तेरे, तोरके हार दिखावँ ॥
 तू जननी मेरी अति भोरी, याके कहे पतिआवँ ॥
 कित गजराज कहां मृग छौना, अनगढ़ मेल मिलावँ ॥
 नारायण मोहन मुख बातें, सुनि यशुमति मुसिवयावँ ॥२०॥

❀ यशोदाजी वचन सखी प्रति ❀

राग मल्हार

देत उराहनो लाज न आई ॥
 मेरो लाल ब्रज भरमें भोरो, नेक नहीं जानत चतुराई ॥
 सुनि यशुमतिके वचन हँसीं सब, निज निज भवन चलीं हरषाई ॥
 नारायण लखि चरित श्याम के, ब्रह्मादिक की मति बौराई ॥२१॥
 दोहा—नारायण जो प्रीति सों, यह लीला सुनि लेत ।
 ताको सुन्दर सांवरो, धाम आपनो देत ॥२२॥

इति श्रीउराहनो लीला श्रीनारायण स्वामीकी कृत समाप्त ॥२॥

अथ आँखमिचौनी-लीला प्रारम्भ

❀ लालजी को वचन ❀

राग लट —

हलधर के कांधे पै कर धर यों बोले गोपाल ॥
 बलदाऊ मेरो कही मानो, ढेर लेउ सब ग्वाल ॥
 गोबर्द्धन की सुनग तरहटी, सघन कदम्ब तमाल ॥
 कुहकत मोर भूमि हरियाली, भरे मधुर जल ताल ॥
 रुचिसों तहाँ चरैगी गध्या, देंगी दूध विशाल ॥
 नारायण इत हम तुम खेलें, आँखमिचौनी ख्याल ॥१॥

* दाऊजी के वचन *

राग भैरवी

यह बात भली कही लाल ॥
 आवो रे मिल सखा हमारे, गायन के चरवाल ॥
 निज निज धेनु लिवाय चली अब, जहाँ कहत गोपाल ॥
 नारायण हलधर के मुखसों, सुन हरषे सब ग्वाल ॥२॥

वार्तिक

सखा आपस में बोले—अरे भैया ! यह सलाह कन्हैया ने
 अच्छी बताई, वेग चलौ, फिर वा ठौरप जायके गैया तो चरबे
 छोड़ बई और आप सब मिलके आंखमिचौनी खेलबे लगे ॥३॥

(समाजी वचन)

राग कालिगढ़ा

आंखमिचौनी खेलें दोऊ भाई ॥
 भाजत में बाजत पग नूपुर, मुख पर श्रम बिन्दू छवि छाई ॥
 खेलत सखा परस्पर पकरत, हलधर के जिय में कष्टु आई ॥
 बेरिबेरि हरिही को छूवत, निज मन खीजत कुंवर कन्हआई ॥
 रिस ह्वं के पुनि गये मात डिंग, अंसुवन भरि सब बात सुनाई ॥
 नारायण मोसों बल भैया, राखत आंठ ये कौन भलाई ॥४॥

* यशोदाजी वचन लालजी प्रति *

राग आसावरी

तुम उदास जिन होवो लाला खेलौ याही ठौर ॥
 हलधर को घर घसन न दूंगी, ढीठन को शिरमौर ॥
 तेरे काज मनोहर गैया, आज लई है और ॥
 नारायण चलि तोहि दिखाऊं, बंधी भीतरी पौर ॥५॥

वाक्यिक

ये वचन जननी मुख सुन के अति उमंग सों लालजी मैया की अँगुरी पकड़ जब पौरी में जाय कें गैया कूं देख्यौ—तब आप बोले—अरी मैया ! गैया तो बड़ी सुन्दर है और दूध भी घनों देयगी । तब जननी लाल को मुख चूम कें बोली—अरे लाला ! बाबा ने तेरे ही लिये मँगवाई है, दाऊ को यामें कछु साझो नहीं, तब आप बोले—याको नेक सो दूध दाऊ को भी दियो करेंगे—तब नन्दरानी हँस कें बोली—लाला ! तेरी राजी ॥६॥

दोहा—ताही छिन श्रीनन्दजू, आये भवन मंझार ।
निज गोदी ले लाल कूं, बाढ्यो हरष अपार ॥७॥
लीला पूरण ब्रह्म की, भक्त जनन के प्राण ।
नारायण जे दुष्टजन, करें तर्कना आन ॥८॥

इति श्रीजैलमिचौनी लीला श्रीनारायण स्वामीजी कृत समाप्त ॥३॥



अथ श्रीलालजी की उत्थापन लीला

❀ यशोदा वचन ❀

राग रामकली

लालन अब भोर भयो, जागो बलिहारी ॥
घर घर उठि दधि बिलोवें, ब्रज की नवनारी ॥
मैं तिहारे काज रखी, लौनी घर न्यारी ॥
नारायण वनकूं चलीं, धेनु हू हमारी ॥९॥

(समाजी वचन)

राग सट

एक सखी उठि बड़े भोर ही, नन्दराय के भवन गई ॥
 ताही समय जगे मनपोहन, आलसवश मुख कांति नई ॥
 नैन उनींदे झूमत पलकें, शिथिल वचन अति मोद मई ॥
 नारायण यह छबि लखि ग्वालिन, मनो भीतको चित्र भई ॥२॥

* सखी वचन नवगोपवधू प्रति *

ध्रुपद राग भैरों

आज सखी प्रातकाल, दृग मीड़त जगे लाल,
 रूप के विशाल, सिन्धु गुणन के जहाज ॥
 कुंडलसों उरझी माल, मुखपर अलकनको जाल,
 भई मैं निहाल, निरखि शोभा को समाज ॥
 आलस वश झुकत ग्रीव, कबहूँ अंगड़ाई लेत,
 उपमा सम देत, मोहि आवत है लाज ॥
 नारायण यशुमति ढिग, हौं तो गई बात कहन,
 याही में भये री, एक पंथ दोऊ काज ॥३॥

वातिक

नवगोपवधू बोली हे सखी ! उनकूँ देखिके मेरे नेत्र कब
 सफल होयेगे ? थोरी देर पीछे लालजी हू बाहर पधारे ॥४॥

(समाजी वचन)

राग कालिगड़ा

भवन ते निकसे नन्दकुमार ॥
 पचरंगी चीरा शिर सोहै, चितवनप बलिहार ॥
 कानन में मुतियन को चौकड़ा, गल फूलनको हार ॥
 नारायण जे आपही सुन्दर, तिनकूँ कहा शृङ्गार ॥५॥

ॐ समाजी वचन ॐ

दोहा—गोपवधू के भवन ढिंग, जब आये गोपाल ।
तब बोली निज सखी सों, गोपवधूटी बाल ॥६॥

ॐ गोपवधू वचन ॐ

राग खट

देख सखी नव छल छबीलौ, प्रात समय इत सों को आवै ॥
कमल समान बड़ें दृग जाके, श्याम सलोनी मृदु मुसक्यावै ॥
जाकी सुन्दरता जग बरनत, मुख शोभा लखि चन्द्र लजावै ॥
नारायण यह किधौ वही है, जो यशुमति को कुंवर कहावै ॥७॥

ॐ सखी वचन ॐ

राग विभास

यही मोहन निज मोही व्रजबाला ॥
गजगति चलत बजत पग नूपुर, उर सोहै वनमाला ॥
कमल फिरावत मृदु मुसक्यावत, बोलत वचन रसाला ॥
श्यामवरण लखि लजत नीलमणि, पंकज मेघ तमाला ॥
नन सैन करि हरत मन मन, मुखद्युति चन्द्र विशाला ॥
नारायण प्रगटघो जादूगर, नन्दराय को लाला ॥८॥

ॐ मखी वचन लालजी प्रति ॐ

दोहा—मुनो लाल इक वृजवधू, धरत तिहारो ध्यान ।
ताहि तनक दीजं दरश, निजदासी कर जान ॥९॥

वार्तिक

जब श्रीलालजी वा गोपवधू के ढिंग जाय के बतरायबे लगे, ताही समय वाने अपनी सासकू आवतो देख्यो, तब इत

सों लाजहू प्रगट हो आई, सखी तो लाज के आधीन हूँ गई,
बाकी सास निकट आय के इनसों कहबे लगी क्यों रे नन्द के !
हमारे घर क्यों आयो है ? तब आप बोले—अरी ! हमारी
पतंग टूटि के आय परी है ताय लंबे आये हैं, ऐसे बात बनाय
के निज भवन में चले आये, ता पीछे गोपवधू अति व्याकुल
होय के सखी सों कहिबे लगी ॥१०॥

ध्रुपद राग भंरों

आज सखी प्रात काल, मेरे गृह आये लाल,
भई मैं निहाल बाके, रूप को निहार री ॥
पूरण शशि सम कपोल, तिनपै कुंडल किलोल,
मधुर मधुर सुनिके बोल, रही ना सम्हार री ॥
नाकमें बुलाके सोहै, चितवन चितही को मोहै,
अद्भुत शृंगार चरण, नूपुर झनकार री ॥
नारायण हौं तो उठी, मिलन इतसों आई लाज,
मन की मनही में रही, कर न सकी प्यार री ॥११॥

वातिक

हे सखी ! अब तू कछु ऐसा उपाय बताय जासों वा
चितचोर सांवरे कू देखू ॥१२॥

राग सम्माय का जिला

सांवरे के देखे बिन परत न चैन ॥
छिन छिन मन अकुलात सखी री, रूप के प्यासे नैन ॥
वह शोभा वह मन्द हँसन वर, वह तिरछी दृग सैन ॥
नारायण करि गयो बावरी, मधुर सुनाय के बैन ॥१३॥

वातिक

तब वा सखी ने एक उपाय बतायो कि, या मिस यशुमति
गृह जाय के प्राणप्यारे को निरखि आ ॥१४॥

❀ समाजी वचन ❀

दोहा—मिस बनाय के ब्रजबधू, गई यशोमति तीर ।
निरखि लालको सुख भयो, मिटी विरहको पीर ॥१५॥

❀ गोपवधू वचन यशोदा प्रति ❀

राग कालिगढ़ा

रानी मैं कछु बूझिबे आई ॥
प्रात समय काहू के मुख ते, अचरज सों चरचा सुनि पाई ॥
तो मैं कहूँ जो तू सुनिके पुनि, निज मन बिलग न मानै माई ॥
हूँ बापनको सुत भयो कैसे, तेरो छबिनिधि कुर्वर कन्हारी ॥
हँसि बोली यशुमति सुनि बहना, तुमही जानत यह चतुराई ॥
नारायण याही मिस ग्वालिन, निरखत नन्दनँदन सुखदाई ॥१६॥
दोहा—ये लीला गोपाल की, जो गावे दिन रैन ।
अन्त समय सद्गति मिले, जीवत पावे चैन ॥१७॥

इति श्रीलालजी की उत्थापन लीला श्रीनारायण स्वामीजीकृत समाप्त ॥४॥

—*—*—*—*—*—

अथ पनघट-लीला प्रारम्भ

❀ समाजी वचन ❀

दोहा—पनघट की लीला नई, कहूँ प्रेम सों गाय ।
नारायण जे रसिकजन, श्रवण करें चित लाय ॥१॥
निज निज घट लै ब्रजबधू, गई लाड़िली पास ।
यमुना जल भरिबे चलो, लली रूप की रास ॥२॥

वार्तिक

तब श्रीजी ने कही हे सखी ! हमने अबई काहू के मुख ते सुनी है कि, वहाँ तौ लालजी महाराज ठाढ़े हैं ॥३॥

* पुनि श्रीजी वचन सखी प्रति *

राग देश सोरठ

कैसे जाऊं री बीर, घट भरिबे नीर, ठाढ़ो यमुना तीर,
 सामरौ अहीर, मारै हृगन तीर, हरै सुधि शरीर ॥
 नित यही चित में चिंता समाज, व्रजराज सों कैसे बचंगी लाज,
 जिया कांपे आज, नहिं धरत धीर ॥
 वाको रूप है के कोऊ जादू यंत्र, कैधौं नारायण वशीकरण मंत्र,
 कैधौं तंत्र के, पलही में करै फकीर ॥४॥

* सखी वचन श्रीजी प्रति *

वातिक

सखी बोली—हे प्यारी ! आप तो पहले ही सों इतनी डरपो
 हो, पधारो तो सही ॥५॥

* समाजी वचन *

राग छट—

प्रात समय व्रजनारि सकल मिल, घट यमुना जल भरन चली ॥
 ओरपास तारागण सजनी, बीच चंद मुख भानु लली ॥
 पग नूपुर कटि किंकिनि बाजं, पूरि रही धुनि कुंज गली ॥
 इतउत तकत चलत नारायण, आय न जावै कहूँ श्याम छली ॥६॥

* सखी वचन सखी प्रति *

राग भैरों एकताल

देख सखी नंदलाल, सन्मुख ते आवै ॥
 संग सखा भीर लिये, बांसुरी बजावै ॥
 आज याहि समझौ मिल, भलें लाज जावै ॥
 नारायण नितप्रति कौ, जगरो नहिं भावै ॥७॥

❀ लालजी वचन सखी प्रति ❀

राग मलार—

ठाड़ी रहौ व्रजनारि सुन्दर बर ॥
 रूप की घटा छटा नई छबि की,
 जाहि देखि मोहैं नारी नर ॥
 अति चंचल दृग मान लजत लखि,
 कानन में सोहै मुतियन लर ॥
 नारायण हम सो बिन बूझे,
 कहाँ चलीं गागरिया शीश धर ॥८॥

❀ सखी वचन लालजी प्रति ❀

दावरा राग आसावरी

गैल जिन रोको जोबन मदमाते ॥
 इन बातन शोभा नहिं पावौ, लाज की गारी गाते ॥
 यहां हमें गुरुजन को डर है, देखत आवत जाते ॥
 नारायण कहैं अन्त जो होते, तो याको फल पाते ॥९॥

❀ लालजी वचन सखी प्रति ❀

राग कान्हूरा बागंसरी

गोरी देखिबे में भोरी छलबल में प्रवीन ॥
 रति छबि निन्दित वदन अति सकुचन,
 भूषण वसन तन वय की नवीन ॥
 कुन्दकली दशन विद्रुम से अधर लाल,
 दृगनकी शोभा लखि लाजे मृग मीन ॥
 नेक हँसि हेरि मुख फेरि नारायण,
 हम सो चतुर कियो अपने अधीन ॥१०॥

* सखी वचन लालजी प्रति *

राग ईमन धीगा ताल-

मेरी डगर न रोको नन्दलाल ॥
 तुम अपने जोबन के मद में, करत फिरत नितप्रति कुचाल ॥
 महा डोठ बरजो नहि मानत, नये नये तोहि उपजे छयाल ॥
 नारायण तुम निपट अनीती, प्रगट भये व्रज आजकाल ॥११॥

* लालजी वचन सखी प्रति *

राग मांडकी सुरत-

क्यों जल भरिबे आई, इन घाटन पनिहारी ॥
 भोरो भोरो वदन मदन मन मोहै, बातें करत प्यारी प्यारी ॥
 अंग अंग मणि भूषण सोहैं, रूप को खिली फुलवारी ॥
 मधुर मधुर अधरन भुतिकावत, मन हरिबे की बिचारी ॥
 जित चितवत तित करत है घायल, तो सम कौन शिकारी ॥
 नारायण जिन देर लगावो, देओ जगात हमारी ॥१२॥

* सखी वचन लालजी प्रति *

राग भंजोटीका जिला-

जिन अग रोको नन्दकिशोर ॥
 तोहि उरझन को बानि परी है, साँझ तकत नहि भोर ॥
 देर लगत मोहि सास रिसाव, तुमैं छैल नित रार सुहाव ॥
 इन कुचाल कछु हाथ न आव, गागरिया दई फोर ॥
 तुम अति चंचल छैल विहारी, कैसे कूख रखे महतारी,
 यह अचरज मोकों है भारी, घर घर तेरो शोर ॥
 नारायण अब क्यों इतरावो, भई सो भई न बात बढ़ावो ॥
 ताही कूं तुम आंखि दिखावो, जो होय तेरी बन्दोर ॥१३॥

(समाजी वचन)

दोहा—झटकि लाल ब्रजबाल कर, तोरि मोतियन हार ।

बोले पुनि चंचल चपल, कहा बड़ावत रार ॥१४॥

❀ सखी वचन ❀

राग भूपाली

नन्दलाल कुचाल न कर इतनी ॥

देखत हैं मग नारी नगर की, और सखी संग की जितनी ॥

जासो कोऊ बुरो नहि माने, बात कहो मुख सों तितनी ॥

नारायण जाय इतरावो, सो ठकुराई है कितनी ॥१५॥

वात्तिक

फिर सखी आपस में कहिबे लगीं चलो रो बीर ! याकी मंया सों चलिकें कहो, यह यौं नहीं मानेंगो, तब आप बोले—तुम भले ही जाय कहो, मेरो कोई कहा करेगो, ऐसे कहिकें चले आये, अरु नागरी भेष धरके मारग मे ठाढ़े हूँ रहै । जब थोरी देर पीछे सखी हू आय पहुँचीं, अरु इनको नई रूप मनोहर निरखिकें बूझिबे लगीं, अरी साँवरी सुकुमारी तू यहां कैसे ठाढ़ी है, तब आप बोले, अरी बीर आज मैं भोर ही यमुना जल भरिबे गई हती, तहां नन्द के ढोटा ने मोसों कंसी कंसी कुचाल करी हैं ॥१६॥

❀ नवनागरी वचन सदनसों ❀

राग भूपाली—

सखि जाने कहांसों अचक आय, लंगर मेरी गागर फोरि गयो ॥

नई चूंदरिया चीर चीरकर, निपट निडर पुनि आँखि दिखावँ,

देखि बीर अति कोमल बैयां, दोउ कर पकरि मरोरि गयो ॥

मोसों कहै सुनि एरी सुन्दरी, तो समान व्रज सुधर न कोऊ,
 नखसिख लों छबि परख निरख मुख, सघन कुंजकी ओर गयो ॥
 कहँ लग कहों कुचाल ढाँठ की, नाम लेत मेरो जिय कांपे,
 नारायण मैं घनो बरजि रही, मुतियन की लर तोर गयो ॥१७॥

राग कालिगडा

आज श्याम मेरी गागर फोरी ॥
 गागर फोरी भला सो तो फोरी, ताहू पै लंगर बहियां मरोरी ॥
 लोक लाज कुलरीति मर्यादा; एक साथ उन तृण सम तोरी ॥
 आप समान सखा सँग नटखट, कै रोकत मग कै करै चोरी ॥
 मैं वाकी कछु मोल लई हूँ, मन चाहै सो करै बरजोरी ॥
 नारायण सब बदलो लेउंगी, औरन की सम जाने न भोरी ॥१८॥

* सखी वचन नवनागरी प्रति *

राग ईमन कल्याण

यमुना तट काहे को अकेली गई ॥
 रीति भाँति नहीं जाने यहँ की, तू व्रज आई नई ॥
 जो तेरो उन बँयाँ मरोरी, गागर फोर दई ॥
 याही में भाग समझ नारायण, और न अधिक भई ॥१९॥

* नवनागरी वचन सखी प्रति *

ठुमरी शंभोटीका जिला

एरी मोहि बाँसुरी में नाम लैलं धेरै रो ॥
 ऐसो रो निलज भयो, जोबनके मद कर, सबनके आगे हँसि हेरै रो ॥
 निपट निडर मेरो अचरा पकर करि, सिरसों गगरिया गेरै रो ॥
 नगर नारि निरखत नारायण, डगर बगर नित धेरै रो ॥२०॥

वात्तिक

अरी बीर मैं वाकी कौन कौन सी कुचाल कहूँ ॥२१॥

राग ईमन

कल को छोहरा ढीठ लंगर मोहि, गारियां दँ दँ जात ॥
संग की सखी सुनत सब ठाढ़ी, नेक नहीं सकुचात ॥
ज्यों ज्यों बरजत हूँ मैं वाकों, त्यों त्यों अति इतरात ॥
नारायण ब्रजमें रहूँ कैसे, जहां नित प्रति उतपात ॥२२॥

वात्तिक

हे सखी ! अब ब्रजमें कैसे बसूँ, सखीने कही अरी डरूँ क्यों ?
चलि यशोदा पै कहि आवें, फिर वा ढीठसों निबट लैगी ॥२३॥
वोहा—नारायण जोगी जिसे, ध्यान धरत दिन रैन ।
ताहि ब्रजवधू संगलै, चली उराहनों दैन ॥२४॥

❀ नवनागरी वचन यशोदा प्रति ❀

रेखता—

सुनिले यशोदा रानी, तू लाल की बड़ाई ॥
सब लोक लाज वाने, जमुना में धोय बहाई ॥
भोरँही मैं गई जो, जल भरिबे काज भँना ॥
पोछे सों आय अचानक, उन मूँदे मेरे नँना ॥
डरपी मैं हाय को है, तब बोले टेढ़े बँना ॥
हौँ तौ रही अकेले, वा संग ग्वाल सँना ॥
तब सबने हो हो करिके, तारी मेरी बजाई ॥सु०॥१॥
हँसि हँसिके छैनमो सों, करिबे लगे ठिठोली ॥
यह छबि तिहारे मुखकी, अब कासों जावे तोली ॥
निरखँ कबू बदन को, कबहूँ वह छुवँ चोली ॥

मैं तो सकुचकी मारी, दासों कछु न बोली ॥
 पुनि बहियाँ मेरी झटकी, गागर धरनि गिराई ॥सु०॥२॥
 अँगिया के बंद तोरे, चूंदरि झड़ाक फारी ॥
 दुलरीके निरखिबे को, गलबहियाँ मेरे डारी ॥
 यह सब कुचाल देखे, मग ठाढ़े पुरुष नारी ॥
 ताहूँ पं नाम मेरो, लंकर सुनाव गारी ॥
 गुरुजनमें मंरी वाने, यह विधि करी हँसाई ॥सु०॥३॥
 ज्यों ज्यों कहूँ मैं हट रे, त्यों त्योंही दूनौ अटक ॥
 मुसक्यावँ दृग मिलावँ, भ्रुकुटी चलावँ मटक ॥
 कर करके संनाबनी, तन पर से चीर झटक ॥
 अब और कहा कहूँ मैं, गलहार हूँ कँ लटक ॥
 एक साथ वाने ऐसी, पकरी निलज्जताई ॥सु०॥४॥
 कबहूँ कहे बता री, तू क्यों अकेली आई ॥
 कं घरमें तेरे पति की, तोसों भई लराई ॥
 तू चलि भवन हमारे, करि मोसों मित्रताई ॥
 विधना ने तेरी मेरो, जोरी भली बनाई ॥
 नारायण वाकी बातें, सुनिके मैं अति लजई ॥५॥२५॥

बालिक

तब नंदरानी ने करी अरी सखी ! मेरो लाल तौ जाने
 कौनसे वनमें गया चरावत होयगो, तू क्यों वाकों वृथा दोष
 लगावँ । तब सांवरी बोली, अरी ! तू वाके गुण कहा जाने, कहूँ
 यहां ही ऊधम करत डोलत होयगो । जो तू न माने तौ हम
 दिखाय भी देंगी । इतनी कहिके पुनि भवनते बाहर आयके आपस
 में कहिये लगिं, क्यों बीर ! अब यशोदा कूँ कैसे सांच आवे, तब
 सांवरी बोली—मोकूँ लालजी बनायके दूरसों यशोदाकूँ दिखाय

दीजो कि देख ले, अब तिहारो श्यामसुन्दर कौनसे वनमें गऊ चराय रह्यौ है ? तब सबनने कही हम्बैं सखी ! यही ठीक है, फिर सांवरी ने ओट करिके जब अपनो निज सरूप प्रगट कियो, तब एक संग सब सखी अचरज करके निहारबे लग्यौ, न सांवरी कहत बने न सांवरो कहत बने, फिर हँसि हँसिके कहिबे लग्यौ, धन्य ही लालजी महाराज ! अपनी मँया हू सो न चूके, तब आप बोले—अरी सखी ! कहूँ चतुरहूँ चूकं हैं ? ॥२६॥

दोहा—ये लीला यदुनाथ की, जो सुनिहै चित लाय ।

नारायण ताके सदा, श्रीपति रहें सहाय ॥२७॥

इति श्रीपद्मघट लीला श्रीनारायण स्वामीजी कृत सम्पूर्ण ॥५॥



अथ नवलसखी की दान लीला प्रारम्भ

❀ समाजी वचन ❀

दोहा—धनि व्रजवासी नारि नर, धनि वृन्दावन धाम ।

नारायण सुरपति जिन्हें, निशचिन करत प्रणाम ॥१॥

प्रात समय ब्रज नागरी, सजि अपनो शृङ्गार ।

गोरस बँचनकों चलीं, गजगामिनि सुकुमार ॥२॥

मग में ठाढ़ो सांवरो, रोकि सबन की गँल ।

रूपसिंधु अरविंद दृग, रतिक शिरोमणि छैल ॥३॥

जब पहुँची दिंग आयके, मृगनैनी वरवाम ।

तिनहि देखि मुसक्यायके, बोले सुन्दर श्याम ॥४॥

कहां जाउ ठाढ़ो रहौ, तुम्हें रूप अभिमान ।

अब आगे पग जिन धरौ, बिना दिये दधि दान ॥५॥

सुनत वचन नंदलालके, हँसीं सकल व्रजबाल ।

देखो री अब सांवरो, नई चलत है चाल ॥६॥

एक सखी की भुज पकरि, हँसि बोले व्रजराज ।
प्यारी तू आई नई, दही बेंचबे आज ॥७॥

❀ लालजी वचन नवलसखी प्रति ❀

ठुमरी खम्भाच का जिला —

आज तू नवेली दधि बेंचबे कू आई री ॥
जोबन की उमंग सों झूमत चलत,
गजमत्त हू की गति तै लजाई री ॥
नैनन के बान भौंह तान के कमान कहौ,
कौन पं यह करी है चढ़ाई री ॥
रूप की निकार्ई सुघराई नारायण,
कहाँ लग कहुँ मैं बड़ाई री ॥८॥

❀ बड़ी सखी वचन लालजी प्रति ❀

राग कालिगड़ा

लाल तुम काहे को इतरावो ॥
मोर पंख उरसे पगिया में, यापै बड़े कहावो ॥
जब तं प्रगट भये तुम व्रज में, घर घर धूम बचावो ॥
माखन छाँछ चुराय हमारी, मिल गोपन संग पावो ॥
फटी पुरानी कामरि ओढ़ी, वन वन धेनु चरावो ॥
नारायण फिर कौन भरोसे, एते गाल बजावो ॥९॥

❀ लालजी वचन नई सखी प्रति ❀

राग दावरा आड़ा कालिगड़ा

हमारो दान लेउ ब्रजनारी ॥
मदमाती गजगामिनि डोलै, तू दधि बेचनहारी ॥

रूप तोहि बिघनाने दीनों, ज्यों चन्दा उजियारी ॥
 मटुकी सीस कटीले नैना, मुतियन मांग संवारी ॥
 हार हमेल गरे में राजें, अलकें घूंघर वारी ॥
 या ब्रज में जेती सुंदरि है, सब हम देखी भारी ॥
 नारायण तेरी या छबि पै, कान्ह जाय बलिहारी ॥१०॥

❀ बड़ी सखी वचन ❀

राग कालिगड़ा

मेरी बात सुनो यदुराई ॥
 याकी दधि अबही मति लूटी, तुमको नन्द दुहाई ॥
 याकी सास भोर ही याको, भवन हमारे लाई ॥
 गोरस बेंचन याहि सिखावौ, यों कहि संग पठाई ॥
 नई बधू पुनि निपट ही भोरी, नहि जानत चतुराई ॥
 तासों याहि आज मति रोकौ, अबहीं गौने आई ॥
 लाज करति मुख घूंघट ओढ़े, तुम्हें देखि सकुचाई ॥
 नारायण हठ तजौ सांवरे, निरखत लोग लुगाई ॥११॥

❀ लालजी वचन सखी प्रति ❀

राग अंशोटीका जिला

सखी तुम नेक तो रूप दिखावौ ॥
 घूंघट पट मुख ओट करौ क्यों, याहि तनक सरकावौ ॥
 ब्रज में लाज करूं सो बौरी, हँसि हँसिके बतरावौ ॥
 नारायण हम दोउ बरोबर, क्यों इतनी सकुचावौ ॥१२॥

राग अंशोटी

सखी तुम मेरी ओर क्यों न हेरो ॥
 बरसाने में पीहर तेरो, कै कोउ गांव गमेरो ॥

तू मोसों इतनी क्यों सकुचत, मैं हूँ देवर तेरो ॥
 घूँघट खोलि एरी नवनागरि, दान दीजिये मेरो ॥
 लाज करो गोरस क्यों बेचौ, घर घर सांझ सबेरो ॥
 नारायण नित कुंजगलिन में, रहै कान्ह को डेरो ॥१३॥

❀ सखी वचन लालजी प्रति ❀

राग झंझोटी—

याको घूँघट पट न उघारो ॥
 परत्रिय देख अनीति करौ तुम, नई नई रीति निकारो ॥
 बड़े महरि की पुत्रबधू है, नेक तौ बात बिचारो ॥
 भले बुरे की लाज न तुमको, मन भावति करि पारो ॥
 दधि गोरस पै दान लगावत, मानों राज तिहारो ॥
 नारायण है कौन हमारे, मग को रोकन वारो ॥१४॥

यातिक

लालजी बोले—अरी सखी ! तू इतनी क्यों हाथ नचाय रही है, घूँघट तो हम वाको उघारें, कछु तिहारो तौ नाही उघारें ॥१५॥

दूती की खाल—

तू इतनों क्यों हाथ नचावत, तेरो कछु कोई घूँघट खोलें ॥
 जो ऐसी कुल लाजवती तू, तौ क्यों भोर ही घर घर डोलें ॥
 जोवन माहि फिर मदपाती, आप समान न और को तोलें ॥
 नारायण दधि बेंचनहार तू, नेक न बात बिचारिके बोलें ॥१६॥

❀ सखी वचन ❀

बरवा दूती की खाल—

आप भले गुणवान बनो तुम, औरन में अति खोट बतावो ॥
 माखनचोर कहावत हौ नित, तौऊ नहीं मनमाहि लजावो ॥

रतन जड़े आभूषण पहरे, छाँछ लिये करको फँलावो ॥
नारायण सब लोग हँसेंगे, प्रथम उतारि इन्हें धरि आवो ॥१७॥

❀ लालजी वचन सखी प्रति ❀

दोहा—दधि जोबन नवरूप को, जब लगि देउ न दान ।
तब लग जान न पाउगो, कोटिक करो सयानि ॥१८॥

❀ सखी वचन लालजी प्रति ❀

राग भैरवी—

मारग दीजं मोहन प्यारे ॥
इन बातन शोभा नहिं पावो, तुम ही राजदुलारे ॥
बहुत हँसी जिन करो सांवरे, सुनि हैं कन्त हमारे ॥
तुमरो कोई कछू न करंगो, हमें मूँदैगे तारे ॥
देखे सुने नहीं हम कबहूँ, तुम सम झगरन हारे ॥
नारायण क्यों रारि बढाओ, रे दूँ बापन वारे ॥१९॥

❀ लालजी वचन सखी प्रति ❀

राग कालिगड़ा—

ग्वालिन दान देत इठलावे ॥
नित प्रति ही तू या मारग हूँ, क्यों दधि बेचन जावँ ॥
हमें कहत तू दूँ बापन को, अपने क्यों न गिनावँ ॥
नारायण देओ कोटिक ताने, कर नहिं छूटन पावँ ॥२०॥

❀ सखी वचन लालजी प्रति ❀

राग मल्हार—

छैल गैल मति रोकँ तू हमारी रे ।
चाल कुचाल चलौ जिन चंचल,
चरचा करें सब पुर नर नारी रे ॥

हम सुकुमार ठाडी कांपति हैं,
शिर पर दधि की मटुकिया भारी रे ॥
नारायण ब्रज कौन बसंगो,
ऐसी अनीति जो करनी बिचारी रे ॥२१॥

❁ लालजी वचन सखी प्रति ❁

राग मल्हार तीनताल—

जोबन की मदमाती डोले री गुजरिया ॥
अंग अंग जोबन की उठति तरंग नई ।
नैना कजरारे भौंहे तिरछी नजरिया ॥
हाथन में चूरी नकबेसर करनफूल ।
मुंदरी ललित छबि देत अंगुरिया ॥
अब लों तोसी नहि देखी नारायण ।
दधि की बेचनहारी नन्द की नगरिया ॥२२॥

❁ सखी वचन लालजी प्रति ❁

राग आड़ा कालिगड़ा—

छाँडौ मेरी गल न तौ गारी में सुनाऊँगी ॥
औरन के भूले कहूँ मोतों जिन अटको ।
अबई यशुमति पै पकरि लै जाऊँगी ॥
पहले ही सों अपनी बड़ाई कहा करूँ मैं ।
देखिये तौ कैसे तुहें नाच नचाऊँगी ॥
जो मैं तोहि सूधो न बनाऊँ नारायण ।
तौ मैं निज बाप की न आज सौँ कहाऊँगी ॥२३॥

❁ लालजी वचन सखी प्रति ❁

राग बरबं पीलू का जिला—

पहले मेरो दान चुका री, पीछे बतराइयो प्यारी ॥
तो समान तुहि देत दिखाई, नवजोबन नव सुन्दरताई ।

और कहां लों करों बड़ाई, मोहन को मन मोहनहारी ॥
 अति बांके हैं नैन तिहारे, सान धरे पैंने अनियारे ।
 जिनने हमैं घायल करि डारे, इन समान नहि बाण कटारी ॥
 नारायण जिन भीर लगावो, देउ दान अपने घर जावो ।
 क्यों मटुको चौपट करवावो, देख हंसेंगे पुर नर नारी ॥२४॥

❀ सखी वचन सखी प्रति ❀

राग कान्हड़ा बागेशरी-

जाने दे री जाने दे तु यासों मति बोलें ॥
 यह लंगर निपटघो भयो ब्रज में, डगर चलत छबि तोलें ॥
 जाहि न लाज सकुच गुरुजन की, हंसि हंसि घूँघट खोलें ।
 नारायण यह दृगन को रोगी, पर त्रिय झाँकत डोलें ॥२५॥

❀ अपर सखी वचन सखी प्रति ❀

राग बरबारी कान्हड़ा-

सब मिलि चलो नन्दगृह माई ॥
 इनहीं के सुत भयो अनोखो, नई नई रीति चलाई ॥
 माँगत दान न कान काहू की, ऐसी कहा लरिकाई ।
 नारायण या ग्राम वास करि, अब हम बहुत अघाई ॥२६॥

❀ लालजी वचन सब सों ❀

दोहा—अहो नवेली गुण भरी, धरी मटुकिया शीस ।
 दधि जोबन को दान हम, लेंगे बिस्वेबीस ॥२७॥

❀ बड़ी सखी वचन नवल सखी प्रति ❀

दोहा—अरी सुहागति सुंदरी, नवदुलहिन सुकुमार ।
 हठ नहि छाँड़त साँवरो, घूँघट नेक उधार ॥२८॥

(समाजी वचन)

दोहा—धूँघट पट कछु खोलि के, मुसक्याई ब्रजबाल ।
देखि मनोहर रूप को, मगन भये नँदलाल ॥२६॥

❁ सखी वचन लालजी प्रति ❁

राग कालिगड़ा

आपनो दान लेउ नँदलाल ।
रस के भरे वचन अति अटपट, कहन लगी ब्रजबाल ॥
दोऊ ओर दृग सों दृग लागे, हिय में प्रेम विशाल ।
नारायण या विधि सो हँसि हँसि, कर चुकवत गोपाल ॥३०॥

वातिक

सखी बोली अजी लालजी महाराज ! आप तौ दान मांगते रहे, फिर क्यों न लियो, तब लालजी बोले अरी सखी ! दधि मांगिबे को तौ हमारो मिस रह्यो, यह रूपमाधुरी निरखि के सब दान भरि पायो ॥३१॥

दोहा—ये लीला जो नित सुनै, गावँ दै दै ताल ।
नारायण तापै कृपा, करें लाड़िलीलाल ॥३२॥

इति श्रीनवलसखी की दान लीला श्रीनारायण स्वामीजीकृत समाप्त ॥६॥

—❁❁❁—

अथ श्रीछद्म दान-लीला प्रारम्भ

❁ समाजी वचन ❁

दोहा—दधिमटुकी शिर पै धरी, चलीं बेंचिबे बाल ।
नारायण ठाढ़े गली, छँलछली नँदलाल ॥१॥

❀ लालजी ❀

राग सम्माच-

ठाढ़ी रहौ ठाढ़ी रहो रूप निधान ।
 बरजोरी कित जावो दौरी, बिना दिये दधि दान ॥
 काहू भाँति उपमा मैं तेरी, कर नहिँ सकत बखान ।
 घूँघट में मुख दमकत ऐसे, ज्यों बादर में भान ॥
 हम निज कर मांगत रिसाति तुम, भली नहीं यह वान ।
 नारायण तुम आजहि आई, नई नई पहिचान ॥२॥

❀ सखी वचन लालजी प्रति ❀

राग ईनन कल्याण-

मनमोहन मोसों मति अटको ।
 झटकौ न चीर, मटकौ न छँल, दधि की न गँल मटुकी पटको ॥
 जैसे कछु तुम हौ सब जानूँ, गुण तुम्हार अब कहा बखानूँ ।
 तनक तनक रस काज राज रस, भवन भवन निशि दिन भटको ॥
 तुम कब के ब्रज में भये दानी, रोकत हो मग नारि बिरानी ।
 दधि गोरस की लूट मचाई, तुम्हें न काहू को खटको ॥
 नारायण अबहूँ कहि मानो, औरन की सम मोहि न जानो ।
 निरुसि जायगी सब लँगराई, चलो हटो घर को सटको ॥३॥

(समाजी वचन)

दोहा—झगर झगर बतरात मग, निपट अनोखो छँल ।
 मटुकी फोरी लकुट सों, बिखर गयो दधि गँल ॥४॥

❀ सखी वचन लालजी प्रति ❀

राग मल्हार-

बयोंरे छँल मेरी मटुकिया पटकी ।

करके ढिठाई, मग दधि बिखराई,
 सब चूरी करकाई, सुकुमार बंयां झटकी ॥
 अबहीं यशोदा ढिंग पकरि लै जाऊं तोहि ।
 एक न चलैगो तेरी बात नटखट की ॥
 बदलो लेउँगी न डहूँगी नारायण ।
 कौन सो गरज मेरी, तोसों अब अटकी ॥५॥

❀ अपर सखी वचन ❀

दोहा—तू यासों जीतं नहीं, लोग सुने हूँ भीर ।
 जो कष्टु भई सो भई अब, चलि अपने घर बीर ॥६॥

❀ सखी वचन सखी प्रति ❀

राग कालिगड़ा

मैं कैसे घर जाऊं मोसों ननंद लरैगी ॥
 आगेहि चबाव मेरो करति है निशि दिन,
 मटुकीके बिन देखे अधिक जरैगी ॥
 कुटिल कुचाल वाके मनकी न थाह परै,
 नेकही में झूठ मूठ साख भरैगी ॥
 याहीसों मैं अति घबराऊं नारायण,
 जाने वो कहा मोयै दूषण धरैगी ॥७॥

(समाजी वचन)

दोहा—श्रीदामा को भेष धरि, प्यारी परम सुजान ।
 प्रीतम के ढिंग आयके, या विधि करत बखान ॥८॥

राग कालिगड़ा

लाल तोहि मैया बेग बुलाबै ॥
 बछरा छूटि गयो है तेरो, पकरन में नहि आवै ॥

मोहिं कद्यो तू जा लिवाय ला, जहां ताहि खेलत पावै ॥
नारायण अब चल तू झटपट, नातर गाय चुखावै ॥६॥

वार्तिक

लालजी बोले चल सखा, तब सखी बोली अब तो सखाकी
हिमायत सों छूटि चले हौ, जब अकेले पाओगे तब समझूंगी ।
फिर मारगमें प्यारीजी ने बूझी, लालजी—तुमने हमको पहचान्यो,
लालजी बोले—हे श्रीदामा ! आज तू कछु भांग पी आयो है, जो
ऐसो बूझ, तब श्रीजी हँसिके बोली ॥१०॥

दोहा—हमहूँ छल कैसे कियो, लखि न सके गोपाल ।

निरखि ललीकी छबि नई, पुनि पुनि हर्षत लाल ॥११॥

वार्तिक

लालजी बोले बलिहार या भेष पै ॥१२॥

दोहा—नारायण यह गुप्त रस, श्रवण करं जो कोय ।

या जगमें सुख सों रहे, अन्त समय गति होय ॥१३॥

इति श्रीनारायण स्वामीजी कृत श्रीछन्द वानलीला समाप्त ॥७॥



अथ देवीपूजन लीला प्रारम्भ

❀ समाजी वचन ❀

दोहा—रतनजटित वृन्दाविपिन, सब सुषमा की खान ॥

गौर श्याम क्रीडत जहाँ, मंगल मोदनिधान ॥१॥

अरुण उदय नवनागरी, करि मज्जन शृङ्गार ॥

देवी पूजत प्रेम सों, प्रीतम हित उरधार ॥२॥

उत सों नागरि भेष धरि, नन्दनंदन ब्रजराज ॥

गौरी पूजन मिल चले, प्रिय के छलिबे काज ॥३॥

राग कालिगङ्गा-

नागरी भेष धरघो गिरधारी ॥
 तहां आय पूजत देवी कों, जहाँ पूजत वृषभानदुलारी ॥
 प्रथम ताहि स्नान करावत, अति हितसों लै कंचन झारी ॥
 पुनि आभूषण पट पहराये, भाल तिलक गल माला डारी ॥
 धूप दीप नंबेद्य पान धरि, प्रेम सहित आरती उतारी ॥
 हाथ जोरि कछु बिनती कीनी, हो प्रसन्न गिरिराजकुमारी ॥
 बूमति कुपरि कहाँ रहौ सजनी, तुम मोहि लगति प्राणते प्यारी ॥
 नारायण बलिहार चलौ अब, मिलि दोऊ निरखें फुलवारी ॥४॥

* सखी वचन सखी प्रति *

राग बीनपुरी टोड़ी-

आज कौन राधे सँग डोलें ॥
 नवयौवन गजगामिनि भामिनि,
 हरषि निरखि निज छबिको तोलें ॥
 श्याम वरण मुखचन्द्र प्रकाशित,
 कबहुँक घूँघट कबहुँक खोलें ॥
 नारायण यासों चलि बूझ,
 जो हमसों यह तनकहुँ बोलें ॥५॥

* सखी वचन प्रियाजी प्रति *

दादरा मंसोटीका जिला-

कहो प्यारी यह कहां सों आई ॥
 कहा नाम को गाम है याको, कौन की है यह जाई ॥
 यह हमसों इतनी क्यों सकुचति कै कछु तुमने सिखाई ॥
 नारायण देखी न सुनी हम, नारि ते नारि लजाई ॥६॥

❀ श्रीजी और सखी वचन परस्पर ❀

राग काफी—

री मेरी या सजनी सों आजहि भई है चिन्हार ॥
 देवी पूजिके आई मों संग, निरखन कों फुलवार ॥
 मेरे हित इन फूल बोनके, ललित बनाये हार ॥
 बंदनी करन फूल अरु गजरे, भूषण विविध प्रकार ॥
 यह भूषण प्रीतम की रचना, यह वाकी अनुहार ॥
 नारायण चाहै मति मानो, है यह नन्दकुमार ॥७॥

❀ श्रीजी वचन ❀

संसोटीका जिला—

भलो भेष नागरी को बनि आये प्यारे ॥
 पग में पायल बाजें, हाथ गजरा रे ॥
 झुमका किलोल करै, काननमें न्यारे ॥
 मोतिनकी मांग पर, जाऊँ बलिहारे ॥
 चंदके निकट सोहैं, नेक नेक तारे ॥
 नैन सैन मीठे बान, रूप के उजारे ॥
 नारायण अंग निरखि, कोटि मदन हारे ॥८॥
 दोहा—लीला श्यामा श्याम की, दुखभंजन सुखरूप ॥
 नारायण जे नित सुनै, ते न परै भवकूप ॥९॥
 इति श्रीनारायण स्वामीजी कृत देवीपूजन लीला सम्पूर्ण ॥९॥



अथ नवदुलहिन लीला प्रारम्भ

❀ समाजी वचन ❀

दोहा—भानु नगर में एक ने, सुत को कियो विवाह ।
 नवदुलहिन आई भवन, भयो परम उत्साह ॥१॥

राग ब्रजमती—

एक के घर नवदुलहिनि आई ॥
 सो ब्रजनारि लाज वश सोवति, कीरति-कुमरि न न्योत पठाई ॥
 वे अपने मन कहा कहेंगी, इनके भले विवाह सगाई ॥
 पांच बतासन के लालच सों, गीतन में काहू न बुलाई ॥
 एक सखी बंठारि बहू ढिग, भरि थारी पकवान मिठाई ॥
 नारायण लै चली बाइनों, जहाँ हुती राधे सुखदाई ॥२॥

दूती की चाल पं-

जब पहुँची प्यारी के महलन, इनको देखि कुंवरि हरषाई ॥
 करि आदर बंठार सवन कूँ, कछु विवाह की बात चलाई ॥
 क्षमा करो यह चूक हमारी, मैं तिहारे नहि पहुँचन पाई ॥
 नारायण गई भूलि काम में, तुमकूँ देखि बहुत सकुचाई ॥३॥

दूती की चाल पं-

राजकुमरि की देखि सुघरता, हरषत सब मिलि करत बड़ाई ॥
 क्यों न कही तुम बवन अमी सम, प्रगट भानुकुल की प्रभुताई ॥
 बोली कुंवरि बहू सँग लाती, तब होती मेरे मन भाई ॥
 नारायण हमहूँ सब देखत, वाके मुख को सुन्दरताई ॥४॥

* समाप्ती वचन *

दोहा—प्रादि अंत लौं जो कछु, बातें भई रसाल ॥
 भवन द्वार सुनते रहे, रसिया मोहन लाल ॥५॥
 प्यारी के मन को लखी, चली सखी बहु लैन ॥
 पग पग में हरषत हियो, घड़ी चार गइ रैन ॥६॥
 इत दुलहिनि सुकुमारके, दृगन भरी अलसान ॥
 तन सों वसन उतारिके, सोय रही पट तान ॥७॥

होनहार जंसी कछू, तैसो लागत योग ॥
 ढिगहू की ओंघन लगी, भली बन्यो संयोग ॥८॥
 रसिकलाल तासों प्रथम, ताके भवन पधार ॥
 दुलहिन के पट पहरिकें, बंठे घूँघट मार ॥९॥

भजन दरबारी कान्हड़ा-

दुलहिन को हरि रूप बनायो ॥
 लहंगा पहिरि ओढ़ि चूंदरिया, घूँघट पट मुख पै लटकायो ॥
 ज्यों के त्यों बंठे बनठन कें नखशिख लौं निज बदन दुरायो ॥
 सखी आय देखी जब दुलहिन, ढिग सजनी कों ओंघत पायो ॥
 कर झकझोरि जगाय ताहि पुनि, हरषित सकल वृत्तान्त सुनायो ॥
 नारायण बहु के लंबे कूं, भानुकुमरि ने मोहि पठायो ॥१०॥

(समाजी वचन)

दूती की चाल पं-

संग लिवाय चलीं दुलहिन को, लै तारो निज भवन लगायो ॥
 लखे न कौतुक नन्दलाल के, निज बहु को घर में मुँदवायो ॥
 आवत देखि बहु को प्यारी, निज मनमें अति हर्ष बढ़ायो ॥
 नारायण उठिके करि आदर, हाथ पकरि पुनि ढिग बैठायो ॥११॥

❀ प्रियाजी वचन ❀

दूती की चाल पं-

भूषण वसन अमोल मँगाये, रतनन को इक थार भरायो ॥
 ले दुलहिन तू बदन दिखाई, या कारण हम तोहि बुलायो ॥
 वस्तु अनेक दई हैं तोऊ, घूँघट पट नहिं नेक उठायो ॥
 नारायण सब हंसत परस्पर, आज बहु ने हमें हरायो ॥१२॥

दूती की चाल पे—

तब बोली दुलहिनि की सासू, याने तौ इक स्वांग फंलायो ॥
हमकूं बिदा करो श्रीराधे, आप दोऊ कीजं मन भायो ॥
निपट हठीली द्वं बापन की, मानत नहीं बहुत समझायो ॥
नारायण निज भवन गई सब, फिर याकूं प्यारी ने बुलायो ॥१३॥

दूती की चाल पे—

ललिता कहै सुनो प्यारीजू, दूसर पहर बजन पै आयो ॥
भली बहू याकी सेजा में, खान पान तुमने बिसरायो ॥
मैं देखूंगी हठ अब याको, याने तौ बहु खेल खिलायो ॥
नारायण यों कहि पट झटकयो, निकसि पर्यो यशुमतिको जायो ॥१४॥

बालिक

सब हँसि हँसिकें कहन लगीं, बलिहार या सांवरी बहू पै !
फिर पिछिलौ प्रसंग उनके घर जायबेहू को होयबे लाग्यो, तापीछे
सखिन ने ब्यारू के थार सजायकें आगे लाय धरे ॥१५॥

राग सोरठ --

ब्यारू करत दोऊ सुकुमार ॥
मठरी ठौर जलेझी लाडू, सेव समोसे दार ॥
पूरी लुचई पुवा कचौरी, भाजी विविध प्रकार ॥
अदरख चटनी बेर मुरब्बा, पापर सोंठ अंचार ॥
खजला दूध मलाई खुरचन, खिरसा मोहन थार ॥
शोतल जल पुनि पीवत रुचि सों, नारायण बलिहार ॥१६॥

❀ सखी वचन ❀

राग ब्रजवंती—

आज इन दोउन पै बलिहार ।
नंदलाल रतिपति विशाल छबि, चन्द्रवदन वृषभानदुलारी ॥

बैठे कुंजभवन बतरावत, उपजावत सुख प्रीतम प्यारी ।
 नारायण उपमा कहा दीजै, मैं अपने मन बहुत बिचारी ॥१७॥
 दोहा—तजि कुतर्क जो नित सुनै, यह लीला रसपुञ्ज ।
 नारायण ताकूँ युगल, वास देत निज कुंज ॥१८॥

इति श्रीनारायण स्वामीजी कृत नवदुलहिन लीला सम्पूर्ण ॥१०॥

अथ मानलीला (दोहावली) प्रारम्भ

सो०—विनय करूँ कर जोरि, रसिक जनन के चरण में ।
 नारायण चित डोरि, लगी रहै नित युगल पद ॥१॥
 दोहा—अगणत गण रूपक यमक, इनको मोहि न ग्यान ।
 गुण तुम्हरी सकारि के, तासों लीजो मान ॥२॥
 एक रैन निज पिया सों, प्रिया मुदित मन होय ।
 तोते की सुनिके कथा, रही कुंवरि पुनि सोय ॥३॥
 बड़े भोर उठि सेज सों, श्री बजराय कुमार ।
 स्नान भवन में न्हाय कें, कियो नयो शृङ्गार ॥४॥
 सुपने में देखयो लली, लाल और के साथ ।
 उठि बंठी तब मान करि, धरि कपोल तर हाथ ॥५॥
 भुंहेँ चढ़ी फरके अधर, रोम ठड़े सब अंग ।
 मान भूप लं कटक को, चढ़ि आयो इक संग ॥६॥
 हँसत न मुख चितवत न दृग, सुनत नहीं कछु कान ।
 द्वार द्वार पै चौकियाँ, बंठारीं नृप मान ॥७॥
 मन की गति मति लखि सखी, ठढ़ी छड़ी लं द्वार ।
 धोखे में आवें न धँसि, कपटी नन्दकुमार ॥८॥
 इत सों प्रिय के ढिग चले, प्रीतम परम प्रवीन ।
 सुरत युद्ध की लालसा, तामें अति लवलीन ॥९॥

धनुषबाण बरुनी भुँहें, मृदु सुसव्यान कटार ।
तिरछी चितवनि सेल सम, हँसि हेरन तलवार ॥१०॥
समर साज सबही सजे, अरु शृङ्गार अनेक ।
यह न लखी गढ़ मान ने लियो प्रथमही छेक ॥११॥

❁ शृङ्गार श्रीलालजी ❁

दोहा—चरण चारु नूपुर सजत, बजत करत जनु गान ।
मन मृग भूलत चौकड़ी, सुनि बरवे की तान ॥१२॥
रतन जड़े तिन पै कड़े, मनो गड़े रतिनाथ ।
बड़े कड़े मन के निरखि, लै मन हाथोहाथ ॥१३॥
भई न पटतर लाल की, रवि शशि हिये लजाय ।
सकुच सहित बनके कड़े, पड़े चरण में आय ॥१४॥
कटि नटवर की निरखि दृग, चौंधत मुदित निमेष ।
क्षुद्र भाग कब सकत हैं, क्षुद्र घटिका देख ॥१५॥
कर कंकण मणि जटित को, हटत आँख कब देख ।
मुँदरी कह मुँद री पलक, दृष्टि लगावत पेख ॥१६॥
श्याम वरण चितहरण के, हाथन पै हथफूल ।
जिन्हें तके मन भूलके, फेर न भूलें भूल ॥१७॥
पहुँची तक पहुँची नहीं, जिनकी सुरत विशाल ।
बन्द बन्द सों बाजुवन, बाँधि लई तत्काल ॥१८॥
हिये हार गये हार तक, निरखन हार विहार ।
उपमा कहत बनी नहीं, रहे निहार निहार ॥१९॥
नाक बुलाक सुहावनो, कुण्डल लोल कपोल ।
नख शिख लौं शृङ्गार बर, जाको तोल न मोल ॥२०॥
मुकुटमणी के शीश पै, मुकुटमणी छबि देत ।
कलेंगो कल कब लैन दे, बरबस मन हरि लेत ॥२१॥

बंधे पेच के पेच बर, पेच पेच में पेच ।
 फिर निकसं कब मन पड़े, ऐसे पेच कुपेच ॥२२॥
 केश वेश शोभा बनी, को करि सकं बखान ।
 घुंघरारे कारे सघन, चिकने कान प्रमान ॥२३॥
 कोमल अमल पुशाक बर, चुस्त चुनी सजि अंग ।
 जाकी छवि निरखत गयो, निज छवि भूलि अनंग ॥२४॥
 बागा जिन समझो इसे, बाग लाल अनुकूल ।
 बड़े भाग या बागे के, जामें लाला फूल ॥२५॥
 बिंधा न जो या रूप को, लखि कष्टु रहा सुचेत ।
 नैन चोट सी ओटली, वचन वचन कब देत ॥२६॥
 झूमत चलत मतंग गति, कबहुँ ठिठक ठहरात ।
 मनो मदन मद पान करि, भरि उमंग में जात ॥२७॥
 अधर मधुर हँसि हरत मन, कर बर कमल फिरात ।
 भवन गवन चाहें कियो, रोक दिये कित जात ॥२८॥

❀ सखी वचन लालजी प्रति ❀

भले कान्ह अभिमान मन, ठान न मो सम आन ।
 मान समान न मान जिहिं, मिल्यो आज सन्मान ॥२९॥
 ठढ़े रहौ न कहौ अहो, कहां चले रसखान ।
 जाके मान गुमान तुम, कियो मान सच मान ॥३०॥

❀ कवि वचन ❀

सुनत सुन्न चितवत चकित, सोचत चित चितचोर ।
 सुपन तकौ कं जागतौ, मलो मयो भ्रम भोर ॥३१॥
 घबराये सुधि बुधि उड़ी, धरहर कांपत अंग ।
 पानी मद को जो चढ़यो, उतरि गयो इक संग ॥३२॥

अहो दई कैसी भई, कही कहा इन बात ।
प्यारी प्यार बिसारि के, मान कियो क्यों प्रात ॥३३॥

* लालजी वचन सखी प्रति *

सखी तोहि सों सांच कहि, सांची है कं झूठ ।
कहूँ झूठ को नाम सुनि, सांची न जावैं रूठ ॥३४॥
रैन तोहि सपनो भयो, कै तू आई देख ।
अथवा अपनी ओर ते, पढ़त मीन अरु मेख ॥३५॥

* सखी वचन लालजी प्रति *

सुनत हँसी हरि को हँसी, हँसी न और प्रकार ।
अभी परंगी ए लला, झूठ सांच की सार ॥३६॥

* कवि वचन *

तब मानी मन लाल शुक, सांच कहति ब्रजनार ।
बिरह जाल मो पै, दियो, मान शिकारी डार ॥३७॥

* लालजी वचन *

पुनि बोले भोले वदन, सो उपाय तू ठान ।
जा विधि पावैं मान अब, भरी सभा अपमान ॥३८॥

* सखी वचन *

बहुतेरे तेरे पढ़े, जोड़ तोड़ छल छन्द ।
एक न मेरे ढिग चले, चतुराई ब्रजचन्द ॥३९॥

* लालजी वचन *

जो आज्ञा पाऊं सखी, आऊं तनक निहार ।
प्रिय मुख पंकज पै परो, कैसे मान तुसार ॥४०॥

❀ सखी वचन ❀

प्रोतम सो दिन अब गये, करत रहे उपहास ।
बिन बूझे जाते चले, दौर दौर के पास ॥४१॥

❀ लालजी वचन ❀

जब तो तू भोरी हुती, अब तौ चतुर दिखात ।
पकरि छड़ी छाँटे ठढ़ी, बात बात में बात ॥४२॥

❀ सखी वचन ❀

कहा कहानी लं ठड़े, बात होय कछु बात ।
चलो हटो सरको परे, मोहि न भीर सुहात ॥४३॥

❀ लालजी वचन ❀

बिनय करत बानी घिसी, ठढ़े बीतियो याम ।
जिन में ऐसी निठुरता, तिन सों राखे राम ॥४४॥

❀ सखी वचन ❀

छल बल करि केती कहो, रहो न द्योगी जान ।
चहे सुनो या कान ते, चहे सुनो वा कान ॥४५॥

❀ लालजी वचन ❀

पुनि अधीन हँ कर कहै, जोर जोर बिन जोर ।
सखी सखी हँ जिन बने, कृपन समान कठोर ॥४६॥

❀ सखी वचन ❀

सुनत हेरि हँसि फेरि मुख, बोली बोली मार ।
बिनय गिने को आप की, पं कहूँगी कहि डार ॥४७॥

* कवि वचन *

कही गई सुनि उन निकट, बिकट कियो जिन मान ।
छकी छबीली छबि निरखि, विनत जोरि द्वं पान ॥४८॥

* सखी वचन श्रीजी प्रति *

बिनय करूं न करूं कहो, कहा करूं मतिधीर ।
बोले ते तव मान मैं, भिंग परेगी बीर ॥४९॥
चन्द्रमुखी चपला चमक, चतुराई की खान ।
कारण कवन कियो कहो, कुंवरि किशोरी मान ॥५०॥
जो ऐसे ही मान को, चोरी लेओ बुलाय ।
द्वारपाल फिर द्वार पै, क्यों राखे बैठाय ॥५१॥

* कवि वचन *

उक्त वचन के बान इन, जब मारे द्वं चार ।
द्वारपाल भजिबे लगे, सूने तजिके द्वार ॥५२॥

* श्रीजी वचन *

भौंह सौंह करि सैन सों, बूझन लगी सुजान ।
एक राग निबटघो नहीं, तू कहा गावत तान ॥५३॥

* सखी वचन *

पिय चकोर बिन आप के, अति व्याकुल है आज ।
ज्यों झख जलते विलग गति, दरश देउ निशिराज । ५४॥
प्रीतम हाल हवाल लखि, अरी निठुर ब्रजबाल ।
लाल कहां अब लाल हैं, या छिन तुम हो लाल ॥५५॥

* कवि वचन *

सुनत उठी तन फुनफुरी, फिर बंठी अनखात ।
फिर फिर के फरके अधर, बोली वचन रिसात ॥५६॥

❀ श्रीजी वचन सखी प्रति ❀

चुपरी चुपरी जिन कहै, चुपरी चुपरी बात ।
 मिलन सीखिबे दे उन्हें, उपरी उपरी गात ॥५७॥
 यहां कहा कछु बटत है, अड़े खडे बन छैल ।
 फँल फँल सोये जहां, वहीं मचावे फँल ॥५८॥
 लाखन लखि लिख मन रखे, कपट किये जो श्याम ।
 दया मया पति नहिं हया, जिनके सो किहू काम ॥५९॥

❀ कवि वचन ❀

पय सुभाव सागर प्रिया, नीर मनो है मान ।
 वचन उपायन सों भयो, विलग न मन खिसियान ॥६०॥
 फिरि बगदो पिछले पगन, मुखते कड़त न बँन ।
 जिमि हारे पर सूरमा, आवत नीचे नैन ॥६१॥
 देखत ही सखि को मुख, निज मुख भयो उदास ।
 सुखनिवास विश्वास ते, भँ निराश तजि आस ॥६२॥

❀ लालजी वचन ❀

क्यों मुरकी दुरकी इतं, कहा उपजियो ज्ञान ।
 मुरकी मुरकी कान के, प्यारी मुरकी जान ॥६३॥

❀ सखी वचन ❀

लालन कहनी सो कही, बाने सुनी न कान ।
 ऐसे गुहते कब पढ़ी, झटपट छूटै मान ॥६४॥
 साम दाम कहि कोटि विधि, समझाई तव हेत ।
 सो काहू विधि प्राणपति, बात लगन नहिं देत ॥६५॥
 हेम वरण श्रीलाडिली, रोस कोट में आज ।
 बँठी मान मचान पै, सुनो लाल ब्रजराज ॥६६॥

चहै सुनावो चारि षट, कै दशआठ पुरान ।
जाके मनमें मान है, सो कब मानत ज्ञान ॥६७॥

व्याकुलता लालजी

करत विचार विचारनिधि, बहु विधि उर धरि धीर ।
प्रिया कली ढिग में अली, किमि हूँ पुजो समीर ॥६८॥

लालजी वचन

गहि ठोड़ी ब्रजनारि की, बार बार लै वार ।
गुण न भूलिहौं हरि असन, चार चार पै चार ॥६९॥

* सखी वचन *

सांवलियो द्वारो हटो, लाल बेर किहि काम ।
बूझो किसमिस मिलेंगी, मैं जामिनि हूँ श्याम ॥७०॥
धीर धरो जग धार बड़, होत न धीर अधोर ।
भीर परी जो भीर हूँ, ठढ़े द्वार करि भीर ॥७१॥

लालजी वचन

धरा धरूँ तो धर सकूँ, धीर न धारचो जाव ।
जिन रस चाहयो प्रेमकी, तिन्हें न और सुहाय ॥७२॥
जान जान जिन मिस करो, होवै जान सुजान ।
जान न देवो जान द्यो, नातर देवो जान ॥७३॥

कवि वचन

सखी लखी गति लाल की, निज मन रचत इलाज ।
दरश स्वाति बिन कल न लै, पिया पपाहा आज ॥७४॥
मृगछौना किम संग लै, भीतर कहुँ पथान ।
सनमुख मान चलाय रह्यो, बंक बिलोकन बान ॥७५॥

या विधि सों सोचत सखी, पुनि मन कियो विचार ।
 फिर छबि रहै कि ना रहै, जंसी बनी अवार ॥७६॥
 अब दिखाउं पिय भ्रमर कूं, यह शोभा को साज ।
 कली खिलै हो फूल यह, फूल कली भइ आज ॥७७॥
 चंद्र बदन सुखसदन को, संग लै चली तांह ।
 मुरझ रही रवि मान सों, प्रिय कमोदिनी जांह ॥७८॥

❀ व्यवस्था श्रीलालजी ❀

लगी मिलन की चटपटी, भूली सुरति वियोग ।
 कब दृग पक्षी चुगेंगे, दरशन रूपी चोग ॥७९॥
 देखि दूरि ते भूरि छबि, दूरि दिये दुख टाल ।
 दुरं दूरि ते जिन कहैं, दूरि रहौ गोपाल ॥८०॥

❀ मानकी शोभा ❀

कर कपोल के धरि तरे, बंठी अति छबि पाय ।
 मानो तन धरि शान्त रस, पौद्ग्यो कमल बिछाय ॥८१॥
 कोउ अंग फरकत नहीं, यों बंठी चुप चाप ।
 मानो भीति के चित्र को, छबी बनी है आप ॥८२॥
 मुख उदास कछु दृग मूंदे, मनो उदारत स्वांग ।
 ज्यों योगी जन बंठिके, करत योग अष्टांग ॥८३॥
 बंठी नागरि मौन गहि, बियुरी अलकन जोय ।
 मानो कमलनि जानि निशि, मुख मूंदे रहें सोय ॥८४॥
 लटकन के मोती लटक, अधरन पै की भीर ।
 मानों लाल सों यों कहै, छोनि लई जागीर ॥८५॥
 लट हूँ नैन कपोल पै, शोभा देत अपार ।
 बंठी नागिनि कमल पै, दरपन रही निहार ॥८६॥

माथे मोतिन बदन की, यह शोभा नइ भाँति ।
 रूप मानसर के निकट, बैठी हंसन पाँति ॥८७॥
 ठड़े ठड़े निरखत पिया, शोभा शोभाखान ।
 मुख बनाव बैठन अदा, धरन कपोलन पान ॥८८॥
 पथिक पीय मन मांगि मग, वैंनी परसन जात ।
 सीसफूल ठग बीच में, करत रोक उत्पात ॥८९॥
 गौर बरण भौं बंक बर, लोचन अरुण सुहात ।
 मतवारे दो खंग लैं, ठड़े उजेरी रात ॥९०॥
 नैन देखि सुख लूटते, तरसन लागे कान ।
 आजहि प्यासे हम रहे, सुधा बचन बिन पान ॥९१॥

* कवि वचन *

श्री छबि सिंधु अथाह की, को कंसे ले थाह ।
 अंग तरंग भौंहे भँवर, अलक उरग दृग प्राह ॥९२॥

* विनय श्रीलालजी की *

निरख निरख शोभा हरष, पिय हिय होत अपार ।
 डरत डरत बिनती करत, जँ श्री राजकुमार ॥९३॥
 पंकज विषधर मोन मृग, सर खंजन बादाम ।
 प्यारी तेरे दृगन के, यह बिन दाम गुलाम ॥९४॥
 समझ सुघरता शील सम, सार असार विचार ।
 समुखि सुलोचनि सकल गुण, तुमैं दिये करतार ॥९५॥

* सखी वचन श्रीजी प्रति *

मिलन वचन सुस्नेह युत, बोली सखी विचार ।
 प्यारी पिय ठाढ़ो निकट, उठि निहार बलिहार ॥९६॥

जा मृग को घायल कियो, तिरछी चितवन बान ।
परख लेउ जिन फिर कहौ, तू लाई हैं आन ॥६७॥

श्रीजी वचन सखी प्रति

नैन तरेरे बंक भौं, श्रवण सुनत पिय नाम ।
रिस वश ह्वं कहि ह्यां कहां, श्याम श्याम मन काम ॥६८॥
लजत निलज्ज न लजत हैं, लाजवान के नैन ।
द्वार द्वार झुकि झाँकि के, आये दरशन दैन ॥६९॥

सखी वचन श्रीजी प्रति

कहां गये किनके रहे, लखी कौनसी बात ।
कं योही घर बैठिके, परके काग उड़ात ॥१००॥

श्रीजी वचन सखी प्रति

इनहीं सों बूझै नहीं, जो ठाढ़े करि भीर ।
कर कंगन को आरसी, कहा करंगी बीर ॥१०१॥
सजनी सजनी के रहे, रजनी भरि घनश्याम ।
भवन भवन भय रात निशि, भोर, आये मम धाम ॥१०२॥

लालजी वचन श्रीजी प्रति

सुनि प्रिय के भोरे वचन, रचन श्रवण चितचोर ।
बोले कछु मुसिक्याय कें, नागर नवल किशोर ॥१०३॥
प्यारी प्यारी आप ते, को जा सों हैं हेत ।
में येह जानूं नहीं, कारी हैं कं श्वेत ॥१०४॥

श्रीजी वचन लालजी प्रति

मुकुर मुकुर जिन बात कहू, मकर हंसत हैं कान ।
मुकरो मुकुर निहार कं, मुख झुकरे की शान ॥१०५॥

❀ लालजी वचन श्रीजी प्रति ❀

सोच विमोचन सोचिके, निर्दोषे दे दोस ।
बिन आज्ञा या द्वार की, चौखट सौ सौ कोस ॥१०६॥

❀ श्रीजी वचन लालजी प्रति ❀

वृथा बात गढ़ि गढ़ि कहौ, समझि लियो कष्ट खेल ।
एक न मानूं तुम चहें, केते पापर बेल ॥१०७॥

❀ लालजी वचन श्रीजी प्रति ❀

अनय कियो अपनाय के, विदित सकल संसार ।
आज कहा मन में भई, देत द्वार तें टार ॥१०८॥

❀ श्रीजी वचन लालजी प्रति ❀

ढाल ढाल मुख सों कहौ, चटपट चटपट बात ।
यह अचरज विद्या घनी, पढ़े एकही रात ॥ १०९ ॥

❀ कवि वचन ❀

आज बनी शोभा युगल, को वर्णत मतिधोर ।
भोरोपन अरु दीनता, मानो धरे शरीर ॥११०॥

❀ लालजी वचन श्रीजी प्रति ❀

रैन सुवे की किन कथा, श्रवण करी दुसराय ।
तब सुधि आई मानिनी, तुरत गई मुसिक्याय ॥१११॥

❀ हरष मान मोचन । ❀

हँसत हँसत सखि कंचुकिन, टूटि टूटि गये बन्द ।
मन्दिर के अंदर नयो, पूरि रख्यो आनन्द ॥११२॥

❁ कवि वचन ❁

उत चितवत मुसिक्यात इत, दम्पति अति छबि देत ।
 मानो बांटत बायनों, सजनी हंस हंस लेत ॥११३॥
 रसिक जनन की कृपाते, कियो कछुक गुणगान ।
 नतु नारायण बापुरो, याको सकै बखान ॥११४॥
 व्रजबासी धनि धनि विपिन, संत स्वामि गुरुदेव ।
 जासु कृपाते कछु मिल्यो, गुप्त रहस को भेव ॥११५॥
 बिघन हरन मंगल करन, चरन जुगल सरकार ।
 नारायण निज जनन के, जीवन प्राण अघार ॥११६॥

इति श्रीनारायण स्वामीजी कृत मानलीला दोहावली सम्पूर्ण ॥१०॥



अथ खण्डिता मानलीला प्रारम्भ

❁ समाजी वचन ❁

दोहा—एक सखी अति प्रेम वश, भवन बुलाये लाल ।
 बातन में उरझायके, निरखत रूप विशाल ॥१॥
 अपर सखी छिपके तहाँ, कौतुक सकल निहार ।
 जाय कद्यो पुनि प्रिया सों, कछुक सहित विस्तार ॥२॥
 यह सुनिके प्रिय रिस भई, पुनि इक सखी बुलाय ।
 कही तासु जा देख तू, लाल कहाँ बिरमाय ॥३॥

वार्तिक

जब या सखी ने वा सखी के द्वार पं जायके बूझी, क्यों री!
 तेरे घर में लालजी पधारे हैं? तब वह सखी बोली, अरी बीर!

वधों हांसी करै, तेरेइ घर मे लालजी पधारै हैं यासां जो तू कहै
सो सब साँच ॥४॥

* फिर सखी वचन वा सखी प्रति *

राग कालिगडा

तेरे भवन यह कौन बिराजै ।
वचन मनोहर भाषत तोसों, कबहुँ मधुर धुनि नूपुर बाजै ॥
मोरमुकुटकी झलक परत है, जाहि निरखि रवि शशि मन लाजै ॥
नारायण तू साँच कही री, यह तेरे आये किहि काजै ॥५॥

वातिक

यह वचन सखीको सुनिके श्रीलालजी बाहर निकसि आये,
अरु सकुचके बोले, अरी ! कहूँ प्यारी जी सों मति कहियो, तब
सखी बोली, मैं कहा कहूँगी, दूतीने पहले ही समाचार पहुँचायके
मान कराव दियो हैं ॥६॥

* सखी वचन लालजी सों *

संसारीका जिला—

कितनी समझाय रही, परघर जिन जावौ रात,
उघरैगी बात प्रात छिपी ना रहैगी ।
दूतीजन चहूँ ओर डोलति है यासि काज,
झूँड साँच जाय कोउ प्यारी सों कहैगी ॥
राजन के होयें कान, जैसे कहौ लेत मान,
ताहूँ पे यह प्रगट चूक कैसे वो सहैगी ।
नारायण जँसो तुम उनको जियँ चाहोगे,
तँसौही तुम्हें भानु, नन्दिनी हूँ चहैगी ॥७॥

वार्तिक

फिर सखी ने कही आप मेरे संग पधारो जो कछु मोसों
बनेगी मैं सब प्रकार उनसों बिनती कहूँगी ॥८॥

❀ सखी वचन श्रीजी प्रति ❀

जिला—

प्यारी तेरे आगे ठाढ़े नन्दकिशोर ।
लाज भरे हृग करत न सन्मुख, निरखत धरती ओर ॥
बिन समझे इनसों बनि आये, औगुन लाख करोर ।
नारायण अब क्षमा कीजिये, यह माँगूँ कर जोर ॥६॥

❀ श्रीजी वचन लालजी प्रति ❀

जंजवंती—

कौन काज यहां आवत हौ जू ।
देखि लिये सौतिन घर बैठे, अब क्यों बात बनावत हौ जू ॥
जासों करत नई रस बतियां, हँसि हँसि कंठ लगावत हौ जू ।
नारायण वाही के जावो, मोसों कहा सकुचावत हौ जू ॥१०॥

❀ लालजी वचन श्रीजी प्रति ❀

जिला—

प्यारी सुघर सुकुमारी नेक समझ के कीर्ज मान ।
मैं तो गयो न काहू के भले ठीक करौ छबिखान ॥
दूतीको कहा मिलंगो उन रस में दीयो विष सान ।
प्रगटी निपट घरफोरी जाने एक सो हूँ किये प्रान ॥
सांचो कही काहू ने बड़े लोगन के हूँ कान ।
तुम तो प्रिये अति भोरी नहिं सांच झूठ को ज्ञान ॥
मेरो तो मन मधुरुर है तुमरो मुख कमल समान ।
नारायण नित प्रति मोर्कू एक आप ही को रहै ध्यान ॥११॥

वात्तिक

जब श्रीलालजी ने देख्यो, कि या भांति सों मान नहीं छूटै
तब बाहर आय के सखी भेष धारण करि फिर श्री प्रिया जी
के निकट जाय के समझायबे लगे, हे प्यारी ! आपकूं ऐसो मान
करिबो योग्य नहीं, क्योंकि आप प्रीति की रीति कों जानौं ही,
और आज मैं तिहारे प्रीतम सों तिहारे मनायबे को बीरो उठाय
के आई हूँ, अब मेरे आयबे की लाज राखौं ॥१२॥

सांवरी को वचन

रेखता—

भूपाली के स्वर—

इतनो न मान कीजै, वषमान की दुलीरी ।
तेरे मनायबे में, मोहि श्रम भयो है भारी ॥इतनो०॥
प्रीतम को आज तो-द्विन, पल छिन न चैन आवैं,
नहीं जी लगत भवन में, नहिं बन की छबि सुहावैं ॥
हंसि बोलिबौ कहां को, नहिं खान पान भावैं ॥
हाथन में चित्र तेरो, पुनि पुनि हिये लगावैं ॥
अति बिकल हूँ रह्यो हूँ, वह सांवरो विहारी ॥इतनो०॥
प्यारे आगे अपने, मैं गुण की कर बड़ाई ॥
तेरे मनायबे कौं, बीरा उठाके आई ॥
बल बुद्धि मो में जितनी, तितनी मैं सब लगाई ॥
पं नेक हू न मेरी, चतुराई काम आई ॥
सब विधि सों राजनीति मैं, कहि कहिके तोसों हारी ॥इतनो०॥
तेरी तो नित बड़ाई, सब सखी जन बखानैं ॥
प्यारी हिये की कोमल, सुपनेहू रिस न जाने ॥
यह आज कहा भयो है, बँठी हो झुकुटी ताने ॥

उन सखीजन को कहिबौ, अब कौन सांच माने ॥
 सब झूठ ही बड़ाई, भामिनि करे तिहारी ॥इतनो०॥
 लालन के साथ मिलके, बन शोभा निरखौ प्यारी ॥
 कहूँ सघन ललित छाया, कहूँ फूली फुलवारी ॥
 जलसों भरे सरोवर, झुकि रहि द्रुमन की डारी ॥
 बोलत अनेक पक्षी, बरनत हैं छबि तिहारी ॥
 बलि वेग ही पधारौ, यह लालसा हमारी ॥इतनो०॥
 एरी सुघर सयानी, मो बिनती मान लीजं ॥
 तजिके यह मान मुद्रा, प्यारे सों हेत कीजं ॥
 नितही अधर सुधारस, हँसि हँसिके दोऊ पीजं ॥
 फिरकर न उन सों रूठौ, वरदान यही दीजं ॥
 नारायण याही कारण, निज गोद मैं पसारी ॥इतनो०॥१३॥

वार्तिक

यह नई रूप मनोहर देखिके श्रीजी ने इनको हाथ पकरिके
 कह्यो—अरी ! तू नेक बंठि तौ जा, यह पंचायत पीछे करि लीजो ।
 तब सखी पास तें बोली बलिहार, हमारो कहबो तौ न मान्यो,
 अब अपनी राजी सों हाथ पकरिके पास बंठायबे लगौं, इत सों
 लालजी बोले, बांह गहे की लाज । यह वचन सुनिके श्रीजी सकुच
 सहित मुसिक्याय गईं, लालजी गलबहियाँ दँके हँसिबे लगे, ता
 पीछे सखियन ने ब्यारू भोग कराय कें आरती करी ॥१४॥

दोहा—श्रीराधा गोविंद की, लीला परम उदार ।

नारायण गाये सुने, देत पदारथ चार ॥१५॥

इति श्रीखण्डिता मानलीला श्रीनारायण स्वामोजी कृत सम्पूर्ण ॥११॥

अथ श्रीसम्भ्रम-मानलीला प्रारम्भ

समाजी वचन

बोहा—बड़े भोर सुखसेज तें, जगे पिया छवि ऐन ।
 प्यारी के शृंगार हित, चले सुमन बन लैन ॥१॥
 सोवत में पुनि लाड़िली, सपनों देख्यो एक ।
 निज प्रीतम मिलि और सों, क्रीड़ा करत अनेक ॥२॥
 ता पीछे जागो लली, निकट न देखे श्याम ।
 तब मन में निश्चय भयो, गये काहु के धाम ॥३॥
 एक सखी सों कही तब, ठाढ़ी रहि तू द्वार ।
 मन्दिर में आवैं नहीं, कपटी नन्दकुमार ॥४॥

श्रीजी वचन दूसरी सखी प्रति

दावरा बर रे पीलू का जिला—

सखी नन्दलाला आवन नहीं पावैं ॥
 भीतर चरन धरन जिन दीजो, चाहें जिते ललचावैं ॥
 ऐसेन को विश्वास कहा री, कपट की बान बनाव ॥
 नारायण एक मेरे भवन बिन, अन्त चाहैं जहाँ जावैं ॥५॥
 बोहा—सुमन बीनि जब साँवरो, आयो मन्दिर द्वार ।
 सखी न भीतर जान दे, बरजति बारम्बार ॥६॥

* लालजी वचन *

राग दावरा—

हमें तू जिन रोकुं नवल ब्रज गोरी ॥
 मो मन में यह साँच न आवत, रुठी हौं भानकिशोर ॥

बीचहि ते क्यों बात बनावत, रिस सों भौंह मरोरी ॥
नारायण बिधि को कहा सूझी, तोसी रची घरफोरी ॥७॥

❀ सखी वचन लालजी प्रति ❀

राग कालिगड़ा

द्वार पै क्यों ठाढ़े ब्रजराज ॥
जहाँ सों आये वहीं जावो तुम, यहाँ नहीं कछु काज ॥
लाख भाँति सों बिनय करो तुम, एक न मानूँ आज ॥
नारायण बलिहार तिहारी, नेक न आवत लाज ॥८॥

❀ लालजी वचन सखी प्रति ❀

राग कालिगड़ा-

लाज सों मेरो काज कहा री ॥
बिन प्यारी मोहिं कल न परत है,
इक इक पल बोतत है भारी ॥
ऐसी कहा चूक भई मो पै,
तुम सजनी सब देखनहारी ॥
नारायण मोहि बेगि बतावौ,
क्यों रूठी वृषभान दुलारी ॥९॥

❀ सखी वचन लालजी प्रति ❀

राग कालिगड़ा

मैं कहा जानूँ कुँजबिहारी ॥
किहि कारण रूठी है तुम सों, चन्द्रमुखी वृषभानकुमारी ॥
जब ते उठी प्रिया सोवत तें, तबही सों मन में रिस भारी ॥
ना जानूँ कछु सपने में उन, देखी है करतूति तिहारी ॥

ठाड़े रहौ भीतर मति जावौ, प्रीतम मानो कही हमारी ॥
नारायण जो भुज गहि रोकूँ, फिर कहा बात रहै गिरिधारी ॥१०॥

* लालजी वचन सखी प्रति *

राग झंझोटी—

मोहि मति रोकै री तू, एरी ब्रज नागरी ॥
रूप की निधान है तू, गुणन की खान है तू,
तेरी सम कौन आज, तेरो बड़ो भाग री ॥
कहै तो मैं नृत्य कहुँ, बांसुरी में राग भरूँ,
कान्हरो किदारो भैरों, सोरठ बिहाग री ॥
तू तो सदा उपकारी, हित की करनहारी,
आज नारायण मोसों, क्यों राखै तू लाग री ॥११॥

वार्तिक

सखी बोली हे प्यारे ! यामें मेरो कुछ दोष नहीं, मैं तो उनकी
आज्ञा सो रोकूँ, परन्तु अब आप एक काम कौज, जा रीतिसो
मैं कहूँ वाही रीति सो उनके निकट जायके विनती करौ ॥१२॥

राग झंझोटी का जिला—

प्यारी ढिग जाय लाल धीरे वचन कहियो ॥
नीची रखि दृष्टि नैन, विनती कीजो विचारि,
सन्मुख हूँ ठाड़े दोऊ हाथ जोरे रहियो ॥
भवरा मुख पं दुराय, कबहूँ भूषण सँभारि,
हूँ के बलिहार उनकी कबहूँ ठोड़ी गहियो ॥
नारायण भूलिके न डरपियो निरादर सो,
जो कुछ वह कहै आप सबही बात सहियो ॥१३॥
बोहा—लखी वचन सुनि नुदित मन, गये प्रिया ढिग लाल ।
भोरहि आज उदास क्यों, एरी रूप विशाल ॥१४॥

❁ प्रियाजी वचन लालजी प्रति ❁

ठुमरी सम्माच—

प्यारे तेरे जिय की न जानी जाय बात रे ॥
 कहूँ तो सांझ आधी रात, रहत कहूँ
 पिछिली रात, कहूँ प्रात रे ॥
 उनहीं सों जाओ, बतराओ सुख पाओ तुम,
 जिन यह सिखाये दाँव घात रे ॥
 अब तोसों भूलिके न बोलूँ नारायण,
 जहां लग अपनी बसात रे ॥१५॥

❁ लालजी वचन ❁

ठुमरी जिले में-

प्यारी जी तिहारे बिन कल न परत है ॥
 मन्दिर अटारी चित्रसारी और फुलवारी,
 मोहि कछु प्रिय न लगत है ॥
 घनो समझायो इत उत बहलायो पुनि,
 तौह मन धीर न धरत है ॥
 एतौ हठ आगे कब कियो नारायण,
 जेतौ हठ आज तू करत है ॥१६॥

वातिक-

जब श्रीलालजी किशोरीजी की बलैयां लकें गलबैयां दंबे
 लगे तब श्री किशोरीजी को वचन ॥१७॥

ठुमरी सम्माच-

प्यारे मेरे गरवा में जिन डारो बंधां ।
 छुऔं न लेंगर मेरो पकरौं न कर तुम, छाँड़ौं अब कपट बलैयां ॥

जाओ पिया वाही मनभाई के भवन तुम, जाके निस परत हौ पैयां ॥
झूठीझूठी सौंहेँ क्यों खाओ नारायण, जानूँ मैं तिहारी चतुरयां ॥१८॥

❀ लालजी वचन श्रीजी प्रति ❀

राग जोगिया-

सांची कही किधौं हांसी करी जी ।
आज कहा कारण जो मोसों, बेर बेर कही यहाँ सों टरी जी ॥
कौन सखी कितमें घर वाको, तुम जाको मोहि दोष धरी जी ।
नारायण यही अचरज मोकों, झूठ कहत नहि नेक डरी जी ॥६१॥

❀ श्रीजी वचन लालजी प्रति ❀

राग कालिगड़ा-

श्याम तुम वाही सजनी के पधारौ ।
जाके बिना पल चैन न तुमको, झांकत हौ निशि ताही को द्वारौ ॥
यहाँ ठाढ़े क्यों देर लगावत, जाओ लाल नवरूप निहारौ ।
नारायण तिहारी बातन को, अब मोको न रख्यो पतियारौ ॥२०॥

❀ लालजी वचन ❀

लावनी की राह में-

उठी अब मान तजौ गोरी । रही है रैन बहुत थोरी ॥
सदा सों तुम मनको भोरी ॥ कहूँ मैं शपथ खाय तोरी ॥
औरन के बहकाये तुम, करि बँठति ही रोष ॥
झूठ सांब परखत नहीं, वृथा देत हौ दोष ॥
यही मोहि अचरज है भारी ॥१॥
तनक हँसति चितवौ सुकुमारी । शशी मुखपं हूँ बलिहारी ॥
अपनी ओर निहारिके, देव अभय वरदान ॥

क्षमा करो सब चूक अब, जो कष्टु भई अजान ॥
एती बिनती मानो मोरी ॥२॥

तिहारे गुण नितप्रति गाऊं ॥ बिना आज्ञा न कहूँ जाऊं ॥
ताहूँ पै दृग अरुण करि, भृकुटी लेत चढ़ाय ॥
जोरावर सों निबल की, काहूँ बिधि न बसाय ॥
हारे हैं हार जीतेहूँ हार ॥३॥

जिन्हें तुम समझौ हितकारी, सोड अति कपटी ब्रजनारी ॥
हम में फूट करायके, आप अलग मुसिक्यात ॥
नारायण तुमने करी, खरी न्यावकी बात ॥
भलेको दण्ड बुरे पै प्यार ॥४॥२१॥

वात्तिक

पास तें सखी बोली हे प्यारी ! ऐसे अपने प्रीतम प्यारे की
ओर सों कठोर न होनो चाहिये ॥२२॥

सखी वचन

राग ध्रुपद-

तेरी री मुखारविंद शरदचंद छविनिक्कन्द,
ताहि सदा निरखिबे को सांवरो चकोर है ।
तापर तू भृकुटी तानि, बंठत नित मान ठानि,
छाँड़त नहिं रिसकी बानि, बड़ी तू कठोर है ॥
तादिन तौ सौह खाई, अब नहिं रुठोंगी माई,
चाहें पिया प्यारे मांहि, औगुन करोर है ॥
यह सुनि मुसिक्याई बाल, अंक भरे नवल लाल,
नारायण हरखि सखी, डारत तृण तोर है ॥२३॥

दोहा—भानुकुमरि नन्दलाल की, यह लीला अभिराम ।
 नारायण हितसों सुने, पूरण होवें काम ॥२४॥
 इति श्रीनारायण स्वामीजी कृत संभ्रममानलीला सम्पूर्ण ॥१२॥

—*—*—*—

अथ रूपगर्विता मानलीला प्रारम्भ

* समाजी वचन *

दोहा—शशिवदनी प्रियसों कह्यो, प्रीतम अति हरषाय ।
 यह सुनि प्यारी रिस भई, भृकुटी लई चढ़ाय ॥१॥

* श्रीजी वचन लालजी प्रति *

तरक वचन सों करत तुम, मो मुख अस्तुति लाल ।
 ज्यों भुजंग सूधेहु मग, चले भुजंगी चाल ॥२॥
 मो मुख सम किमि होय शशि, सुनो सांवरे गात ।
 घटत बढ़त सकलंक विष, बन्धु प्रगट जड़ तात ॥३॥

* लालजी वचन *

वार्तिक

लालजी बोले हे प्राणप्यारी ! मैंने तो सहज सुभाव आपके
 मुखका बड़ाई करी हुतो ॥४॥

* श्रीजी वचन *

दोहा—प्रीतम कष्टु बौरे भये, मोहि देत हौ सीख ।
 मुख मीठे मन मे कपट, जा विधि गाठें ईख ॥५॥

* समाजी वचन *

निठुर वचन सुनि लाल ने, कही सखी सों आय ।
 वा भोरी रित भरी कूं, तुम समझावौ जाय ॥६॥

❀ सखी वचन श्रीजी प्रति ❀

राग मल्हार तीन ताल—

काहे को मानिनि मान बढ़ावत ।
तोहि तौ बानि परी रुठन की,
मैं नित हार गई हूँ मनावत ॥
आप तनक मन में नहि समझति,
औरन कूं भटु नीति सिखावत ।
नारायण प्रीतम प्यारे कूं,
हंसि रस के बयों न कण्ठ लगावत ॥७॥

❀ श्रीजी वचन सखी प्रति ❀

जिला धीमा ताल—

प्रीतम की चरचा न चला री ॥
अब उनके गुण जानि गई मैं, जो वे खेलत कपट कला री ॥
तू उनकी अति सुघड़ मिलनियाँ, और काहू सों जाय मिला री ।
नारायण ऐसो सन्देश तू, फेर कबू मो ढिंग मति ला री ॥८॥

❀ सखी वचन श्रीजी प्रति ❀

राग कान्हड़ा दरबारी—

ऐसो मान न कीज बार बार ।
एरी सुहागिनि भागिन तोप, हों पीवों जल बार बार ॥
उत सों लाल पठावत तो ढिंग, तू इत सों दे टार टार ।
मैं चौगान की गेंद भई री, मेरे नहीं पग चार चार ॥
तेरो मान अपमान है मेरो, समझावत गइ हार हार ।
नारायण विधि कैसे लगै तू, पात पात मैं डार डार ॥९॥

श्रीजी वचन

दोहा—जो इत सों रवि उत उगै, तौउ कहुँ न प्यार ।
फिरि तू क्यों आवत सखी, मो ढिग बारम्बार ॥१०॥

* सखी वचन श्रीजी प्रति *

राग कालिगड़ा

सुनि राधे तोहि ऐसी न चहिये ।
जो अपने आधीन रहै नित, ताहि कहा इतनौ डरपैये ॥
तुम कछु प्रीति की रीति न जानो, फिरि कहाँ लों तुम को समझैये ।
नारायण यह प्रीति कहावै, हँसि रस के पिय कण्ठ लगैये ॥११॥

श्रीजी वचन सखी प्रति

राग देश धीमा ताल—

चलि हटि री सखी क्यों बात गढ़त,
सो मैं सब जानूँ जो वह पाटी पढ़त,
हिय कपट बचन मानो फूल से झरत ॥
जाहि नेक कहे की न आवत लाज,
मन भावत ही करत फिरत है काज,
मोहि इनहीं लछिन सों रिस हू बढत ॥
अब नारायण मैं न कहूँगी प्यार,
नित देखि चुकी बाकी यहाँ है तार ।
जेतो कीजिये बड़ाई तेतौ मूँड पं चढ़त ॥१२॥

* सखी वचन श्रीजी प्रति *

जिला—

तोसी नहीं कोऊ देखो री हठीली ।
ज्यों ज्यों मैं अब तोहि मनावत, त्यों त्यों तू होवै अति गरबीली ॥

ऐसे समय बलि रोष न कीज, भौहैं कमान तनक करि ढीली ।
नारायण उठि मिलि प्रीतम सों, तजि दै मान की बान छबोली ॥१३

वातिक

फिर सखी ने लालजी सों जाय कही हे प्यारे ! आप शट-
पट नागरी भेष धारि के प्रियाजी के भवन द्वार पै आय के
बार बार भीतर कूँ झांकियों, जब उनकी दृष्टि तिहारे ऊपर
परै अरु तुम्हें बुलाय के कछु बूझें तो जा भांति सों मैं समझाय
चली हूँ वाही रीति सों उनकों उत्तर दीजो ॥१४॥

राग कान्हड़ा शपताल-

देखि री आज नव नागरी भेष धरि,
लली के छलन हित ललन कैसे सजें ।
पहर भूषण बसन, दृगन कजरा दियो,
निरखि शृंगार सुरवधु मन में लजें ॥
मन्द मुसिकयान भग चलत गति ठुमकि के,
मधुर धुनि किंकिणी चरण नूपुर बज ।
रूप अभिराम नारायण लखि श्याम को,
कौनसी माननी यान जो ना तजें ॥१५॥

समाजी वचन

दोहा—जाय द्वार ठाड़ी भई, सांवरि रूप विशाल ।
पुनि पुनि झांकति भवन में, अद्भुत जाके ख्याल ॥१६॥

किशोरीजी वचन

अरी सखी उठि देखि तू, को झांकत है द्वार ।
याकूँ तनक बुलाय ला, बूझें दिंग बैठार ॥१७॥

❁ श्रीजी वचन नागरी प्रति ❁

राम सोरठ धीमा ताल—

या बिरियां सखी तू कित डोलै री ।
 निपट अकेली सँग न सहेली, पग पग में अपनी छबि तोलै री ॥
 नहिं अवसर दधि बेचन को अब, पिछली रंनि पहरुआ बोलै री ।
 नारायण अति चतुर सांवरी, नेह की गाँठ तनक नहिं खोलै री ॥१८

❁ नवनागरी वचन श्रीजी प्रति ❁

राम जंगला काफी—

सकल वृत्तान्त कहूँ मैं तुम सों, सुनो दयानिधि भानु लली ।
 एक सखी कूँ मिलन चली मैं, संग लिये दश पाँच अली ॥
 पीछे ते कही टेरि काहु ने, आयो तुमैं पकरन को छली ।
 यह सुनिके संग की सब भागीं, काहू गली कोऊ काहू गली ॥
 मैं पुनि दौरि यहाँ आय दुबकी, देखि मनोहर ठौर भली ।
 नारायण भई भेंट आप सों, कछु मेरी पुनि बेलि फली ॥१९॥

श्रीजी वचन सांवरी प्रति

बोहा—राति यहां विश्राम करि, एरी सांवरी अंग ।
 प्रात भवन पहुँचाऊँगी, तोहि सखी के संग ॥२०॥

वातिक

यह वचन सुनिके सखी बलिहार प्रिया प्रीतम की कहिये लगी, तब श्रीजी अचरज हूँके बोलीं, अरी सखी ! कछु देखि-भारि के बात कहौ, पुनि सखी कर जोरि के बोली हे प्यारी ! अब आप ही देखिभारि लीज, तब श्रीजी ने लालजी की ओर देख्यो, लालजी झट मुसिक्याय गये फिर तौ हँसी की बातें

हैबे लगीं, लालजी ने कही हे प्यारी ! आप तौ नेक सी बात में
मान करि बंठो हो ॥२१॥

❀ श्रीजी वचन लालजी प्रति ❀

राग सप्तमाच-

प्रीतम तुम मोहि प्रान ते प्यारो ।
जो तोहि देखि हिये सुख पावत, सो बड़ भागिन वारो ॥
तुम जीवन धन सरबस तुमही, तुमही हृगन को तारो ।
जो तुमकों पलभर न निहारूं, दीखत जग अँधियारो ॥
मोद बढ़ावन के कारण हम, मानिनी रूप हि धारो ।
नारायण हम दोउ एक हैं, फूल सुगन्धि न न्यारो ॥२२॥

दोहा—नारायण गावे सुने, ये लीला सुखधाम ।

प्रिया प्रीतम में मन लगै, रसिकन में हूँ नाम ॥२३॥

इति श्रीनारायण स्वामोजी कृत रूपगविता मानलीला सम्पूर्ण ॥२३॥

—श्रीकवि राम—

अथ नवपनिहारी लीला प्रारम्भ

❀ समाजी वचन ❀

दोहा—ब्रजमण्डल के बास की, करत चतुर्मुख आस ।
नारायण ते धन्य है, जिनको नित्य निवास ॥१॥
पनघट की लीला सुनो, सज्जन जन धरि ध्यान ।
नारायण वर्णन करूं, अपनी बुद्धि प्रमान ॥२॥
एक दिवस उठि भोरही, छलिया श्याम सुजान ।
त्रिया भेष धरिके चले, गली भूप वृषभान ॥३॥

शिर पै सोहै ईं डुरी, रत्न टँके चहुँ पास ।
 तापै कंचन कलश धरि, चले रूप की रास ॥४॥
 भूप द्वार पै जायके, टेरत सुर गम्भीर ।
 एरी कोऊ चलत है, भरिबे जमुना नीर ॥५॥

* नवपनिहारी वचन *

राग जंजवंती आसावरी—

बेगि चलौ जल भरिबे नवेली ।
 कब सों टेरि रही मैं द्वारे, एक न निकसति सखी सहेली ॥
 संग साथ मैं खोजत डोलूँ, कोऊ मिलै मेरी मनमेली ।
 नारायण मग डर लागत है, यमुना जाय सकूँ न अकेला ॥६॥

* समाजी वचन *

दोहा—टेर सुनत नवनारि की, गोप लली छबि रास ।
 कंचन घट धरि शोश पै, जुरि मिलि आईं पास ॥७॥
 अद्भुत शोभा निरखिके, उर सुख भयो अपार ।
 रूप ठगौरी मैं ठगी, इकटज रहीं निहार ॥८॥

* श्रीजी वचन नवपनिहारी प्रति *

राग बावरा—

तुम या ग्राम कहां रहौ आली ।
 हम कबहूँ देखी न सुनी है, यह शोभा छबि रूप निराली ॥
 नखशिख लौ शृंगार मनोहर, अघर रची पानन की लाली ।
 नारायण कही प्रगट खोलिके, बात न राखौ बीच बिचाली ॥९॥

* नवपनिहारी वचन श्रीजी प्रति *

राग देश तोरठ—

प्यारी हौँ तो याही पुर माहिँ जसत,
 पै मैं निशि दिन अपने भवन ही रहत,

निज प्रीतम सों हँसि रस सुख बिलसत ।
 पनघट यमुना तट अरु जित तित,
 दरशन झाँकी बन बिहरन हित,
 कहूँ बहुत न मैं घर सों निकसत ॥
 नित डगर बगर इत उत डोलत,
 मोहि नारायण अति सकुच लगत,
 याही सों मैं नहीं कितहूँ उकसत ॥१०॥

❀ श्रीजी वचन नवपनिहारी प्रति ❀

दोहा—नाम कहा तेरो सखी, हम सों प्रगट बखान ।
 नाम है मेरो गुणवती, सुनो कुम्हारि वृषभान ॥११॥
 अरी गुणवती गुण भरी, मृदुल मनोहर गात ।
 क्यों काँपत तेरो बदन, साँची कह तू बात ॥१२॥

❀ गुणवती वचन श्रीजी प्रति ❀

राग आसावरी—

नन्दसुवन प्रगट्यो उतपाती ॥
 कहा कहूँ वाके गुण तुम सों, चोर जार घटवार जगाती ॥
 जो कबहूँ मोहि डगर वगर में, देखत है कहूँ इत उत जाती ॥
 सबके बीच पुकारी कहत है, कहां चली जोबन मदमाती ॥
 वाको इन कुचाल सों सजनी, अति भयभीत काँपत दिनराती ॥
 नारायण निज लाज काज हित, गिरजापति नित रहूँ मनाती ॥१३॥

वास्तिक

श्रीजी ने कही क्यों रो ! वह ऐसोई है ? तब गुणवती बोली
 अजो कछू बूझौ मती ॥१४॥

❀ गुणवती वचन ❀

राग काफ़ी-

सजनी याही सों जिया घबरावै ।
 मैं अबही आई या ब्रज में, छल बल नेक न आवै ॥
 जो कदापि वा ठग सों मगमें, इकले भेंट हूँ जावै ।
 फिरि जानें वह यशुमति ढोटा, कहा कलंक लगावै ॥
 याही सोच भई हौं दूबरी, धीरज कौन बंधावै ।
 नारायण हरि लाज रखं जो, तौ अब रहने पावै ॥१५॥

❀ श्रीजी वचन सखी प्रति ❀

राग वादरा-

याहि भली विधि सों लै चलौ री ।
 नन्दनन्दन के नाम सों डरपै, अति भोरी यह गोपकिशोरी ॥
 यद्यपि हम हूँ सब जानति हैं, बिनु कागुन दाकी नित होरी ।
 नारायण अब साथ हमारे, संगर करि न सकै बरजोरी ॥१६॥

❀ सखी वचन गुणवती प्रति ❀

राग सोरठ वा रामकली-

तू चलि री हमारे संग संग ।
 अब जिन डरपै वा रसिया के, सुनि सुनिके नये रंग ढंग ।
 तोहि देखि ऐसो को जाके, हिये न लगत अनंग रंग ।
 नारायण सुकुमार सांवरी, तू सुन्दर सब अंग अंग ॥१७॥

❀ समाजी वचन ❀

राग जंगल शंभोटी-

जल कों भरन चलीं ब्रजबाला ।
 शरद इन्दु सम कान्ति बदन की, लोचन रतिपति भाला ॥

तिनके मध्य भेष बनिता को, अति छबि देत गुषाला ।
नारायण कोऊ न लखें यह, कौतुकी नन्द को लाला ॥१८॥

ॐ गुणवती वचन सबसों ॐ

राग दावरा-

या मारग न चलौ री स्यानी ।
या मारग वह ठाड़ो हूँ है, मं निज मन अनुमान सों जानी ॥
हौं तुमको इक गैल बताऊ, जाहि कोऊ नहिं जानत प्राणी ।
नारायण स्नान ध्यान करि, निरभय भरि लावैंगी पानी ॥१९॥

दोहा—अरी सखी मिठबोलनी लै चल वाही गैल ।

जा मारग हम सबन को, लखि न सकें वह छँल ॥२०॥

गुणवती वचन

ठुमकि धरति तुम चरण को, नूपुर बजत विशाल ।
सुनि पावैंगो साँवरो, आवैंगो ततकाल ॥२१॥

गुणवती वचन

राग दावरा-

धीरे चलौ तुम गोप लली री ।
नूपुर धुनि जो सुनि पावैंगो, घेरैंगो फिर आय गली री ॥
उरझौ झार कठिन सों सुरझत, हम अबला वह पुरुष बली री ।
नारायण मग दाँव घात में, लग्यो रहै बित छँल छली री ॥२२॥

ॐ समाजी वचन ॐ

दोहा—बात कहत खेलत हँसत, बिधुवदनी वर वाम ।
जब पहुँची यमुना निकट, बोले छलिया श्याम ॥२३॥
एक दिन याही ठौर पं, मोहि रोकियो लाल ।
सो तुमसो मं कहा कहूं, जा विधि करी कुचाल ॥२४॥

* सखी वचन गुणवती प्रति *

पुनि तोसों उन कहा कही, सो सुनिबे को चाव ।
प्रगट कहौ तू खोलि के, अब जिन राख दुराव ॥२५॥

* गुणवती वचन *

राग सभ्माच व कल्याण-

लंगर की बात सुनो सगरी ।
एक दिना मैं जल कूं आवत, शीश धरे कंचन गगरी ॥
याही ठौर मो भेंट भई उन, बहुत करी झगरा झगरी ।
नारायण कर झटक पटक घट, घेर लई पनघट डगरी ॥२६॥

राग ईमन कल्याण-

तुम सुनो छैल की बात ।
बेर बेर मोतन हँसि हेरै, चंचल नैन चलात ॥
में सकुची कोऊ लखि लेगो, मग में आवत जात ।
नारायण पुनि चरचा होयगी, भवन भवन में प्रात ॥२७॥
दोहा—यों मेरी बँयां गही, यों रुखेपन हेरि ।
यों सिरसों गागरि पटक, यों ठाढो मग घेरि ॥२८॥

वार्तिक-

बतरात ही में निज स्वरूप प्रगट करिके आगे ठाढ़े हूँ
रहे ॥२९॥

* लालजी वचन *

राग मल्हार-

ठाढ़ी रही नव गोपकुमारी ।
बिन हमसों बूझे कित जावौ, तुमहीं नई आई पनिहारी ॥
इन घाटन मेरे कर लागे, जानत हैं सगरे नर नारी ।
नारायण सों बेग चुकावौ, गजगामिनि कटि केहरि वारी ॥३०॥

● सखी वचन परस्पर ●

दोहा—अरी सखी यह छल भयो, हम सब भोरी बाम ।
भेद नहीं जान्यो किनूँ, यह छलिया घनश्याम ॥३१॥

दादरा मल्हार-

कैसे भरें अब जल की गगरी ।
ललित त्रिभंग आगे हूँ ठाढ़ो, रोकि रह्यो नँदलाल डगरिया ॥
हम याकूँ जानत रहीं अबला, यह तौ निकस्यो श्याम झगरिया ।
नर सों नारि नारि सों नर पुनि, यह कौतुक होय याही नगरिया ॥
तासों कहा बस्यावँ जाने, बाँधी निलजताई की पगरिया ।
नारायण अँगुरी दांतन दे, भई अजरच ब्रजनारी सगरिया ॥३२॥

● सखी वचन ●

दोहा—रोकनहारे कौन तुम, हमें गैल नहिं देत ।
हम ह्याँके राजा सखी, निज कर तुम सों लेत ॥३३॥

● सखी वचन ●

शंशोटी का जिली-

चलि परे हटि रे काहे को इतरावँ ।
भूषण वसन दधि माखन चुरैया, अब कँसी कँसी बात बनावँ ॥
जिनके बसाये तुम उनहीं सों झगरत, निलज न नेक लजावँ ।
नित प्रति धेनु को चरैया नारायण, आज तू भूप कहावँ ॥३४॥

● लालजी वचन सखी प्रति ●

राम वंश सोरठा-

जोबन की माती इठलाती डोलै ग्वालिन, हमकूँ लगावत दोस ।
निज कर मांगे बिना मैं तोसों, और कहा लियो खोस ॥

लखि न परत तेरे मन की गति, छिन में हँसत छिन रोस ।
नारायण तोसी अबला के, धन्य जो बसत परोस ॥३५॥

* सखी वचन लालजी प्रति *

राग देश—

छाँड़ो मेरी डगर झगर जनि साँवरे, मोहि अति देर भई ।
कब की मैं आई जल भरिबे को, तँ बिच घेर लई ॥
सास ननंबिया देखत संग मोहि, नाम धरेंगी कई ।
यमुना को मिस करि गागरिया सिर धरि, जानें कहाँ तू गई ॥
लाज को रहिबो कठिनहि दीखे, कँसी करूँ हे बई ।
अब तो मैं जानि चुकी नारायण, होयगी चरचा नई ॥३६॥

* लालजी वचन सखी प्रति *

राग खम्माच—

जो इतनी तू लाज लजावँ ।
घर ही बँठ के जल न भरावत, वयों यमुना लौं दौरी आवँ ॥
तो समान या ब्रजमंडल में, कोऊ नहीं कुलवन्ती कहावँ ।
निज मन कपट बसत नारायण, सास ननँद को दोष लगावँ ॥३७॥

* सखी वचन सखी प्रति *

राग खम्माच—

एरी सखी याकूँ हम जानें ।
यह अपनी हठ नाहिं तर्जंगो, कबसों रोकि रखी हम याने ॥
हैं अबला की कौन चलाई, विधिना हू की कही नहीं माने ।
नारायण जोवन गरबीलो, मटक मटक के कुटिल भौं ताने ॥३८॥

❀ लालजी वचन सखी प्रति ❀

राग खम्माच का जिला वा रामकली-

तुमहीं कुलवन्ति मैं देखी आज,
मणि गागरि नागरि शीश धरी ।
टूग मीन से चपल चलत इत उत,
मुसिक्यान अधर छल छन्द भरी ॥
फरके सब अंग अनंग रंग,
भृकुटी अति कुटिल कमान खरी ।
तन रोम रोम सों नारायण,
चंचलताई की बरषं झरी ॥३६॥

वार्तिक--

तब सखी आपस में कहिबे लगी, अरी वीर ! याकूं बिना
कछु दिये छूटबे न पाओगी, ताते या सों बूझौ कहा कर मांगे ।
जब सखीन ने बूझी, तब लालजी बोले, सोऊ सुनो ॥४०॥

❀ लालजी वचन ❀

राग कालिगड़ा —

सो तुम सुनो सकल सुकुमारी ।
मैं नित जल शिवजी पै चढ़ाऊं, या बन सघन मझारी ॥
आज गयो मैं गऊ बिवायबे, एरी रूप उजारी ।
ता कारण सों बिना नहाये, मैं नहिं पूजे त्रिपुरारी ॥
तुम निज निज घट जल सों भरिके, अपनी अपनी पारी ।
नारायण चलि शम्भु न्हुवावौ, मो बदले ब्रजनारी ॥४१॥

❀ सखी वचन लालजी प्रति ❀

दोहा—हम कबहूँ देखी नहीं, कौन ओर वह ठौर ।
जहाँ बिराजत उमापति, देवन के शिरमौर ॥४२॥

* लालजी वचन *

जो तुम में मुखिया सखी, चलौ हमारे साथ ।
ठौर बतावै हम तुमैं, जहाँ भवानीनाथ ॥४३॥

* सखी वचन श्रीजी प्रति *

राग कालिगड़ा

तब सखियन ने कही सुनो प्यारी ।
पहले तुम यमुना जल भरिके, जाय पूजि आवौ त्रिपुरारी ॥
यह प्रिय वचन सुनत सजनी के, निज हिये हरषी राजदुलारी ।
नारायण ऊपर के मन सों, मैं न जाऊं कह भानुकुमारी ॥४४॥

* प्रियाजी वचन सखी प्रति *

राग कालिगड़ा-

मैं इनके संग इकली न जाऊं ।
बीर तिहारे नित तानेन सों, फिर कैसे मैं पीछौ छुटाऊं ॥
जैसी कछु तुम हौ सब जानूं, प्रकट कहते कहा फल पाऊं ।
नारायण मैं जानि बूझिके, क्यों अपने पट झार लगाऊं ॥४५॥

* सखी वचन श्रीजी प्रति *

राग परज-

साँचे ही तुम मन का अति भोरी ।
तुमको सदा हमारी ओर सों, बन्धो रहत है ब्रह्म किशोरी ॥
हमह तौ इकली इकली सब, इनके संग जायेंगी गोरी ।
नारायण फिर तुम क्यों डरपौ, जावौ बेगि भई देर न थोरी ॥४७॥

वातिक-

श्रीजीने कही अरी सखी ! जल तो मैं चढ़ाय आऊंगी पर
तुम कहूँ चलो मति जंयो, जब कंचनझारी जल सों भरिके

प्रीतम संग चली, तब मार्ग में लालजी ने कही हे प्यारी ! यह सब रचना आपही के मिलिबे कारण रची है, आप मुसिक्याय कं बोलीं सो तौ हम जानैं, फिर अपनी प्राणप्यारी कूं वन की शोभा दिखायबे लगे ॥४७॥

● लालजी वचन श्रीजी प्रति ●

जिला कविस-

देखो प्यारी विपिन में कैसी छबि छाय रही,
झुकि रहीं लता अति लगत सुहावनी ।
फूले फूल रंग रंग भँवर गुंजार करे,
ठौर ठौर कोकिला बोलत मनभावनी ॥
मृगिन के सहित मृग डोलत हैं इत उत,
चलत पवन तन तपनि नसावनी ।
कहै नारायण गोरी आपको आगम भयो,
तासों बनराज ने करी है पधरावनी ॥४८॥

वार्तिक—

यहाँ सब सखी परस्पर सोचिबे लगीं ।

राग टोड़ी—

देर भई क्यों न आई प्यारी ।
कं कहूँ डगर भूलि गई भोरी, कं मग चलत भयो श्रम भारी ॥
कं पूजन में बिलम लगी है, कं वन में निरखत फुलवारी ।
कं बिरमाय रखी रसिया ने, कं अबलों दूँढ़त त्रिपुरारी ॥
कं मग में कहूँ कांटो लागलौ, कं इकली निज भवन पधारी ।
कं छिपि रही खिजावन के हित, नारायण सोचत व्रजनारी ॥४९॥

* समाजी वचन *

दोहा—घट उठाय उतही चलीं, जहाँ दोउ वन माहि ।
जाय निहारे द्रुम तरे, ठाढ़े दै गलबाँहि ॥५०॥
सघन लता की ओट तें, छबि निरखत वृजबाल ।
भागि सराहत आपनो, पुनि २ होत निहाल ॥५१॥

राग विलावल—

आज इन दोउन पै बलि जंये ।
रोम रोम सों छबि बरसति है, निरखत नैन सिरंये ॥
रूप रास मृदु हास ललित मुख, उपमा देत लजंये ।
नारायण या गौर श्याम को, हिये निकुंज बसंये ॥५२॥

वात्तिक—

फिर सखी प्रगट होयके बोलीं, बबिहार लालजी महाराज !
भली पूजा करवायबे आये । तब आप बोले अरी सखी ! एक इन
के ही जल चढ़ायबे सों भोलानाथ प्रसन्न हूँ गये, अब तुम भले
ही जल भरौ । तब सखी दंडौत करिके बोलीं, धन्य हो पुजारीजी
महाराज ! ॥५३॥

दोहा—यह लीला भक्तन लिये, करत लाड़िली लाल ।
नारायण गावें सुनें, परं न यम के जाल ॥५४॥

इति भोनारायण स्वामीजी कृत नवपनिहारी लीला सम्पूर्ण ॥१४॥

अथ श्रीश्यामविरहिणी लीला प्रारम्भ

—* * *

* समाजी वचन *

दोहा—एक दिवस तिय भेष धरि, परम कौतुकी श्याम ।
विरहिनि बनि डोलत डगर, लैं लैं अपनो नाम ॥१॥

❀ विरहिनी वचन ❀

प्रोतम तो देखे बिना, छिन छिन कल्प बिहाय ।
बेगि दीजिये दरश अब, मो विरहिनि को आय ॥२॥

वार्तिक-

काहू सखी ने इनको देखि के श्रीजी सों जाय कही हे
प्यारी ! मैं एक अचरज देखि आई हूँ तब श्रीजी मे बूझी कहा,
पुनि सखी बोलो ॥३॥

❀ सखी वचन ❀

राग देश-

चलौ तौ बताऊँ तुमें भवन के द्वार ।
एक नारि विरहिनि भई डोलै, तन की नाहि संभार ॥
श्याम श्याम मुख नाम रटति है, सांवरी रूप अपार ।
नारायण ऐसी मोहि दीखति, है बड़ गोपकुमार ॥४॥

❀ समाजी वचन ❀

छप्पय-

सुनि सजनी के वचन, प्रिया मन में ललचाई ।
निरखन को वह नारि, द्वार पै दौरी आई ॥
दौरी आई द्वार, देखि वह सखी विरहिनी ।
पुनि ताके ढिग गई, आप इकली मृगननी ॥
कर गहि बूझत कौन तू, कहा लगाई श्याम धुनि ।
नारायण तू सांच कहि, हों आई तो दशा सुनि ॥५॥

❀ श्रीजी वचन विरहिनी प्रति ❀

पद सोरठ का जिला-

तोहि डगर चल कहा भयो री वीर ।
कहूँ पग को पायल कहूँ सिर को चीर,

भई बावरी न कछु सुधि बुधि शरीर ।
 तेरे मतवारेन सम झूमत नैन,
 मुख भाषति है तू अति विरह के बैन,
 मानो घायल काहू ने करी दृगन तीर ॥
 मोसो नारायण जिन राखै दुराव,
 जो तू कहै सोई तेरौ कहुँ उपाव,
 जासों रोगहू घटै हटै सकल पीर ॥६॥

❀ विरहिनी वचन श्रीर्जा प्रति ❀

राग गिरनारी सोरठ-

मैंने देखी री आज मोहन की हँसन ।
 अधरन पै अद्भुत अरुणाई, मुतियन की लर पाँति दशन ॥
 वा शोभा के दृग रहे प्यासे, पीबे लगे भरि भरि के पसन ।
 नारायण तब सों मोहि सजनी, सुधि न रही निज वदन बसन ॥७॥

वातिक ।

प्रियाजू ने बूझी अरी ! तँने उनकू कहां देख्यो है ॥८॥

❀ साँवरी वचन ❀

राग आतावरी-

आज सखी भोरही मैं पनियां गई री ॥
 साँवरो सलोनी एक बड़े बड़े नैन जाके,
 जनुना के तट मोसों भेंट भई री ।
 देखि अति रूप वाको नेह उर हार भयो,
 ताही समय लाज को तिलांजली दई री ।
 उन बिन कल न परत नारायण,
 कैसी घरी लगी लगन नई री ॥९॥

❀ श्रीजी वचन विरहिनी प्रति ❀

राग कान्हड़ा बाणेश्वरी-

सखी क्यों बौरी भई है वा छलिया के वियोग ।
भूलि के नाम न लीजो श्याम को, चरचा करेंगे लोग ॥
तू सुकुमार कठिन मग नेह को, नहि श्रम तेरे जोग ।
नारायण बिन जाने बूझे, तू मति लगावैं तन रोग ॥१०॥

❀ विरहिनी वचन श्रीजी प्रति ❀

राग जोगिया आसावरी-

सखी मेरे मन की को जाने ।
कासों कहूँ सुने जो चिद दै, हित की बात बखाने ॥
ऐसो को है अन्तरयामी, तुरत पोर पहुँचाने ।
नारायण जो बीति रही है, कब कोई सच माने ॥११॥

वात्तिक--

प्रियाजू ने कही, अरी ! तू घबरावैं मति नेक धीरज
राखि ॥१२॥

❀ विरहिनी वचन श्रीजी प्रति ❀

लावनी की राह-

सखी कंसी करूँ मैं हाय, न कछु वश मेरो ।
बिन देखे साँवरो चन्द, दृगन में अंधेरो ॥
सखी ऐसो सुन्दर नहि कोऊ, मैं सब जग हेरो ।
वाकी जो लिखैं तसबीर, सो कोन चितेरो ॥
सखी कठिन छैल को विरह, आनि मोहि घेरो ।
सगरो निशि तारे गिनत ही, होत सबेरो ॥

सखी जो तू मिलावै आज, वह रूप उजेरो ।
 जबलों जीवोंगी, गुण न भूलूंगी तेरो ॥
 सखी नारायण जो न मिले, वह मन को लुटेरो ।
 तब नन्द द्वार पै, जाय करूंगी डेरो ॥१३॥
 दोहा—नन्द भवन जानूँ नहीं, एरी राजकुमारि ।
 नेक दया करि संग हूँ, लं चलि वाके द्वारि ॥१४॥

ॐ श्रीजी वचन विरहिनी प्रति ॐ

राग कालिगड़ा—

उठि सजनी चलि तोहि बताऊँ, सन्मुख नन्द को द्वार दिखावै ।
 तू कित धावति है पुर बाहर, मो पोछे भटु क्यों नहि आवै ॥
 एक एतौ हिय में डर मोकूँ, जो कबहूँ यशुमति लखि पावै ।
 नारायण मन में जानेंगी, यह सब ब्याधि यही संग लावै ॥१५॥

ॐ समाजी वचन ॐ

दोहा—नन्द द्वार पै गई जब, कपट विरहिनी बाम ।
 पुनि पुनि अति अकुलाय के, लेति श्याम को नाम ॥१६॥

ॐ विरहिनी वचन ॐ

राग काफ़ी—

बेदरदी तोहि दरद न आवै ।
 चितवन में चित दश करि मेरो, अब काहे को आँख चुरावै ॥
 कबसों परी तेरे द्वारे पै, बिन देखे जियरा उकलावै ।
 नारायण महबूब साँवरे, घायल करि फिर गेल बतावै ॥१७॥

वार्तिक—

श्रीजी ने कही अरी ! सखी तू तौ यहाँ बँधि, अरु मैं तो
 अब जाऊँ, कछु तेरे संग मोहि बाबरी तौ नहि हों, तब

विरहिनी बोली अजी ! अब मैं कंसी करूँ, तब श्रीजी ने कही
यहाँ तो यशोदाजी देखेंगी, चल तोहि और ठौर बंठाऊँ वहाँ सूँ
तू उनकूँ देखि लीजो ॥१८॥

● साँवरी वचन ●

राग ईमन कल्याण—

तैंडी बांकी चितवन, सानूँ प्यारी लगदी, साँबला मेंढा दिलदार ।
सोहनी सूरत बड़ी बड़ी अँखियां गल बिच गजमुतियन दा हार ॥
एक नजर तुम हँसकर देखौ बारूँ में जियरा हजार बार ।
नारायण असीं रूप दिवानी आय परी अब तैंडे द्वार ॥१९॥

● श्रीजी वचन विरहिनी प्रति ●

राग बेश का जिला—

सखी तू मति ले वाको नाम, नहीं पछितावंगी ।
मन कपटी मुख मीठी बोलै, कली कली रस चाखत डोलै,
ऐसे सों करि प्रीति कहा फल पावंगी ॥
मेरी कही तू चित न धरति है, जासों मोहि अब जान परति है,
तू अपने सुन्दर तन रोग लगावंगी ।
नेह किये कछु हाथ न आवै, लोक लाज कुल धर्म नसावै,
नारायण तू नाहक जगत हँसावंगी ॥२०॥

● विरहिनी वचन ●

राग काफी—

बिन देखे मन माने न मेरो ।
श्याम वरण चित हरन लाडिलो, रूप सुधा नित जगत उजेरो ॥
चाल मराल मनोहर बोलन, चपल नयन मो तन हँसि हेरो ।
नारायण त्रिभुवन को स्वामी, हों वृषभानुकुमरि को चैरो ॥२१॥

वार्तिक—

जब विरहिनी ने अपने कूँ चैरो कहा, तब प्रियजी अचरज मानिके सखी सों बूझिबे लगी, अरी ! ललिता ! यह लुगाई हूँके फिरि लोग कैसे बनिबे लगी जो आपकूँ चैरो बनावै चैरी बने तौ एक बात है ॥२२॥

बोहा—ललिता लखि नवलाल को, बोली सुन शिरमौर ।

बिन प्रीतम चैरे चतुर, चैरी बन न और ॥२३॥

सोरठा—

सुनि ललिता के बँन, प्यारी निज मन में हरष ।

मानो छबि को ऐन, पुनि पुनि निरखत लाल मुख ॥२४॥

वार्तिक—

धन्य हौ लालजी महाराज, जो काहू की बहू बेटी होते तो भला काहू को घर तोऊ बसावते ॥२५॥

❀ श्रीजी वचन लालजी प्रति ❀

राग ध्रुपद कान्हड़ा दरबारी—

आज भले बने लाल, अद्भुत नई ब्रज की बाल,
दृगन सोहै कजरा, अति मीठी मीठी करत बात ।
अंगिया मनमोहनहारी, दामिन की शोभा न्यारी,
झोती नव चूनरी में, झलकत है श्याम गात ॥
हाथन में चूरी, माथे सुतियन की माँग भरी,
कानन में झुमका पग बिछियन धुनि अति सुहात ।
नारायण बार बार, प्रीतम की छबि निहार,
अचरा मुख दैके प्यारी, मन्द मन्द हँसत जात ॥२६॥

वातिक

लालजी बोले—हे प्यारी ! आपने तौ कही हुती कि अब तुम्हारे छल में हम कभू न आवेंगी अब कैसे आई ? श्रीजी ने कही तिहारे प्रसन्न करिबे कूं ॥२७॥

दोहा—यह लीला श्रीलाल की, चारि पदारथ देत ।

नारायण गावे सुने, युगल प्रीति के हेत ॥२८॥

इति श्रीनारायण स्वामीजी कृत श्यामविरहिरो लीला सम्पूर्ण ॥२९॥

अथ युगलछन्द लीला प्रारम्भ

• समाजी वचन •

दोहा!—श्याम सखी को भेष धरि, डोलत अपने द्वार ।

नारायण झाँकत कभू, अचक किवार उघार ॥१॥

उतसों आवत लाड़िली, संग सखी बहु भीर ।

देख सांवरी विकल सी, बूझति गौर शरीर ॥२॥

• श्रीजी वचन सांवरी प्रति •

राग कालिगड़ा —

सखी तू इत उत क्यों डोल रही ।

कै कछु वस्तु गिरी मारग में, कै निज गति छबि तोल रही ॥

कबहुँक नन्दभवन को द्वारो, उझकि अचक तू खोलि रही ।

नारयण नहिं दीखत कोऊ, कौन सो हँसि हँसि बोल रही ॥३॥

• सांवरी वचन श्रीजी प्रति •

राग वैश—

सखी जब सों नन्दलाल निहारे ।

तबही सों बौरी भई डोलूँ, इत उत गली गिरारे ॥

शीस मुकुट शिर पेंच रतन को, लसत बार घुंघरारे ।
 खंजन नैन मैनमद गंजन, अंजन रेख समारे ॥
 कूंडल लोल कपोल मनोहर, कोटि भानु उजियारे ।
 मानो रूपसिंधु में खेलत, मकरन के द्वं बारे ॥
 मंद हंसन मुख श्याम बरन छवि, शशि मनोज लखि हारे ।
 वशन पाँति ज्यों मुतियन को लर, अधर सोहैं अरणारे ॥
 नाक बुलाक कुटिल बर भृकुटी, वचन रचन अति प्यारे ।
 नारायण नखशिख शृंगार करि, ठाढ़े भवन के द्वारे ॥४॥

* श्रीजी वचन सखी प्रति *

राग सारठ का जिला-

मनमोहन जाकी दृष्टि परत, ताकी गति होत है और और ।
 न सुहात भवन तन अशन वसन, बन ही कूँ धावत दौर दौर ॥
 नहिं धरत धोर हिय विरह पीर, व्याकुल भई भटकत ठौर ठौर ।
 कबहूँ अँसुवन भरि नारायण, मग झाँकत डोलत पौर पौर ॥५॥

* सखी वचन श्रीजी प्रति *

राग सोरठ-

जाहि लगन लगै घनश्याम की ।
 धरत कहूँ पग परत है कितहूँ, भूलि जाय सुधि धाम की ॥
 छवि निहार नहिं रहत सार कछु, घरी पल निशिदिन याम की ।
 जित मुंह उठै तितं ही धावै, सुरति न छाया घाम की ॥
 कोई करौ निन्दा कोई अस्तुति, मेड़ तजी कुल ग्राम की ।
 नारायण बौरी भई डोलै, रहै न काहूँ काम की ॥६॥

● श्रीजी वचन सखी प्रति ●

राग देश—

साँवरे की जिन निरखी मुसिफयान ।
सो तौ भई घायल ताही छिन, बिन बरछी बिन धान ॥
कल नहिं लेति धरति नहिं धीरज, तलफति मीन समान ।
नारायण भूली सुधि तन की, बिसर गयो सब ज्ञान ॥७॥

● साँवरी वचन ●

राग झंझोटी—

साँवरे क्यों मोसों रिस मानी ।
तेरे काज घरबार त्यागि के, गलियन फिरत दिवानी ॥
लोकलाज कुलरीति प्रीति जग, इनहूँ को दियो पानी ।
नारयण अब तौ हँसि चितवौ, एरे रूप गुमानी ॥८॥

● श्रीजी वचन साँवरी प्रति ●

राग देश—

साँवरे बदन छबि सदन मदन मद, गंजन अंजन दृग रेख ।
अतिही विकल नहीं जिय में परत कल, जब सों श्याम लियो देख ॥
डोलत डगर बड़ गोपकुमरि हूँ, तजि कुल लाज विशेख ।
नारायण नहिं मिटत सखी जो, लिख्यो विधाता लेख ॥९॥

साँवरी वचन

राग काफी—

यह नैना रिझवार नये री ।
एक बेर लखि रूप लाल को, तजि घरबार फकीर भये री ॥
अब देखे बिन डारत आँसू, युग समान पल बीति गये री ।
नारायण येह अति चंचल, फल पाये जो धीज बये री ॥१०॥

श्रीजी वचन

दोहा—आमिनि तू भोरी निपट, जादू मुख घनश्याम ।
वाकी ओर निहारि के, बस्यो कौन को धाम ॥११॥

❀ साँवरी वचन ❀

राग भैरवी-

अब मैं कैसी करूँ री बीर ।
हैं तो घनो चाहूँ न करूँ सुधि, मन तो धरत न धीर ॥
जो घायल उन नैन बान को, सो जानत यह पीर ।
नारायण करि गयो बाबरी, सुन्दर श्याम शरीर ॥१२॥

❀ श्रीजी वचन ❀

दोहा—जाकी तू घायल फिरै, निज कुललाज बिहाय ।
सो अब मेरी समझ में, गयो चरावन गाय ॥१३॥

वार्तिक ।

साँवरी बोली, हे सखी ! मैं अब कैसी करूँ ॥१४॥

❀ श्रीजी वचन ❀

झंसी का जिला-

जौलों श्याम विपिन ते आवैं ।
तौलों तू चलि भवन हमारे, काहू विधि तो मन बहलावैं ॥
भलो नहीं यों डगर डोलिबो, ब्रजवनिता मिलि दोष लगावैं ।
नारायण बलि प्रीति मानिके, हम तेरे हित की समझावैं ॥१५॥

❀ साँवरी वचन ❀

दोहा—गुण मानूंगी आपको, एरी परम सुजान ।
काहू विधि मोसों मिले, मेरो जीवन प्रान ॥१६॥

वार्तिक-

तब श्रीप्रियाजी इनकूं अपने भवन में लिवाय ले गईं ॥१७॥

❀ समाजी वचन ❀

दोहा—वहाँ जाय पुनि सांवरी, लै लै ठंडे श्वास ।

विरह वचन भाषन लगी, श्याम मिलन की आस ॥१८॥

❀ सांवरी वचन ❀

कब आवेंगे हे सखी, बन ते मोहन लाल ।

यों कहिके भुईं पै गिरि, जैसे कोउ बिहाल ॥१९॥

❀ श्रीजी वचन ❀

अरी सखी ये कहा भयो, झटपट देखो आय ।

मो माथे याको कहूँ, मति कलंक लगि जाय ॥२०॥

वार्तिक

सखी देखिके बोली हे प्यारी ! याको तौ यही
उपाय है ॥२१॥

दोहा—आप श्याम को भेष धरि, तनक दूरि पै जाय ।

हाथ लकुट कटि पीतपट, आवौ धेनु लिवाय ॥२२॥

वार्तिक-

फिरि यासों हम कहेंगी देखि री ! नन्दलाल बन तें गऊ
चराय के आवें तब याकूं चेत होयगो ॥२३॥

दोहा—बहुत भली कहि लाडिली, धरि प्रीतम को भेष ।

आवत धेनु लिवाय के, बंशी शब्द विशेष ॥२४॥

वार्तिक—

इतमें सांवरी कष्टुक चेत में आयके बोली ॥२५॥

राग काफी—

लाल तेरे जादू भरे दोऊ नैन ।
चितवन में चित वश करि लेवें, मोहनी मंत्र है सैन ॥
अति बाँके सुन्दर मतवारे, अनियारे छबि ऐन ।
नारायण इनके बिन देखे, पल छिन परत न चैन ॥२६॥

वात्तिक—

जब श्रीजी प्रीतम भेष सों पधारी तब सखी बोली ॥२७॥

● सखी अरु सांवरी के वचन ●

राग ध्रुपद ईमनकल्याण—

देख सखी नन्दलाल, साथ लिये ग्वालबाल,
आगे आगे धेनु पाछे, आवत बंशी बजात ।
कानन पै कदम फूल, अटपटे चीरी के पेच,
घुंघरारी अलकें बदन, गोरज सों अति सुहात ॥
सो शोभा कहि न जाय, जब ये हँसत खिलखिलाय,
मानों मुख सों छबि की झरी, एक संग बरस जात ।
नारायण एरी बोर, अब नहिं मन धरत धीर,
ऐसो मोहि जिय में आवै, झपट मिलूँ याके गात ॥२८॥

● समार्जी वचन ●

बोहा—मिलत लाल को सांवरी, गिरी बांसुरी भूम ।
निरखि सखी हँसिबे लगीं, मची ठठोली धूम ॥२९॥

वात्तिक—

फिर सखीन ने दाही भेष सों श्यामसुन्दर को नवदुल-
हिन अरु श्रीकृशोरीजी को नवदूलह बनायके भाँवरे पार,
आप बनरा गायबे लगीं ॥३०॥

राग शहानो-

या बनरे पै मैं जाऊं बलिहारी ।
जाहि मिल्यो ऐसो बर सुन्दर, सो बनरी बड़ भागिनवारी ॥
गौर बरन केशरिया बागौ, कटि पटका बाँधे जरतारी ।
शीस मोर माथे पै सेहरा, कानन में मुतियन छबि न्यारी ॥
हाथन मेहुँदी रची कर कंकन, जाहि निरखि रतिपति मति हारी ।
नारायण लखि रूप मनोहर, सफल भईं अब आँख हमारी ॥३१॥

वातिक-

ता पीछे युगल सरकार निकुंज पधारे, सखी अपनी अपनी
सेवा पै ॥३२॥

दोहा—भक्ति सुधारस देत है, यह लीला ब्रजनाथ ।
नारायण तजि तरकना, सुने प्रीति के साथ ॥३३॥

इति श्रीनारायण स्वामोजी कृत युगलद्वय लीला सम्पूर्ण ॥१५॥

अथ श्रीप्रथमअनुराग लीला प्रारम्भ

—❀❀❀❀❀—

❀ समाजी वचन ❀

दोहा—ननंदि भवन दुलरी धरी, लंन चली ब्रजनार ।
अपर सखी बरजन लगी, तू जिन निकसे द्वार ॥१॥

राग देवा-

सखी तोहि दूँ दूत है नन्दलाल, कहूँ मति जावँ री ।
तेरी सौँ अबही यहाँ आयो, घनी देर मोसों बतरायो,
तोहि देखिबे कारण फिरि फिरि आवँ री ॥
आज काल सिगरे ब्रज माहीं, रूपवान तेरे सम नाहीं,
तेरे बदन के आगे चन्द लजावँ री ॥

नारायण मोहि यह डर भारी, जो वासों भइ भेंट तिहारी,
फिर जाने वह कहा कलङ्क लगावँ री ॥२॥

* सखी वचन नवनागरी प्रति *

राग जंजवन्ती प्रभाती—

मेरो कह्यो अब मान सहेली, तू जिन बाहर निकस अकेली ।
आजकालि तेरे जोवन की, घर घर में चरचा है हेली ॥
मनमोहन तेरे निरखनको, डगर बगर नित फिरत नवेली ।
नारायण वासों बचि आवँ, तौ मेरी तू गुरु में चेली ॥३॥

* समाजी वचन *

दोहा—समझाई बहु भांति सों, कहिके वचन अनेक ।
बरजोरी गोरी चली, कही न मानी एक ॥४॥

राग मल्हार—

थोरी दूर जब गई ब्रजनारी ।
आगे ते आवत मनमोहन,
भेंट भई तब डगर मंजारी ॥
नव शृंगार हंसन अवलोकन,
श्याम वरन शशिमुख छबि न्यारी ।
नारायण लखि रूप लाल को,
तन मनकी सब सुरति बिसारी ॥५॥

दोहा—लाल गये निज भवन तब, सखी भई गति और ।
नैनन सों लरिबे लगी, विकल परी वा ठौर ॥६॥

* विरहिनी वचन *

राग काफी

नैनो रे चितचोर बतावौ ।
तुमही रहत भवन रखवारे, बाँकि बीर कहावौ ॥

तिहारे बीच गयो मन मेरो, चाहे जिती सौं खावौ ॥
 घर के भेदी बंठि द्वार पैं, दिन में घर लुटवावौ ॥
 अब क्यों रोवत हौ बईमारे, कहूँ तौ थांग लगावौ ॥
 नारायण मोहि वस्तु न चाहिये, लेनेहार दिखावौ ॥७॥
 दोहा—एक सखी निकसी उतैं, तिन देखी मगमाहिं ।
 निकट जाय बूझन लगौं, बिरहनिकी गहि बाहिं ॥८॥

❀ सखी वचन अपर सखीन सौं ❀

राग कालिगढ़ा—

यहाँ लग नेक आवो ब्रजनारी ।
 या सजनी कों कहा भयो है, लोटति धरनि मँझारी ॥
 कैं काहू की दृष्टि लगी है, सुन्दर रूप निहारी ।
 कैं दृग बान मृगी उर मारे, काहू बड़े शिकारी ॥
 भयो कहा याकूँ मारगमें, सुधि बुधि सकल बिसारी ।
 नारायण कछु कहत न आवे, गोविन्दकी गति ग्यारी ॥९॥

❀ सखी वचन नवनागरी प्रति ❀

सोरठ का जिला—

सखी तू कैसें अचेत परी ॥
 चोर संभारि निहारि बावरी, दूटि रही दुलरी ॥
 जा बिरियां तू गई ननेंद गृह, जाने वो कैंसी घरी ॥
 नारायण मग में कहूँ डरपी, बात यही सगरी ॥१०॥

❀ नवनागरी वचन ❀

राग कालिगढ़ा—

सखी तब सौं चैन नहिं आवैं,
 जब सौं मैं निरखयो नन्दलाल, गल मुतियन माल सुहावैं ॥

घुंघरारी अलकें मुख राजें, कोटि मदन दृग छबि लखि लाजें,
 कुण्डल हलन चलन श्रवनन में वंशी मधुर बजावें ॥
 सुधि बुधि हरण वचन हँसि बोलैं, चाल मराल इतें उत डोलैं,
 बजत चरण छुम छननन नूपुर, ताहू पै मुसिक्यावें ॥
 कर कंकन पहुँची मणि झलकें, देखि स्वरूप लगत नहिं पलकें,
 नारायण बेतर को मोती, लटकत हिये समावें ॥११॥

* सखी वचन *

दोहा—जितनी तू वा छैल की, सुरत करंगी बीर ।
 तितनी व्याकुल होयगी, धरि न सकंगी धीर ॥१२॥

* नवनागरी वचन सखी प्रति *

राग मल्हार

नहिं बिसरति सखी श्याम की सुरतियाँ ॥
 हँसन दशन धृति दामिनी सी दमकन,
 चन्द से बदन सों अति मृदु बतियाँ ॥
 कुण्डल झलक लखि लग न पलक,
 नकबेसरि की हलन चलन गज गतियाँ ॥
 नारायण जब निरखूं लाल कूं,
 सफल नैन शीतल हूँ छतियाँ ॥१३॥

* सखी वचन नवनागरी प्रति *

दोहा—अरी सखी तू बहुत अब, लँ न श्याम को नाम ।
 घरचा होगी जगत में, हँसी करे ब्रजबाम ॥१४॥

* नवनागरी वचन *

राग रेखता-

मन हरि लियो है मेरो, वा नन्द के दुलारे ।
 मुसिक्याय के अदाँ सों, नैनों के कर इशारे ॥१५॥

इक दृष्टि ही में वाने, जाने कहा कियो है ।
 नहिं चैन रैन दिन में, वाके बिना निहारे ॥मन०॥२॥
 चोरे के पेच बाँके, शिर मुकुट शुभि रद्यो है ।
 कटि किंकिनी रतन की, नूपुर बजत हैं प्यारे ॥मन०॥३॥
 बेसरि बुलाक सोहै, गल मोतियन की माला ।
 कंकण जडाऊ कर में, नख चन्द सों उजारे ॥मन०॥४॥
 छत्रि देत आरसी से, सुन्दर कपोल दोऊ ।
 बरछी समान लोचन, नइ सान पै समारे ॥मन०॥५॥
 फूलन के हाथ गजरे, मुख पान की ललाई ।
 कानन में मोती बाले, कुण्डल ह झलकें न्यारे ॥मन०॥६॥
 लखि शमाम की निकाई, सुधि बुधि सकल गँवाई ।
 बीरी बनाय मोकों, कित गयो वंशोवारे ॥मन०॥७॥
 जन्तर अनेक मन्तर, गण्डा तबीज टोना ।
 स्याने तबीब पण्डित, करि कोटि जतन हारे ॥मन०॥८॥
 नारायण इन दृगन ने, जब सों वह रूप देखयो ।
 तब सों भये हैं ध्यानी, उघरत नहीं उघारे ॥मन०॥९॥१५

वार्तिक-

अरी ! चुप रह बावरी क्यों जगत हंसावे, नेक तो धोरज
 राखि ॥१६॥

ॐ नवनागरि वचन सखी प्रति ॐ

राग कार्लिगड़ा-

सखी ये दृग वा रूप लुभाने ।
 मचलि रहे शशिमुख निरखन कों, जा विधि बाल अयाने ॥
 लोकलाछ कुलधर्म खिलौना, दिये तऊ नहिं माने ।
 नारायण सोऊ इन फोरे, ऐसे निडर सयाने ॥१७॥

* सखी वचन नवनागरी प्रति *

राग देश सोरठ-

सखी तू जान दे, वाकी अधिक न सुधि कर वीर ।
 है अति ही निर्मोही सांबरो, नहि जानत पर पीर ॥
 प्रीतिमाहि फल प्रगट देखि तू, ढरकावत दृग नीर ।
 नारायण इतनी न विकल हो, नेक हिये धरि धीर ॥१८॥

* नवनागरी वचन सखी प्रति *

राग झंझोटी का जंगला

श्याम दृगन की चोट बुरी रो ।
 ज्यों ज्यों नाम लेत तुम वाको, मो घायल पे नौन पुरी रो ॥
 ना जानूं अब सुधि बुधि मेरी, कौन विपिन में जाय दुरी रो ।
 नारायण नहि छूटत सजनी, जाकी जासों प्रीति जुरी रो ॥१९॥

* सखी वचन नवनागरी प्रति *

दोहा—भामिनि तू जाने नहीं, या मारग की सार ।
 कुल कलंक सब जग हँसै, चरचा हूँ घरबार ॥२०॥

* नवनागरी वचन *

राग ईमन दादरा-

लगन नहि छूट एरी बीर ।
 ताने देउ भले नाम धरौ चाहें कोटि करो तदबीर ॥
 क्षण में करत चतुर को बीरा, नृप कों करत फकीर ।
 नारायण अब कठिन है बचिबो, बिधे हिये दृग तीर ॥२१॥

वात्तिक-

तब सखी ने कही अरी ! तू अब घर में चलि के भोजन पानी करि, तेरे दुःख दूर होयबे को उपाय करेगी ॥२२॥

❀ विरहिनी वचन ❀

राग कालिगढ़ा—

मोपे कंसी ये मोहनी डारी । चितचोर छैल गिरधारी ॥
गृह कारज में जी न लगत है, खान पान लगे खारी ।
निपट उदास रहति हूँ जब सों, सुरति देखि तिहारी ॥
संग की सखी देति मोहि धीरज, वचन कहत हितकारी ।
एक न लगत कही काहू को, कहत कहत सब हारी ॥
रही न लाज सकुच गुरुजन की, तन मन सुरति बिसारी ।
नारायण मोहि समझि बावरी, हँसत सकल नरनारी ॥२३॥

❀ सखी वचन अपर सखी प्रति ❀

राग शहानो—

तुम ऐसो कष्ट जनत बिचारो ।
जा बिधि सों या अति विरहिनि को,
आय मिलै व्रजराज दुलारो ॥
जो कष्ट बीति रही अब यापे, को याके बिन जाननहारो ।
नारायण जौलों जीवंगी, मानैगो गुण अधिक तिहारो ॥२४॥

❀ समाजी वचन ❀

दोहा—एक सखी उठि तुरत ही, लाई श्याम लिवाय ।
विरहिनि सों कहि देखि री, को ठाढ़ो ढिग आय ॥२५॥

* नवनागरी वचन सखी प्रति *

राग सोरठ—

सखी री यह मेरो छितघोर ।

भृकुटी कुटिल बंक्र अवलोकनि, सुन्दर नवलकिशोर ॥

गैल चलत मैं सहर्जाहिं निरखी, या छलिया की ओर ।

नारायण जाने कहा कीनो, इन लखि नैनन कोर ॥२६॥

* सखी वचन लालजी प्रति *

राग लम्माच—

लाल इती विनती सुनि लीजै ।

जा विधि याहि चेत हूँ तन की, सो उपाय बलि बेगहि कीजै ॥

महिं सुधि वदन वसन भूषण की, छिन छिन छटा रूप की छीजै ।

नारायण या अति विहाल को, ज्यों त्यों जीव दान अब दीजै ॥२७॥

वात्तिक—

लालजी बोले हमने तो याको कष्टु नहिं कियो, परन्तु एक
मन्त्र हमको आवै है सो याके कान में कहिये सो यह अच्छी
हूँ जायगी ॥२८॥

* समाजी वचन *

दोहा—उझकि सखी के कान में, कही लाल यों बात ।

बंशोवट यमुना निकट, तोहि मिलूंगो प्रात ॥२९॥

वात्तिक—

या वचन के सुनते ही सखी झटपट उठि बंठी ॥३०॥

दोहा—या लीला कों जो सुनै, करि मन में विश्वास ।

नारायण मन कामना, पावै विना प्रयास ॥३१॥

इति श्रीनारायण स्वामीजी कृत प्रथम अनुराग लीला सम्पूर्ण ॥१७॥

अथ चौसर लीला प्रारम्भ

—ॐ—

ॐ समाजी वचन ॐ

दोहा—रैन दिवारी घर बगर, दीपदान चहुँ ओर ।
 यह शोभा देखन चले, नागर नन्दकिशोर ॥१॥
 छवि निरखत ब्रज गलिन की, गये प्रिया के द्वार ।
 उझकि झाँकि खाँसन लगे, रसिक रूप रिझवार ॥२॥

ॐ सखी वचन श्रीजी प्रति ॐ

राग देश—

प्यारी तेरे काजे कोऊ ठाढ़ी द्वार ।
 अति ही चतुर प्रगट नहि बोलत, खाँसत बारम्बार ॥
 करत प्रकाश फिरत मन्दिर ढिग, पग नूपुर झनकार ।
 देखि री कौन कहाँते आयो, बूझि किवार उधार ॥
 निशि आधी मग फिरत पहुँचा, सोबत सब संसार ।
 नारायण या बिरियां को है, बिन बजराजकुमार ॥३॥

ॐ श्रीजी वचन सखी प्रति ॐ

राग कामोद—

सखी मोहि योही करौ बदनाम ।
 मैं घर सों बाहर नहि निकसो, नैन न देखे श्याम ॥
 पीठि पिछार करौ तुम चरचा, लै लै मेरो नाम ।
 कौन कौन को मुख पकरुँ मैं, तुम सब एकसी बाम ॥
 झूठ साँच इत उतै लगावौ, यही तिहारो काम ।
 नारायण अब नेक दया करि, बसन देओ या ग्राम ॥४॥

वातिक-

फिरि सखीन ने मुसिक्याय के कही, हे प्यारी ! हमने तो हंसि के कही है, आप बुरो मति मानो, परन्तु कछु और हू आपने सुनी है, श्रीलालजी यों कहैं कि चौसर के खेल में कौन को सामर्थ्य है जो हम सों जीति सकैं, जो आप की आज्ञा होय तो उनको बुलाय के चौसर में हरावैं और तारी बजावैं राति दिवारी की है । आपने कछु मुख फेरि के कही, तिहारी राजी ॥५॥

दोहा—एक सखी हंसि के उठी, खोले तुरत किवार ।
चली लाल भीतर भवन, बोलत भानुकुमार ॥६॥

● अपर सखी वचन लालजी प्रति ●

तुम चौसर के खेल में, अति प्रवीण हो लाल ।
आज तनक हमहूँ लखें, चतुराई की चाल ॥७॥

वातिक -

लालजी बोले बाजी कहा । सखी बोली मैं अपना लाल यां चित्रसारी मैं छोड़ि देऊंगी, जो हारे सो पकर ॥८॥

● समाजी वचन ●

दोहा—हंसि हंसि खेलत युगल वर, चाल परस्पर हेरि ।
जीत हार को चोंप पै, डारत पाँसे फेरि ॥९॥

● सखी वचन परस्पर ●

राग ध्रुपद वरवारी कान्हड़ा-

चौसर खेलत हैं आज, गोर श्याम रसिक राज,
ललितादिक ढिग समाज, चाल को बतावैं ।

छक्के पँजड़ी अठारें, कबहुँ परत पूरे बारें,
रंग रंग नरद चलत, अति ही शोभा पावें ॥
प्यारी हिय अधिक चाव, अपनो जव परत दाँव,
लपक झपक झट ही चोट, गोट पै चलावें ।
प्रीतम निज देखि हार, झगरत हैं बार बार,
नारायण जीती कुमरि सन्मुख मुसिक्यावें ॥१०॥

ॐ श्रीजी वचन ॐ

राग ईमन—

हँसि हँसि प्रीतम सों कहै प्यारी ।
मनमोहन अब क्यों खिसियावो, कहा भयो एक बाजी हारी ॥
कहे सुने को बुरो न मानो, तुम समान है कौन खिलारी ।
नारायण उदास जिन होवो, अब की हूँ है जीत तिहारी ॥११॥

वार्तिक

फिर सखीन ने पीजरे में ते लाल निकासि के चित्रसारी में
छोड़ि दियो, अरु लालजी सों बोलीं—अब आप पकरो और
हमें तौ नींद लगि रही है, जाय के सोवें । तब श्रीजी ने कही
गवाह कौन रहैगो ? सखी बोलीं गवाह आप रहौंगी, या प्रकार
कहि के किवारं मूँदि के चिक डारि दई ॥१२॥

दोहा—ये लीला ब्रजचन्द की, श्रवण करै जो नित्त ।
नारायण प्रीतम प्रिया, बसिहैं ताके चित्त ॥१३॥

इति श्रीनारायण स्वामीजी कृत चौसर लीला सम्पूर्ण ॥१८॥

अथ सखी स्वण्डिता लीला प्रारम्भ

— ❁ —

वासिक—

एक समय श्रीलालजी महाराज व्रजगलियन की शोभा
निरखत भए चले जाय रहे, मार्ग में एक सखी अपनी अटारी
की खिरकी मे ते उज्जकि के बोली ॥१॥

* सखी वचन *

दोहा—भाज अकेले या समय, कहाँ पधारे श्याम ।
नेक हमारे भवनहु, आय करौ विश्राम ॥२॥

* लालजी वचन *

तनक देर में बगदि के, आऊंगो तो पास ।
मृगनयनी अब राख तू, मो वचनन विश्र्वास ॥३॥

* समाजी वचन *

आप गये प्रिय के भवन, यहाँ सखी बेचैन ।
छिन भीतर छिन द्वार पै, बीति गई सब रैन ॥४॥

* सखी वचन *

राग कालिगढ़ा व जट—

श्यामसुन्दर अबहूँ नहिं आये ।
दीप की जोत उदास लगत हैं, तारागण सब गगन बिलाये ॥
अदृगशिखा बोलत हैं कबसों, फिरत न पहरू पथिक मग धाये ।
कमलन के मुख खिले चहत हैं, फूल कमोबिनि के मुरझाये ॥
गोरस मथन लगीं व्रजवनिता, मिलि चकई चकवा हरषाये ।
नारायण पियकों बिरभाके, किन सजनो निज भाग मनाये ॥५॥

❀ समाजी वचन ❀

दोहा—बड़े भोर आई सुरति, रसिक शिरोमणि श्याम ।
 बाट निहारति होयगी, उत में वह बजवाम ॥६॥
 पीताम्बर की भूल में, नीलाम्बर तन धार ।
 नूपुर शब्द बचाय के, पहुँचे वाके द्वार ॥७॥
 ❀ और सखी वचन या सखी प्रति ❀

राग कालिगड़ा—

उठि देखी सखी छवि नन्दलाल ।
 मीड़त नैन उनींड़े रैन के, आवत हैं डगमगी चाल ॥
 पगिया पेच हूँ रहे ढीले, अलकावलि वर बिथुरी भाल ।
 नारायण प्रीतम की शोभा, तू लखि के होगी निहाल ॥८॥

राग लट—

देखि सखी प्रीतम की शोभा,
 निज नैनन को भाग मना री ।
 अद्भुत देत बहार बदन पै,
 बिथुर रहीं अलकें घुँघरारी ॥
 मुख भोरापन दृग अलसाने,
 कोटि मदन कीजँ बलिहारी ।
 मानों चञ्चलता तजि खंजन,
 राजत ललित रूप फुलवारी ॥
 लेत जँमाई बजावत चुटकी,
 छाय रही तन रैन खुमारी ।
 नारायण यह छवि निहारि के,
 को न मोहै जग में नर नारी ॥९॥

* सखी मुसिक्याय के लालजी सों बोली *

राग कालिगड़ा—

तुम कौन के भवन सों आये श्याम ।
 पलटी माल नीलपट काँधे, योंही मिल्यो है कि दिये दाम ॥
 पोक कपोल अधर हृग अंजन, यह लीला भई जाके धाम ।
 नारायण काहेकों दुरावौ, प्रगट कहीं क्यों न वाको नाम ॥१०॥

* लालजी वचन *

कुं डलिया—

रात गयो मैं भूलि भवन की, गैल तिहारी ।
 भ्रमत रह्यो सब ठौर बूझतौ, घर घर नारी ॥
 बूझत घर घर नारि, काहू नहि पतौ बतायो ।
 तुमहूँ मेरे काज राति, अतिशय दुख पायो ॥
 औरहु जो मोसों भई, सो बरनत सकुचात ।
 नारायण योंही फिरत, बीत गई सब रात ॥११॥

राग कालिगड़ा—

तेरे भवन की गैल भुलायो ।
 फिरत रह्यो सगरी निशि खोजत, तोऊ पतौ न कहूँ मैं पायो ॥
 एक ठौर मोहि चोर जानि के, बोले इन कष्टु माल चुरायो ।
 पुनि मेरे पकरन कों बौरें, मैं इक घर जु घस्यो घबरायो ॥
 वा घरवारी दयावति ने मेरो पीताम्बर दुबकायो ।
 निज नीलाम्बर मोय उड़ा के, तुरतहि भामिनि भेष बनायो ॥
 तौलों पकरनहारहु पहुँचे, तिने देखि मोहि वचन सुनायो ।
 लंजारी अपनी मणिमाला, बहुत तगादौ मोहि न भायो ॥
 पुनि बोपक लं खोजत चोरें, मैं तब दाँव आपनो पायो ।
 नारायण झट निकसि वहाँ ते, ज्यों त्यों प्रात यहाँ लों आयो ॥१२॥

● लालजी वचन ●

राग काफ़ी-

दृग मीडत काजर लग्यो हाथ ।
 मुख पोंछत लाग्यो अधरन पै, अधर पान रँग हाथ साथ ॥
 पुनि सोई कर लग्यो कपोलन, कहूँ हाथ धरि तेरं माथ ।
 नारायण या भाँति सखी को, समझावत रसिकन को नाथ ॥१३॥

● सखी वचन सखी प्रति ●

राग बागेश्वरी कान्हड़ा-

मेरे री आये मनहूँ के भाये, प्रीतम प्रान ते प्यारे ।
 ता मग पै बलिहारी जाऊँ मैं, जा मग लाल पधारे ॥
 मधुरा वचन रचन अति जादू, मन के मोहन हारे ।
 नारायण यह धन्य घरी पल, इन दृग श्याम निहारे ॥१४॥

वात्तिक-

ता पीछे परम रिझवार ने फूलन के गजरे गूँथि के सखी को
 पहराये, जब सखी शृंगार करिबे लगी तब आप दर्पन दिखायबे
 लगे, यह शोभा अपर सखी छिपि के देखि रही हुती, पुनि प्रगट
 ह्यँके बोली ॥१५॥

● सखी वचन सखी प्रति ●

राग कान्हड़ा-

तू है सखी बड़भाग भरी, नन्दलाल तेरे घर आवत हैं ।
 निजकर गूँथि सुमन के गजरे, हरषि तोहि पहरावत हैं ॥
 तू अपनो शृंगार करति जब, दरपन तोहि दिखावत हैं ।
 आनन्दकन्द चन्द मुख तेरो, निरखि निरखि सुख पावत हैं ॥
 जाके गुण सब जगत बखानत, सो तेरो गुण गावत हैं ।
 नारायण बिन दाम आजकल, तेरे ही हाथ बिकावत हैं ॥१६॥

* लालजी वचन *

दोहा—अब हम घर जावें सखी, नूपुर लेयें उतार ।

इनकी धुनि सुनि करइंगी, तो चरचा ब्रजनार ॥१७॥

* सखी वचन *

राग कानिगड़ा-

प्रोतम नूपुर मति न उतारो ।

इनकी धुनि सुनि पारपरोसिन, कहा करेगी हमारो ॥

भले करो जग चरचा मेरी, तुम निज प्रण नहिं टारो ।

नारायण जे शरण चरण की, तिने न कीजै न्यारो ॥१८॥

वातिक-

सखी बोली हे प्यारे ! जो आप शरणागत को त्यागोगे तो आपको प्रण जातो रहैगो, फिर कोई जीव आपके चरण की शरण में न आवैगो, क्योंकि वे कहेंगे, कि नूपुर जो बहुत दिनन से लालजी के चरण की शरण लग रहे थे, उनको ही त्याग दियो, तो हम नयनों को चरणन की शरण में काहे को राखेंगे और बिना शरण आये जीवन को कल्याण कैसे होयगो, या लिये मेरी जगत में निंदा होय तो भले ही होय, परन्तु आप शरणागत को मत त्यागो, भले ही नूपुर बजायें जाओ, आपकी प्रतिज्ञा न जावै ॥१९॥

* समाजी वचन *

दोहा—मुसिक्याय सुनि के वचन, साँचे मन के मीत ।

गये सखी ते बिदा हूँ, देखि प्रीति की रीत ॥२०॥

ये लीला श्रद्धा सहित, जो जन सुने सुनाय ।

नारायण भवसिन्धु ते, बिना जतन तरि जाय ॥२१॥

इति धोनारायण स्वामीजी कृत सखीखण्डिता लीला सम्पूर्ण ॥२६॥

अथ वंशी लीला प्रारम्भ



❁ समाजी वचन ❁

राग आसावरी—

हंस मोती चुगावत प्यारी ।
 पुचकारत करकमल फेर के, भूख लगी तोहि भारी ॥
 जित जित चलत बजावत चुटकी, गजगामिनि सुकुमारी ।
 तितहि तितहि बुह अति प्रिय बोलत, डोलत फिरत पिछारी ॥
 कबहुँ बुलावत निकट आपने, डरपावत दे तारी ।
 नारायण या विधि सों खेलत, श्रीवृषभानुकुमारी ॥१॥

❁ समाजी वचन ❁

दोहा—वंशी धुनि सुनि कुमरि को, रही न तन की सार ।
 कित हंसिबौ कित बोलिबौ, कित हंस सों प्यार ॥२॥

वातिक--

सखी ने बूझी हे प्यारी ! कहा भयो ? तब आपने कही ॥३॥

राग मन्हार--

नन्दनन्दन बन वंशी बजाई री ।
 श्रवण करत सुधि रही न तन की, एक संग मो मति बीराई री ॥
 नयन चकोर चहत निरखन कों, शरद चन्दमुख कुंवर कन्हाई री ।
 नारायण नहि भवन सुहावत, कहा करुँ अब एरी माई री ॥४॥

राग देश अथवा आसावरी-

वंशी नहीं यह सौति है दारी ।
 याही ने गृह काज भुलाये, सुधि बुधि सब हरि लई हमारी ॥

जे कुलवन्ति प्रवीण नारि जग, धीरज धर्म पतिव्रत वारी ।
 तिनहू को इन लाज बिगोई, बन बन फिरत हैं बदन उघारी ॥
 नारायण हम तौ नित तरसें, यह भई अधरन की अधिकारी ।
 कं तौ यही रहैगी ब्रज में, कं ब्रज में बसिहैं ब्रजनारी ॥५॥

बोहा—अरी सखी कितकों बजी, वंशी चित की चोर ।
 मो मन ऐंचत आप को, ज्यों चकई को डोर ॥६॥

* सखी वचन श्रीजी प्रति *

मैं आई लखि लाल कों, इकले धीर समीर ।
 कदम तरे ठाढ़े हुते, सुन्दर श्याम शरीर ॥७॥

* श्रीजी वचन *

राग कान्हड़ा बागेशरी झपताल—

चलो री आज ब्रजराज मुख निरखिये,
 भगत की लाज सों काज नहि सरंगो ।
 बहुत कोई कहैगो श्याम के ढिंग गई,
 याहू ते अधिक पुनि और कहा करंगो ॥
 नाचिबे लगीं तो फेरि घूँघट कहा,
 सूर रण चढ़े पं कौन सों डरंगो ।
 बेगि निज ग्यारे ते मिलो नारायण,
 बहुरि ऐसो सखी दाँव कब परंगो ॥८॥

* सखी वचन श्रीजी प्रति *

राग काफो—

निज प्रीतम की तू छबि निहार ।
 श्याम बरन लखि लजत नीलमणि, सुन्दरता मुख पं अपार ॥

भृकुटी कुटिल मधुर मुसक्यावन, चितवन की कछु नई ढार ।
नारायण कटि पै कर धरिके, ठाढ़े पकरि के कदम डार ॥६॥

❀ प्रियाजी वचन ❀

राग कालिगडा—

मोहन बसि गये मेरे मन में ।
लोक लाज कुलकानि छूटि गई, इन की लगन लगन में ॥
जित देखूँ तितही यही दीखें, घर बाहर आंगन में ।
अंग अंग प्रति रोम रोम में, छाये रहे सब तन में ॥
कुण्डल झलक कपोलन सोहै, बाजूबन्द भुवन में ।
कंकन कलित ललित मणिमाला, नूपुर धुनि चरनन में ॥
चपल नयन भृकुटी वर बाँकी, ठाढ़े सघन लतन में ।
नारायण बिन मोल बिकी मैं, इनकी नेक हँसन में ॥१०॥

❀ श्रीजी वचन लालजी प्रति ❀

राग घनाक्षरी—

सखी री यह नवरूप उजारो ।
पिछिलेपन पायो यशुमति ने, पुण्य प्रताप तिहारो ॥
लगि न जाय कहूँ दृष्टि हमारी, अधिक न याहि निहारो ।
नारायण छवि धाम श्याम पै, राई नौन उतारो ॥११॥

वातिक—

तब लालजी बोले—हे प्यारी ! आपको सुदृष्टि सों कबहूँ
दृष्टि न लगंगी ॥१२॥

दोहा—लीला युगलस्वरूप की, दुख भंजन सुख देन ।
नारायण जे नित सुनै, गावैं पावैं चैन ॥१३॥

इति श्रीनारायण स्वामीजी कृत वंशी ल.ला सम्पूर्ण ॥२०॥

अथ निकुञ्जहिंडोरा लीला प्रारम्भ

—❀❀❀❀❀—

❀ समाजी वचन ❀

राग भैरों—

भाज दोड जागे अति अलसात ।
 मूँदे नयन अटपटे बेना, नहिं सम्हार निज गात ॥
 नौंवे विवश हूँ बूझत प्यारी, साँझ भई कै प्रात ।
 कहन चाहत है भोर साँवरो, मुख ते निकसत रात ॥
 झूमत गिरत परस्पर ऊपर, देखि सखी मुसिक्यात ।
 नारायण या अद्भुत छबि कूँ, निरखत हृग न अघात ॥१॥

वार्तिक

ता पीछे सखीन ने प्रियाप्रीतम को स्नान कराय अद्भुत
 शृंगार करिके नाना प्रकार की सामग्री भोग धरी ॥२॥

❀ समाजी वचन ❀

दोहा—रुचि सों जेवें युगलवर, लै अचमन हरषात ।
 बोरी दै मुख परस्पर, पुनि पुनि मृदु मुसिक्यात ॥३॥

वार्तिक—

फिर सखीन ने प्रार्थना करी, आज आप काँच के भवन में
 हडोरा झूलँ और हम सब निरखें, आप मुसिक्याय के बोले—
 चली सखी ॥४॥

❀ समाजी वचन ❀

दोहा—झूलत रंग हिंडोरना, पिय प्यारी मिलि संग ।
 अली झुलावति गाय के, अतिहि प्रफुल्लित अंग ॥५॥

❀ सखी गायवे लगीं ❀

देखि युगल छबि सावन लाजं ।
 उत घन इत घनश्याम लाड़िलो, उत दामिनि इत प्रिय संग राजं ॥
 उत बरषत बूँदन की लरियाँ, इत गल मुतियन हार विराजं ।
 उत बादुर इत बजत बाँसुरी, उत गरजत इत नूपुर बाजं ॥
 उत रंग के बाबर इत बागे, उत धनुष वनमाल इत साजं ।
 उत घन घुमड़ इत हृग घूमत, नारायण बरषा सुख साजं ॥६॥

❀ सखी वचन परस्पर ❀

राग महार—

आज दोउ झूलत मृदु मुसक्यावत ।
 औरहु बात लखी तें सजनी, सैनन माहि कछू बतरावत ॥
 मेल कपोल अधर धर बंशी, एक संग पुनि दोऊ बजावत ।
 बजति नहीं झगरत आपस में, निरखि सखी अतिशय सुख पावत ॥
 निज प्रतिबिम्ब देखि वरपन में, भानुलली मन में सकुचावत ।
 बूझत पिय सों यह को झूलत, जो निज छबि सों हमें लजावत ॥
 हँसत श्याम प्रिय कूँ लखि भोरी, कंठ लगाय बहुत समझावत ।
 नारायण हठ तजत नहीं जब, सम्मुख ते सखी काँच हटावत ॥७॥

❀ समाजी वचन ❀

दोहा—प्यारी निज प्रतिबिम्ब लखि, सकुच गई मनमाहि ।
 तब प्यारो हँसि हँसि परत, दे प्रिय के गलबाहि ॥८॥
 यह लीला नित सुने सों, कृपा करें घनश्याम ।
 वृन्दावन को वास दें, और आपनो नाम ॥९॥

इति श्रीनारायण स्वामीजी कृत निकुञ्जहिंडोरा लीला सम्पूर्ण ॥२॥

अथ शयन लीला प्रारम्भ

—ॐ—

* समाजी वचन *

दोहा—एक समय रसरास में, निरतत प्यारी पीय ।
अधिक रंनि पुनि गई जब, बोली पिय सों प्रीय ॥१॥

* प्यारी वचन *

राग दरबारी कान्हड़ा—

प्रीतम वेगि निकुंज पधारो ।
रजनी बहुत गई या सुख में, अधिक न रस विस्तारो ॥
अति आलस वश दीखत प्यारे, कोमल वदन तिहारो ।
दृग झूमत पग डगमगात उत, बोल शिथिल है न्यारो ॥
रास विलास करत श्रम पायो, तार्कू तनक निवारो ।
नारायण जीवन अधार तुम, मो नयनन को तारो ॥२॥

* सखी वचन *

राग देश—

युगल छबि देखि मेरो हियरा सिरात ।
नोंद भरे मग चलत झूमि के, शिथिल भये सब गात ।
कह्यो चहत कछु कढ़त कछु मुख, कहत कहत रहि जात ।
नारायण या विधि निकुंज में, पहुँचे अति अलसात ॥३॥

* सखी वचन और सखी प्रति *

राग जंजवन्ती—

आज बिराज रहे मणि मन्दिर, नन्दनन्दन वृषभानुकिशोरी ।
केलि करत युग याम गई निशि, लेत जम्हाइ साँवरो गोरी ॥

अति आलस बश झूमत दोऊ, बात करत मुख अटपटि भोरी ।
नारायण सोई बड़भागी, जो नित निरखत है यह जोरी ॥४॥

समाजी वचन

दोहा—हँसि रस में गई अद्धं निशि, भये नींदवश नैन ।
अलसाने झूमत झुकत, कहत अटपटे बँन ॥५॥

सखी वचन

आशीष-

राग जंजवन्ती अथवा विहाग—

आनन्द रहौ दृगचन्द दोऊ,
सगुन सदा तुमको आवें ।
नित ही रसकेलि करो मिलि के,
हम निरखि निरखि अति सुख पावें ॥
यह धन हम से रंकन कों मिल्यो,
हम कहाँ लों विधि के गुण गावें ।
नारायण अब आशीष करें,
तुमहूँ पौढ़ो हमहूँ जावें ॥६॥

वातिक-

अर्थात् आज्ञानुसार अपनी अपनी सेवा पं ॥७॥

दोहा—लाला श्रीब्रजचन्द्र की, यामें रस संयोग ।
नारायण जे नित सुनें, बड़भागी ते लोग ॥८॥

इति श्रीनारायण स्वामीजी कृत शयन लाला सम्पूर्ण ॥२२॥

अथ साँवरीछद्म झूलन लीला प्रारम्भ



* समाजी वचन *

बोहा—जहाँ झूलति रहि लाड़िली, गये तहाँ घनश्याम ।
बोलो प्रिया अबलान में, कहा पुरुष को काम ॥१॥

वातिक—

लालजी ने कही हे प्यारी ! यह हमारी भूल समझो जो
यहाँ आये, अब चले जायेंगे ॥२॥

* समाजी वचन *

बोहा—अति प्रवीण छल छन्द में, रसिकन के शिरमौर ।
वनिता भेष बनाय के, फिर पहुँचे वा ठौर ॥३॥

* लाजजी वचन *

राग मल्हार—

एरे दई में यहाँ क्यों आई ।
कोऊ नहीं कहि झूल री तुमहू, अति ही कठोर यहाँ की लुगाई ॥
मैं अपनी सम जानत सबकूँ, याही धोखे रही भुलाई ।
नारायण निज भवन चलूँ अब, या झूलन ते बहुत अघाई ॥४॥

* श्रीजी वचन साँवरी प्रति *

बोहा—हँसि कर बोली लाड़िली, सुन री साँवर अंग ।
तू उदास जिन हो सखी, झूलि हमारे संग ॥५॥

* सखी गायवे लगी *

राग मंझोटी—

ये दोउ झूल री, मन के मोहनहार ।
सजनी एक साँवरे रंग की, संग वृषभानु कुमार ॥

सावन मास सुहावन भावन, फूल रही फुलवार ।
 रेशम डोर जड़ाऊ पटली, सघन कदम की डार ॥
 गर्जत घन चमकत है चपला, बूँदन परत फुहार ।
 ठौर ठौर मिलि मोर नचत हैं, या सुख को नहिं पार ॥
 भाँति भाँति के पक्षी बोलें, शीतल चलत बयार ।
 फूले कमल सरोवर माहीं, झनर करत गुंजार ॥
 चहूँ ओर छाव रही हरियाली, अद्भुत विपिन बहार ।
 लिपटि रहीं बर बेलि द्रुमन सों, हरषत युगल निहार ॥
 बरन बरन के लाल सोसनी, सखियन किये शृंगार ।
 विविध प्रकार बजावत बाजे, गावत राग मलार ॥
 चतुर सखी इक जानि गई तब, उर सों चीर उधार ।
 हंसि हंसि परत लखावति औरन, यह लंगर छलवार ॥
 ललिता कहै इन्हें नहिं ब्यापै, तनक लाज संसार ।
 पल पल माहिं स्वांग धरि आवत, कबूँ पुरुष कबूँ नार ॥
 नारायण बोली प्रीतम सों, कीरति प्राण अधार ।
 बनिता शेष उतारि आपनो, रूप लेउ निज धार ॥६॥

वाक्तिव--

श्रीलालजी बोले हे प्यारी ! अबहूँ तौ मरद के संग झूलीं ?
 आपने मुसिव्याय के कही, हम तौ लुगाई के संग झूली हैं ।
 यह वचन सुनि के सब सखी परस्पर हंसिबे लगीं ॥७॥

दोहा—तर्क छाँड़ि जो नित सुने, यह लीला आनन्द ।

नारायण तापै दया, सदा करें ब्रजचन्द ॥८॥

इति श्रीनारायण स्वामीजी कृत सावित्रीछद्ममूलन लीला सम्पूर्ण ॥२३॥

अथ वनझूलन लीला प्रारम्भ

* समाजी वचन *

बोहा—सावन मास सुहावनो, घन गर्जत चहुँ ओर ।
 निरखि निरखि शोभा नई, हर्षत नन्दकिशोर ॥१॥
 परत फुहार सुहावनी, भीजत श्री ब्रजराज ।
 प्यारी को बोलन चले, झूला झूलन काज ॥२॥

* प्रियाजी वचन सखी प्रति *

राग मल्हार—

सखी री यह सावन मनभावन ।
 चातक मोर चकोर कोकिला, बोलत वचन सुहावन ॥
 गरजत घन घननन घननन कर, लगे मेह वरषावन ।
 नारायण भीजत मेरे गृह, श्यामसुन्दर को आवन ॥३॥

* लालजी वचन श्रीजी प्रति *

राग देश—

चलौ अकेले झूले बन में, प्यारी मेरे प्रान ।
 तुम नई नागरि रूप उजागरि, सुखसागर छबि खान ॥
 बरन बरन के बादर छाये, मानो गगन वितान ।
 वरषत बूँद सोई भुतियन की, झालर शोभा मान ॥
 बोलत खग मृग डोलत इत उत, सो नहि जात बखान ।
 रंग रंग के फूल खिले हैं भ्रमर करत रसपान ॥
 ऐसे समय विपिन सुख विलसें, एरी परम सुजान ।
 नारायण उठि देगि पधारो, कुलदीपक वृषभान ॥४॥

दोहा—कछुक दूरि बन में गये, बरषन लाग्यो मेह ।
कदम तरे ठाढ़े कहैं, किहि विधि पहुँचें गेह ॥५॥

❀ समाजी वचन ❀

राग मल्हार—

कदम तरे ठाढ़े दोऊ बतरावें ।
परत फुहार पवन झकझोरत, अब कित भाजिके जावें ॥
भवन दूरि बन ठौर न दीखत, जहाँ निज बसन दुरावें ।
नारायण कछु दूरि जायके, फेरि बगदि वहि आवें ॥६॥

वातिक—

तब ग्यारीजी ने कही बूँदन सों कहा डरपौ हौ, भोजिबे को
तो बन में आये ही हैं, परन्तु काहूँ और सघन लता तरे चलि
के झलें ॥७॥

❀ समाजी वचन ❀

राग मल्हार—

बिहरत बाग झूलन के काजे ।
गावत गीत मधुर सुर दोऊ, बीच बीच मुरली धुनि बाजें ।
ठुमकि चलन बोलन अवलोकन, कोटि मदन छबि निरखत लाजें ॥
नारायण हृलसत सुख बिलसत, लता भवन तरें आय बिराजें ॥८॥

❀ समाजी वचन ❀

दोहा—झूलत हैं श्री लाड़िली, प्रीतम ओर निहार ।
बोली अजी गावौ कछु, ललित खयाल मल्हार ॥९॥

❀ लालजी गायबे जगे ❀

राग मल्हार—

आई बदरिया बरषनिहारी ।
गरजि गरजि दामिनि दमकावै, उयों चूंदरि में झलक किनारी ॥

मधुर मधुर कोयल बन बोलें, भवन भवन गावत बजनारी ।
बलत पवन शीतल नारायण, परत फुहार लगति अति प्यारी ॥१०

वार्तिक

प्रियाजी ने प्रसन्न हूँ के अपने प्रीतम की बड़ाई करी ॥११॥

* समाजी वचन *

दोहा—एक सखी बन विरहबे, गई हुती वा ओर ।
जित में झूलत दोउजन, राधा नन्दकिशोर ॥१२॥
लता ओट ते निरखि सुख, कही सखिन सों आय ।
कहा कहूँ छबि आज की, मोपे कही न जाय ॥१३॥

* सखी वचन अपर सखी प्रति *

राग हिबोरा-

आवौ री यह शोभा निहारें ।
नन्दलाल वृषभानुनन्दिनी, झूलि रहे गरबियां डारें ॥
परत फुहार बिपिन हरियाली, बन पक्षी मृदु वचन उचारें ।
अति निरमल जल भरे सरोवर, फूले कमल भ्रमर गुंजारें ॥
पवन झकोर उड़त प्रिय को पट, झट प्रीतम निज हाथ समारें ।
नारायण इनकी या छबि पे, आज सखी हम सरबस वारें ॥१४॥

वार्तिक-

फिर सखी आपस में कहिबे लगीं देखो री ! आज हमसों
छवि के झूलि रहे हैं ॥१५॥

* सखी वचन *

राग ध्रुपद-

ऐसो आनन्द सखी आज लों न देखो कबूँ,
आप ही झूलनिहार आप ही झुलावें ।

वरषत घन गरजि घोर बोलत पिक नचत मोर,
 चपला चमकि चहूँ ओर दम्पति हरषाबें ॥
 भीजि रहे घोर बहे कुसुम रंग अंग अंग,
 तापे दोउ एक संग मिलि मलार गावें ।
 नारायण पीय प्यारी सावन सुख लेत सखी,
 गौर श्याम बदन रती मदन को लजावें ॥१६॥

ॐ समाजी वचन ॐ

बोहा—पुनि सजनी दम्पति निकट, जाय करी बलिहार ।
 निज मन में सकुची प्रिया, ढिग की सखी निहार ॥१७॥

ॐ श्रीजी वचन सखिन प्रति ॐ

राग सारङ्ग—

तुम सम को जानत चतुराई।
 मोहि अकेलो छाँड़ि भवन में, आप समी वन विरहन आई ॥
 मैं आई यहाँ तुम्हें खोजिबे, इत उत हेरत डगर भुलाई ।
 नारायण कष्टु भाग भले जो, मिले विपिन में कुंवर कन्हारी ॥१८॥

वार्तिक—

सखियन ने मुसिक्याय के कही ये हमसों भूल भई, फिरि
 सब मिलि के गायबे लगीं ॥१९॥

राग कान्हड़ा—

आज बंशीवट वरषत रंग ।
 यमुना तीर समीर सुहावन, बोलत विविध विहंग ॥
 कीरतिकुंवरि लाल नन्दजी को, झूलि रहे इक संग ।
 रूपसिन्धु के अंग अंग ते, छबि की उठत तरंग ॥

बजत बोन ताउस सरंगी, बंशी झाँझ मृदंग ।
नारायण गावति मिलि सजनी, हिय में बढ़त उमंग ॥२०॥

* समाजी वचन *

दोहा—लाल झुलावत लली कूं, झोटा दियो बढ़ाय ।
तासों पिय पै रिस भई, भृकुटी लई चढ़ाय ॥२१॥

* लालजी वचन श्रीजी प्रति *

राग सोरठ-

कौन समै रुठन को प्यारी झूलो ललित हिंडोरे ।
रंग बिरंग घटा नभ छाई, बिच बिच चपला चमक सुहाई,
परत फुहार परम सुखदाई, चलत समीर झकोरे ॥
विविध भाँति पक्षी बन बोले, मृगिन सहित भृग बिहरत डोलें,
जल जन्तु तिमि करत किलोलें, यही अचरज मन मोरे ।
कुसुम चीर पहरेँ ब्रजनारी, साज समाज आज है भारी,
नारायण बलिजाउँ तिहारी, प्रीतम करत निहोरे ॥२२॥

धात्तिक-

पास तें सखीन ने कही हे प्यारी ! प्रीतम को कष्ट दोष
नहीं इनको झुलायबो नहीं आवैं, अब आप दोउ झूलौ और
हम झुनावें गावें ॥२३॥

राग मल्हार—

सघन बन झूलें दोऊ सुकुमार ।
हिय हरषन छवि निरखि परस्पर, छिन छिन बाढ़त प्यार ॥
कबहुँ मुदित मन तान लेत मिलि, होत सखी बलिहार ।
नारायण द्रुम बेलि सुहावनि, हरित किये भृंगार ॥२४॥

वात्तिक-

श्रीजी ने कही सखी ! कछु और हू गाओ, जो आज्ञा ॥२५॥

राग गौड़ मल्हार-

बादरवा गहरे आये ।

उमड़ि घुमड़ि घन गरजि गरजि के, बरषन कों उठि धाये ॥
बरन बरन के अति सुन्दर घन, नभमण्डल में छाये ।
चपला चमकि दुरति पुनि प्रगटति, कंचन अंग सुहाये ॥
नाचत मोर कोकिला बोलत, सबके मन हरषाये ।
नारायण जित तित हरियाली, मेह नेह रंग लाये ॥२६॥

वात्तिक-

फिर सखीन ने विनती करी, सरकार ! अब तौ मेह बहुत
आयौ है भवन में पधारो, मारग में जा सखी ने इनकों आवत
देख्यो, वाने और सखी सों कही ॥२७॥

राग रेखता ईमन को जिला—

सुन्दर अनूप जोरी, अति मन को भावती ।
देखी मैं आज मग में, कुंजन सों आवती ॥ सुन्दर०॥१॥
अंग अंग देत शोभा, भूषण जड़ाऊ आली ।
नयनन में सोहै काजर, अधरन पं पान लाली ॥ सुन्दर०॥२॥
प्रीतम के कांधे कर धर, ग्यारी आनन्द सों ।
हंसि हंसि के करत बातें, मुख ललित चन्दसों ॥ सुन्दर०॥३॥
पग धरत हौलें हौलें, गति देख हंस लाजें ।
नूपुर परम मनोहर, अति मधुर मधुर बाजें ॥ सुन्दर०॥४॥
या भाँति सों मगन ह्वै क्रीड़ा करत हैं दोऊ ।
नारायण रसिकजन विन, ये रस न जाने कोऊ ॥ सु०॥५॥२६॥

बोहा—लीला मोहनलाल की, सब साधन को सार ।

नारायण शशि सों सुने, उतरे भव सों पार ॥२६॥

इति श्रीनारायण स्वामीजी कृत वन मूलन लाला सम्पूर्ण ॥२४॥



अथ वसन्त लीला प्रारम्भ



* समाजी वचन *

बोहा—नारायण वृन्दाविपिन, निशिदिन रहत वसन्त ।

पिय प्यारी मिलि मुदित मन, क्रीड़ा करत अनन्त ॥१॥

वन बिहरन के कारने, लली हिये हरषाय ।

सखी पठाई लाल टिंग, लावो संग लिवाय ॥२॥

वाक्यक—

आज्ञानुसार जब सखी गई, तब रसिकराज बोले सखी !
तू चल हम नेक देर में भावें ॥३॥

* सखी वचन श्रीजी प्रति *

बोहा—आवेंगे कष्टु देर में, मोयों भयो मिलाप ।

यह सुनिके कीरतिकुमारि, बंठि रहों चुपचाप ॥४॥

* समाजी वचन *

फूलन के गहने रचत, लालहिं लगी भवार ।

पुनि यह सुनि के लाड़िली, बंठी रिस उर धार ॥५॥

आन उपाव न बनि सषयो, मालिन भेष बनाय ।

चले प्रिया के भवन कूं, मन हीं मन हरषाय ॥६॥

● समाजी वचन ●

पद राग सारंग—

मालिन भेष बने पिय प्यारे ।

फूल शृंगार धरे डलिया में भूषण पट सों अंग सँवारे ॥
सकुच सहित मग चलत मन्दगति, पग बिछिया बाजत हैं न्यारे ।
नारायण अद्भुत शोभा सों पहुँचे भानुकुमरि के द्वारे ॥७॥

● सखी वचन श्रीजी प्रति ●

राग वसन्त बहार—

मान सखी जिन मान बढ़ावै ।

नवपल्लव विकसे वन बागन, नव बहार सबके मन भावै ॥
नयो रूप नवयौवन तेरो, देखत बने कहत नहि आवै ।
नारायण इतनो धन पाके, फिर गोरी हू न बयों इतरावै ॥८॥

वाक्ति क—

जब प्यारीजी न बोलीं तब फिरि सखीन ने कही ॥९॥

राग वसन्त बहार—

रो तू नेक किंवार उघार देख ।

द्वार ठाढ़े प्रीतम मालिनियाँ भेख ॥

आयो तेरे काज ऋतुराज आज, फूले फूल मूल फल दल विशेष ।
नारायण कष्टो मानि लं सजनी, यामें नहीं कष्टु मीन मेष ॥१०॥

बोहा—सखी वचन सुनि लाड़िली, उठी कष्टुक मुसक्यात ।

जाय द्वार प्रीतम लखे, सखी साँवरे गात ॥११॥

लली ललासों हँसि कहति, तुम्हे न आवति लाज ।

लाज किये ते होय कब, या विधि पूरण काज ॥१२॥

वातिक—

तापीछे प्रीतम ने फूलन के गहने पहराये सखी बड़ाई
करिबे लगीं ॥१३॥

❀ सखी वचन ❀

राग ध्रुपद कान्हड़ा व तिंगूरा—

फूलन को चन्द्रकला सीस फूल फूलन को,
फूलन के झुमका श्रवण सुकुमारी के ।
फूलन की वन्दनी विशाल नथ फूलन की,
फूलन को बिन्दा भाल राजदुलारी के ॥
फूलन की चम्पाकली हार गरे फूलन के,
फूलन के गजरा ललित कर प्यारी के ।
फूलन की पग में पायल नारायण,
फूले फूले भागि सदा लाड़िनी हमारी के ॥१४॥

❀ किशोरीजां को वचन लालजी प्रति ❀

राग वसन्त धोमाताल—

चलो लाल खेले वसन्त मिलि श्रीयमुना के कूल ।
नव निर्कुज वन नई ऋतु आई नये नये फूले फूल ॥
द्रुम डारिन बँठे नव पक्षी बोलत अति अनुकूल ।
नारायण उत नई बहार सुख, इतमें तुम सुख मूल ॥१५॥

वातिक ।

फिरि श्रीकिशोरीजी ने अपने प्रीतम को नागरि भेष बढ़ाय
के जब श्रीयमुनाजी के तट मनोहर बाटिका में जाय के जड़ाऊ
सिंहासन पे दोउ गलबियाँ डार के विराजे तब गन्धर्वा सखी को
आज्ञा भई, जो तुम कछु गाओ । ताही समय रति मदन मालिनी

माली को भेष धारण कर डाली लगाय के युगल सरकार के आगे लाय धरी, तब गन्धर्वा सखी गायबे लगी ॥१६॥

ध्रुपद राग वसन्त—

नवल रंग नवल फूल, नवल शोभा यमुना कूल,
नवल सघन बेलि द्रुम प्रफुल्लित चहुँ ओर ।
ललित नई गुल्म लता, चटकि २ खिलत कली,
बिकसे तरु पात नये, नयो नयो बौर ॥
नवल लली नवल लाल, नवल सखी गावें खयाल,
नयो माली मदन डालो, लायो कर जोर ।
नवसमीर नव सुगन्धि, नये नये नित हूँ अनन्द,
नारायण नवबहार बीतत निशि भोर ॥१७॥

दोहा—ये लीला नित सुने ते, कृपा करें घनश्याम ।
निज चरणन की भक्ति दें, अरु वृन्दावन धाम ॥१८॥

इति श्रीनारायण स्वामीजी कृत वसन्त लीला सम्पूर्ण ॥२५॥

अथ होरी लीला प्रारम्भ

● सखी वचन श्रीजी प्रति ●

राग काफी—

गोरी कुंजन में आज होरी मची, तू कहा बंठी मांग संवारे ।
मेरी कही जो सांच न माने, सुनि लँ डफ धुधकारै ॥
उठि सजनी चलि फाग खेलि लँ, प्रीतम तोहि पुकारै ।
नारायण तब बात है तोरी, तू जीतै पिय हारै ॥१॥

वात्तिक--

तब प्रियाजी ने एक नई सखी सों कही अरी ! तू होरी खेलिबे न चलैगी ? तब वह सखी बोली ॥२॥

होरा—

सास ननंद मेरी देखि रहीं, मैं होरी कंसे खेलूँ बीर ।

मैं अपने मनमाँहि कहूँ अब, कहा करूँ करतार ॥

रसिया नचत बजावत डफ मोहि, ऐरत बाराँहि बार ।

द्वारे होय रही भीर ॥

लाज भरो गारी गावत नहिं, नेकहु सकुचत छँल ।

मूठ गुलाल इतँ उत फँकत, रोकि रछी है गँल ॥

संग छोहरा अहीर ।

याही सों बाहिर नहिं निकसूँ, पिचकारी दे मार ।

नारायण फिरि बात छिपै कब, निरखेंगे नर नार ॥

भोजे रँग सों चीर ॥३॥

* लालजी वचन सखी प्रति *

राग सारंग को रसिया—

होरी में लाज न कर गोरी ।

हम व्रज के रसिया तुम गोरी, भली बनी यह जोरी ॥

जो हम सों सूत्रे नहिं खेलो, यार करेंगे बरजोरी ।

नारायण अब निकसो द्वार पै, छूटो नहिं बनिके भोरी ॥४॥

वात्तिक

पुनि वा सखी सों प्रियाजी ने कही अरी ! जो तू होरी में इतनो डरैगी तो व्रज की वास करि चुकी । फिरि सखिन सहित ओकिशोरीजी होरी खेलिबे कूँ पधारीं ॥५॥

❀ लालजी वचन सखान प्रति ❀

राग भूपाली—

यह को आवत है गजचाल, संग बहु भीर लिये शोभा विशाल ।
पिचकारी निज वसन छिपाये, झोरिन में दीखत गुलाल ॥
एरे सखा तुम चेत करो अब, ये हैं घनी व्रजबाल ।
नारायण कहूँ हाथ न ऐहौ, भंय्या तुम थोरे से ग्वाल ॥६॥

❀ प्रियाजी वचन लालजी प्रति ❀

राग सिन्धुरा—

एरे लाल फिरि होरी आज खेलन आये, कल कष्ट थोरे नचे हौ ।
बेशरमी तुम्हरे बट आई, मोहि तौ ऐसे जंचे हौ ॥
तिहारे गुण वरने नहिं जाई, तुम तौ ठीठ सचे हौ ।
नारायण बलिहारि तुम्हारी, लाज सों तुमहि बचे हौ ॥७॥

बालिक—

फिरि तौ होरी होन लगी ॥८॥

❀ मखी वचन परस्पर ❀

राग काफ़ी—

विय ग्यारी आज होरी खेलत यमुना तीर ।
हँसि हँसि बदन अरगजा डारत, मारत मूठ अबीर ॥
घलत कुमकुमा रंग पिचकारी, भीज रहे तन चीर ।
जनु घन दामिनि रूप धरे हैं, गोरे श्याम शरीर ॥
बजत अनेक भाँति मृदु बाजे, होय रही अति भीर ।
नारायण या सुख निरखे बिन, कौन धरै मन धीर ॥९॥

* श्रीजी वचन सखी प्रति *

सारंग रसिया—

रसिया को नारि बनावौ री ।

कटि लहँगा उर माहि कंचुकी, चुँदरी सीस उढ़ावौ री ॥

गाल गुलाल टृगन बिच काजर, बेदी भाल लगावौ री ।

नारायण तारी बजाय के, निकट यशोमति जावौ री ॥१०॥

वात्तिक—

लालजी ने कही हे प्यारी ! नागरी तौ मोहि बनाओगी, परन्तु जो मेरी मया ने मोकूँ पहिचान लियो तौ फिर आप की चतुराई कहाँ रहैगो, जासो मैं अपने शृंगार अपने हाथ सूँ कहुँ, कि फिर कोई न पहिचाने, और आपकी बड़ाई होई । तब सब ने कही यही ठीक है । फिर एक एक आभूषण अपने सबनने इनकूँ उतारि कें दियो, जब लालजी सघन लता कुंज के भीतर शृंगार करिबे लगे, झट दूसरी ओर सों निकसि दूर जाय के बोले, यार, तौ अपने घरकूँ चले । यह कौतुक देखि के सब सखी आपस में कहिबे लगीं—लै बीर ! ब्रजभूषण तौ गाँठ के भूषण हूँ लै चल्यो ॥११॥

बोहा—यह लीला जो नित सुने, गावे चित के चाव ।

नारायण भवसिन्धु ते, तुरत पार हूँ नाव ॥१२॥

इति श्रीनारायण स्वामीजी कृत होरी लीला सम्पूर्ण ॥२६॥

—*—

अथ गलीहोरी लीला प्रारम्भ

* समार्जी वचन *

बोहा—होरी खेलन के लर्ये, रसिया श्याम सुजान ।

फेड़ अवीर गुलाल भरि, गये गली वृषभान ॥१॥

● श्रीजी वचन सखी प्रति ●

होरी जंगले का जिला—

होरी खेलन के लयें नन्दलाल, मग नाचत आवत मटक मटक ।
कर डफली गति मधुर बजावत, ताल देत पग पटक पटक ॥
अंग अंग छबि कहि न जाय कछु, चढ्यो मदन को कटक कटक ।
नारायण मन हरत है मेरो, पेच पाग के लटक लटक ॥२॥

● सखी वचन सखी प्रति ●

राग काफ़ी-

देखि सखी वृषभानुकिशोरी ।
निज प्रीतम को रूप निहारत, जा विधि चन्द चकोरी ॥
भलो फाग फेलन कों निकसी, बीच भई चितचोरी ।
नारायण अटके हृग छबि में, भूलि गई सुधि होरी ॥३॥

● सखी वचन श्रीजी प्रति ●

बोहा—कौन समो है ध्यान को, एरी नव ब्रजबाल ।
डारि अनोखे लाल पै, रंग अबीर गुलाल ॥४॥

● सखी वचन ●

होरी—

सखी देखौ आज वृषभानु लली, होरी खेलत अति छबि पापै ।
प्रीतम के हृग मार कुमकुमा, सम्मुख ते मुसिव्यावँ ॥
कबहूँ कहति गिरघो नथ मोती, अब कंसे कर पावै ।
बातन में उरझाय लाल कों, गाल गुलाल लगावँ ॥
जब प्यारो पकरन कों लपकत, अधिक अबीर उड़ावँ ।
धूंधरि माहि कछु नहिं सूझत, आपकूँ चतुर बचावँ ॥

गौर श्याम मुख भये एक से, शोभा कहत न आर्ष ।
नारायण फागुन के सुख में लोकलाज नहि भाव ॥५॥

❀ समाजी वचन ❀

बोहा—जब थोरो सो रहि गयो, रंग अबीर गुलाल ।
तब टेरत निज यूथ को, सुघर लाड़िलीलास ॥६॥

होरी काफी भीमा ताल—

आज बोऊ मदमाते खिलारी,
नन्दनन्दन वृषभानुदुलारी ।
निज निज यूथ युगल वर टेरत,
घोष बढ़ी जीतन की भारी ॥१॥
भवन भवन ते निकसीं सजि सजि,
गोरी साँवरी रूप उजारी ।
ज्यों अति प्रबल घटा घिरि भावत,
त्यों मिलि के आईं ब्रजनारी ॥२॥
एक ओर लिये लला सखा संग,
एक ओर सब गोपकुमारी ।
होन लगी अब होरी परस्पर,
घलन लगीं इत उत पिचकारी ॥३॥
तकि तकि के दृग कुमकुम मारत,
डारि गुलाल देत रसगारी ।
छिरकत अतर घतुर नवनागर,
फूलि रही जोबन फुलबारी ॥४॥
बीन मृदंग सितार सरंगो,
तूस मुचंग झाँझ डफ न्यारी ।

मधुर मधुर सुर माज बजत गति,
 हैं अति सुघर बजावनवारी ॥५॥
 सैन चलाय सखी आपस में,
 सखान के पकरन की विचारी ।
 घबराये सब ग्वाल बाल जब,
 भाग चले मन धीर न धारी ॥६॥
 घेरि लियो तब नन्दनन्दन को,
 भामिनि भेष बनाय शृंगारी ।
 मुतियन मांग भरी हृग अंजन,
 पद बिछिये नथ भलकाबारी ॥७॥
 दं गुलचा मुख मीड़ति रोरी,
 नभ मण्डल निरखल सुरनारी ।
 ताहि नचावत गीत गवावत,
 ध्यान धरत जाको त्रिपुरारी ॥८॥
 पुनि मिलि के लं गईं महरि ढिग,
 नख शिख लौं सब भाँति सँवारी ।
 ब्रजनारी यह मिलिबे आई,
 नाते में कष्टु लगति तिहारी ॥९॥
 जब यशुमति उठि भेंटन लागी,
 ब्रजवनिता मुसिक्यावत सारी ।
 जानि गई तब महरि यशोदा,
 नारि नहीं यह मेरो बिहारी ॥१०॥
 हँसि हँसि परत देखि मुख सुत को,
 करि आदर सगरी बँठारी ।

बड़े भाग जो मो मन्दिर में,
 सहित सखिन यह कुमरि पधारी ॥११॥
 भानुलली बोली यशुमति सों,
 बेगि करौ फगुआ की त्यारी ।
 हारि गयो ब्रजभूषण तेरो,
 देखि लेउ भई जीत हमारी ॥१२॥
 आनन्द भरे वचन सुनि उनके,
 मगन भई हरि को महतारी ।
 पट भूषण पहिराय प्रीति सों,
 गोद सबन के मेवा डारी ॥१३॥
 लै आज्ञा ब्रजनारि महरि सों,
 शीश नवाय के भवन सिधारी ।
 नारायण धनि धनि वृन्दावन,
 जहँ विहरत नित प्रीतम प्यारी ॥१४॥७॥

दोहा—सुख उपजावन दुखहरन, यह लीला ब्रजराज ।
 नारायण नित सुने ते, पूरण होवें काज ॥८॥

इति श्रीनारायण स्वामीजी कृत गलीहोरी ल.ला सम्पूर्ण ॥२७॥



अथ छद्महोरी लीला प्रारम्भ

❀ समाजी वचन ❀

दोहा—लै गागरि गोरी चली, भरिबे यमुना नीर ।
 एक सखी मग में मिली, बोली सुन री बीर ॥१॥

❀ सखी वचन पनिहारी प्रति ❀

राग आसावरी—

तू कित आज चली बदन के, मनमोहन मग खेलत होरी ।
जाने कहा वाके दृग जादू, जो निरखत सोइ होत है बौरी ॥
शरब इन्दु सम बदन तिहारो, कोमल अंग ललित अति भोरी ।
तोहिदेखि कब छोड़ंगौ रसिया, बंठि भवन हठ जिन करि गोरी ॥
डोलत डगर लिये पिचकारी, फेंट अबीर गुलाल की झोरी ।
नारायण होरी को मिस करि, मोहन लाल करत चित चोरी ॥२॥

❀ पनिहारी वचन ❀

वातिक—

अरी सखी ! मैं यमुना जल भरिबे जाऊंगी ॥३॥

❀ पुनि सखी वचन पनिहारी प्रति❀

राग संभोटी—

आज श्याम मग धूम मचाई, धूम मचाई करत डिठाई ।
बिन रँग डारें देत नहि निकसन, मैं तेरी सौं देखि के आई ॥
तू कहूँ भूलि के मति उत जंयो, जाने कहा वह करे लंगराई ।
नारायण होरी के दिनन में, अपनेहि हाथ है अपनी बड़ाई ॥४॥

❀ पनिहारिन वचन सखी प्रति ❀

वातिक

अरी बीर ! तू तो सांची कहै, पर कहा करूँ मेरे घर में
पानो की एक बूंदहु नांय ॥५॥

❀ पुनि सखी वचन ❀

राग कान्हड़ा—

आज हरि डगर मचाई धूम ।
जो ब्रजनारि गईं जल भरिबे, बीचहि ते आईं घूम ॥

तू सुन्दरि नवयौवन भोरी, गजगति चलति है झूम ।
नारायण जो तू बबि आवै, लेउं तेरे पग चूम ॥६॥

* समार्जी वचन *

दोहा—एक नहीं मानी कही, गई हठीली बाल ।
अचक आयके गल में, घेरि लई गोपाल ॥७॥

* सखी वचन *

राग काफ़ी—

मति मारौ पिचकारी, श्याम अब देउंगी मैं गारी ।
भीजंगी लाल नई मेरी अंगिया, चूंदरि बिगरंगी न्यारी ।
देखंगो सासु रिसायगो मोपे, संग की ऐसी हैं बारी,
हंसंगी दं दं तारी ॥
घाट बाट सब सों अटकत हौ, लै लै रारि उधारी ।
कहाँ लौं तेरी कुवाल कहूँ मैं, एक एक ब्रजनारी,
जानति करतूति तिहारी ॥
मूठी अबीर न डारौ हृगन में, दूखेंगी आँख हमारी ।
नारायण न बहुत इतरावौ, छाँड़ौ डगर गिरधारी,
नये भये तुमही खिलारी ॥८॥

* समार्जी वचन *

दोहा—सराबोर करि रंग में, बोले यदुकुल भान ।
जा लिवायला तू उन्हें, जिनको तोहि गुमान ॥९॥

वार्तिक—

फिरि आप सखी भेष धारण करिके मारग में आय के
ठाढ़े हँ रहे और उत में वा सखी ने अपनी सखीन सों जाय
कही ॥१०॥

राग काफ़ी-

सखी री या ब्रज में अब कैसे बसें, अनरीति न जाय सही ।
गैल चलत वा छैल नन्द के, बैयाँ आय गही ॥
मुख गुलाल मलि रंग भिजोई, सौ सौ बात कही ।
नारायण मग लोग हूँसे सब, आज न लाज रही ॥११॥

● समाजी वचन ●

दोहा—समाचार सुनि सखी मुख, नवयौवन ब्रजबाल ।
होरी खेलन कों चलीं, लं लं रंग गुलाल ॥१२॥
जब इनसों भड भेंट मग, बोले छलिया श्याम ।
यह कुचालि कर नन्दसुत, भाजि गयो निज धाम ॥१३॥

वातिक-

यह सुनिके सब सखी आपस में कहिबे लगीं देखो री या
बिचारी के नये चोर रंगसों कैसे बिगार गयो है ॥१४॥

● पुनि साँवरी वचन ●

राग कान्हड़ा-

सब जुरि-भिलि के चलो आली ।
या बिरियाँ निज भवन होयगो, वह लंगर बनमाली ॥
हम तुम बस्यो चहें या ब्रज में, कबलों सहें कुचाली ।
नारायण वा नन्दलाल कों, आज बनावो लाली ॥१५॥

● समाजी वचन ●

दोहा—हो हो होरी कहत मग, सहित साँवरी नार ।
जाकर घेरघो सबन ने, नन्दराय को द्वार ॥१६॥

होरी राग काफ़ी—

होरी हो ब्रजराज दुलारे ॥
 अब क्यों जाय छिपे जननी टिंग, रे दूँ बापन वारे ।
 कँ तो निकसि के होरी खेलौ, कँ मुख सों कही हारे,
 जोर कर आगे हमारे ॥
 बहुत दिनन सों तुम मन मोहन, फागहि फाग पुकारे ।
 आज देखियो सँल फाग की, पिचकारिन के फुहारे,
 चलें जब कुमकुमा न्यारे ॥
 निपट अनीति उठाई तुमने, रोकत गँल गिरारे ।
 नारायण सब छबरि परंगी, नेक तो आय के द्वारे,
 सूरति अपनी तू दिखारे ॥१७॥

❀ यशोदा वचन सखी प्रति ❀

दोहा—अबलों घर आयो नहीं, मेरो मोहनलाल ।
 इत उत खेलत होयगो, संग साथ सँ ग्वाल ॥१८॥

❀ सखी वचन साँवरी प्रति ❀

फिर आवेंगी हे सखी, होरी खेलन काज ।
 बदलौ लेंगा आपनो, छँल छली सों आज ॥१९॥

❀ साँवरी वचन ❀

राग काफ़ी—

यासों बिन होरी खेलें न जाऊंगो सखी,
 मेरी चूँवरि कौ करो कँसी कुगति ।
 जौलों में अपनों न बदलो चुकाऊँ,
 तौलों कबूँ अन जल नहि पाऊँ,

ऐसो छैल कूं नाच नचाऊँ,
 देखें तमासो सगरो जगत ॥
 मटक मटक नट कटि लचकारै,
 कबहुँ दृगन के भाव बतावै,
 ताहू पैं अति मृदु मुसिक्यावै,
 याही भाँति सब ही कूं ठगत ।
 जो इतसों इतमें उगं भानूँ,
 तउ याकी पगिया रंग सानूँ,
 नारायण अब मैं क्यों मानूँ,
 मेरो कष्ट्र यह बाप लगत ॥२०॥

❀ सखी वचन ❀

दोहा—बलि बँठो मग रोकिकं, आवत होइगो लाल ।
 सखा सहित पुनि घेरि के, डारी रंग गुलाल ॥२१॥

वातिक

साँवरी बोली यह बात मैंने मानी, फिर गैल में आय के
 सखीन सों कहिबे लगी, अरी तिहारे पास रंग गुलाल तौ थोरो
 सो दीखें जो कदापि वाके संग अधिक भीर भई तब कँसी
 करोगी ? तब सखीन ने कही जैसे तू कहैगी ॥२२॥

❀ साँवरी वचन ❀

दोहा—तुम निज निज दृग मूँदिके, बँठो सब ब्रजबाल ।
 तनक देर में होयगो, दूनो रंग गुलाल ॥२३॥

❀ मरखी वचन परस्पर ❀

राग सोरठ-

हँसीं सकल ब्रजबाल, अब यह दृग मुँववायके ।
 रंग अबीर गुलाल, लाबैगी कहूँ अन्त सों ॥२४॥

बोहा—या विधि निज मन समझि के, मँदे नैन विशाल ।
तुरत श्याम ने सबन पै, डारघो रंग गुलाल ॥२५॥

❀ समाजी वचन ❀

होरी हो भाभी कहत, हँसे लाल गोपाल ।
देखि कपट अचरज भई, नवगोरी ब्रजबाल ॥२६॥
यह लीला ब्रजचन्द की, रसिकजनन के प्रान ।
नारायण याके सुने, सदा होय कल्याण ॥२७॥
इति श्रीनारायण स्वामीजी कृत छपहोरी लाला सम्पूर्ण ॥२८॥

अथ प्रेमपरीक्षा लीला प्रारम्भ

वार्तिक—

प्रात समय श्रीलाडिलीजू सहज सुभाव निज भवन द्वार
पै आय के ठाड़ी भई, तब एक खञ्जन कों देखि के वाके
नेत्रन की बड़ाई करिबे लगीं । पास तें सखी बोली हे प्यारी !
याके नेत्र की चपलता तौ ब्रजचन्द के नेत्रन की छटा हू नायें ॥१॥

राग कान्हड़ा—

ब्रजचन्द के ऐसे नैन ।
अति छबि भरे नाग के छौना, तुरत डसैं करि सैन ।
इन सम सावरि मन्त्र न होई, जादू जन्त्र तन्त्र ना कोई,
एक दृष्टि में मन हर लेवें, करि देवें बेचन ॥
विभवनि में घायल करि डारें, इन पै कोटि बाण लें वारें,
अति पने तिरछे हिय कसके, श्वास न देवें लैन ।
चंबल चपल मनोहर कारे, खञ्जन मीन लजावनहारे,
नारायण सुन्दर मतवारे, अनियारे सुखदेन ॥२॥

वार्तिक-

तब श्रीजी ने बूझी अरी सखी ! साँची कहाँ ? फिर सखी
ने कही ॥३॥

राग मल्हार--

मनमोहन सम सुन्दर को है ।
मैं अपने अनुमान कहूँ अब, उनकी पटतर और न सोहै ॥
चितवन चपल रूप उजियारो, जाकों मुख नित चन्दहु जोहै ।
नारायण जो एक दृष्टि में, सुर नर नाग सकल को मोहै ॥४॥

❀ समाजी वचन ❀

दोहा—सखी कहाँ जब प्रिया सों, या विधि शोभा लाल ।
तब सुनि के मोहित भई, नवल छबीली बाल ॥५॥

❀ श्रीजी वचन सखी प्रति ❀

राग जंजवन्ती-

आज सखी प्रीतम जो पाऊँ, तो अपने बड़ भाग मनाऊँ ।
साँवरी सूरति नयन विशाला, चन्दवदन गल मुतियन माला,
रूप मनोहर चाल मराला, सुन्दरता पर बलि बलि जाऊँ ॥
जो प्यारो इन गलियन आवँ, सो विरहिनि कूँ दरश दिखावँ,
बैठि निकट मृदु वचन सुनावँ, मैं उनको हँसि कण्ठ लगाऊँ ।
नारायण जीवन गिरधारी, कब लेंगे सुधि आय हमारी,
जब मोसों वो कहेंगे प्यारी, तब मैं फूली अंग न समाऊँ ॥६॥
दोहा—यह वृत्तान्त सुनि लालसों, बह्यो सखी तब जाय ।
प्रीतम तो निरखे बिना, रही कुमरि मुरझाय ॥७॥

सोरठा—

सुनत सखी के बँत, हिय हरषे सुन्दर वदन ।
प्रेम परीक्षा लैन, चले तुरत तिय भेष धरि ॥८॥

❀ साँवरी वचन प्रियाजी प्रति ❀

राग जंजंबन्ती-

आज अकेली भवन द्वार पे, कौन काज ठाढ़ी सुकुमारी ।
कं काहू की बाट निहारत, कं कितहूँ चलिबे की त्यारी ॥
मुख उदास कछु देखि तिहारो, मोहि उपजी चिता अति भारी ।
नारायण अब नेक बतावो मैं तिहारो जाऊँ बलिहारी ॥६॥

❀ प्रियाजी वचन ❀

वार्तिक-

हे सखी ! जबसों मैंने श्रीलालजी की शोभा सुनी है तबसों
बिना देखे कल नहीं परं । साँवरी बोली हे प्यारी ! वह तिहारी
कहा बरोबरी करंगो, गुणन में मंगता और चोर, रंग में कारो ।
तब आप रिस हूँ के बोलीं अरी ! तू मुँह सम्हार के बोल, मैं
उनके एक एक अंग की शोभा सुन के चकित हूँ ॥१०॥

दोहा—मैं उनकी पटतर कहाँ, वह तो शोभाधाम ।

अंग अंग लखि लालको, लाजत कोटिक काम ॥११॥

❀ समाजी वचन ❀

मगन भये श्रीलालजी, लखि प्यारी को नेह ।

पुरुष वचन बोले प्रकट, भूलि गई सुधि देह ॥१२॥

❀ लालजी वचन प्रियाजी प्रति ❀

सोरठा-

बिधना चतुर सुजात, रचि तो वदन अनूप अति ।

बचौ कछुक सामान, तासों मोतन निर्मयो ॥१३॥

❀ समाजी वचन ❀

दोहा—जानि गई तब लाड़िली, है यह नन्दकुमार ।
महित सखी हँसिबे लगी, प्रीतम भेष निहार ॥१४॥

❀ प्रियाजी वचन ❀

राग जंजेवन्ती—

आवौ सखी मिलि मंगल गावौ, मेरे पधारे कुँवर कन्हारि ।
मोसम आज कौन बड़भागिनि, घर बंठे ऐसी निधि पाई ॥
सुन्दर बदन मदन मनमोहन, मधुर मधुर बोलत सुखदाई ।
नारायण इनके दरशन सों, मुरझी बेलि हरी हँ आई ॥१५॥

वार्तिक--

ता पीछे श्रीलालजी ने जब नागरी भेष बढ़ाय के निज स्वरूप प्रगट कियो, वाही समय मधुमंगल सखाहू दूँटतौ आय गयो ॥१६॥

❀ मधुमंगल वचन ❀

राग सारंग—

लाल तोहि जननी हेर रही ।
चन्दपौर पै नाम तिहारो, लं लं टेर रही ॥
जेंवन काज बुलावत तुमकों, साँची बात यही ।
नारायण या विधि मधुमंगल, हरिसों आय कही ॥१७॥

वार्तिक—

तब प्रियाजी ने कही हे प्यारे ! अब मैं बिना जिमाये, आपको कैसे जायबे देऊँगी ? याते सखा को बिदा करो, अह आप हमारे संग विशाज के आरोगो ॥१८॥

राग सारंग-

जैवत दोउ मिलि रूपनिधान ।
 षटरस भोजन रुचिर बनाये, ललिता परम सुजान ॥
 हँसि हँसि ब्रह्मत प्रिया सों प्रीतम, सुनो भानुकुल भान ।
 या व्यजन को नाम कहा है, कीजै आप बखान ॥
 कबहुँ ग्रास मुख देत परस्पर, करत मधुर मुसिदयान ।
 नारायण छबि निरखति सजनी, भाग्य बड़े निज मान ॥१६॥

राग सारंग-

अचवन करि बंठे दोउ चन्द ।
 पान चवावत मृदु मुसिक्खावत, गौर श्याम सुष्टकन्द ॥
 ललिता ललितहि सेज बिछाई, हिय में परम अनन्द ।
 नारायण मन भ्रमर लुभानो चरणकमल मकरन्द ॥२०॥

* मखी वचन श्रीजी प्रति *

राग मल्हार-

प्यारी नित ऐसे ही तुमें निहारूँ ।
 तृण तोरूँ या चन्द बदन पै, राई नोन उतारूँ ॥
 निजकर करूँ शृंगार तिहारो, मुख पै भ्रमर दिडारूँ ।
 नारायण जब तुम कछु गावो, मैं ढिग साज सँवारूँ ॥२१॥

वातिक-

श्रीलालजी ने कही हे प्राणप्यारी ! आपके गायदे की प्रशंसा तो बहुत सुनी है, परन्तु निज श्रवणन सों कभी गानों नहीं सुन्यो, तब श्रीप्रिया प्रीतम की रुचि जानके प्रसन्न हूँ के गायदे लगो ॥२२॥

राग कान्हड़ा क्षपताला-

आज व्रजराज की देख शोभा नई,
 गई तन भूलि सुधि भई हूँ बावरी ।

अधर रंग पान मुसिकपान जादू भरी,
ताहू पै चितहरन दृगन के भावरी ॥
कुण्डलन की हलन छलन मन मदन की,
चलत गज चाल बसिकरन के चावरी ।
निरखि के रूप नारायण हरष्यो हियौ,
कौन से भागि सों लग्यो है दाँवरी ॥२३॥

वार्तिक

श्रीलालजी ने बहुत बड़ाई करी, ता पोछे सखीन ने आरती
करिके परदा छोड़ि दियो ॥२४॥

दोहा—श्रीराधा गोपाल की, लीला परम विशाल ।
नारायण गावैं सुनैं, परं न यम के जाल ॥२५॥

इति श्रीनारायण स्वामीजी कृत प्रेमपरीक्षा लीला सम्पूर्ण ॥२६॥



अथ रासपञ्चाध्यायी लीला प्रारम्भ

❀ समाजी वचन ❀

अस्मित-

शरद रैन सुख दैन, मैन मन मोहनहारी ।
नारायण चहुँ ओर, परम सुन्दर उजियारी ॥१॥
शीतल मन्द सुगन्ध चलत अति पवन त्रिविध बर ।
फूलि रह्यौ बनराय निरखि भये मुदित हिये हर ॥२॥
बंशीबट पै जाय ग्यामसुन्दर मनभावन ।
बंशी में लै नाम लगे ब्रजबाम बुलावन ॥३॥१॥

राग मल्हार—

बंशी श्रवण सुनि गोपकुमारी ।

अति आतुर हूँ चलति श्याम पै,
 तन मन की सब सुरति बिसारी ॥
 गल को हार पहिरि निज कटि में,
 कटि की किकिनी गल में डारी ।
 पग पायल लँ धारत कर में,
 कर की पहुँचिया पगन मंझारी ॥
 कान बुलाक कपोल पै बेंदी,
 नाक में पहिरी कान की बारी ।
 एक नैन अंजन बिन सोहैं,
 एक नयन में काजर धारी ॥
 कोउ भोजन पति परसत दौरी,
 कोउ जंघत करग्रास सिधारी ।
 नारायण जो जंसे हुती घर,
 तैसे ही उठि विपिन पधारी ॥२॥

* विरहिनी वचन *

कुण्डलिया—

ज्यों भादों सरिता उमड़ि, चलति सिन्धु कों धाय ।
 त्यों गोरी हरि के निकट, तुरतहि पहुँचीं जाय ॥
 तुरतहि पहुँचीं जाय तिन्हें हरि लखि हरषाने ।
 प्रेम परीक्षा लैन श्याम यों वचन बखाने ॥
 तजि निज पति ऐसे समय, तुम आईं या विपिन क्यों ।
 नारायण सुधि तन नहीं, निषट बावरी फिरत ज्यों ॥३॥

● लालजी वचन ●

राग दरवारी कान्हड़ा-

या बिरियां तुम यहाँ क्यों आईं ।
अर्द्ध रैन अति सघन विपिन में, डोलत हैं वन मृग समुदाई ॥
कै ब्रज प्रबल भूप चढ़ि आयो, कै तुमसों घर भई लराई ।
कै कहूँ त्याग दईं पतियन ने, कै बन बिहरन को उठि धाईं ॥
जो तुम कहौ तुम्हारे दरशन, येहु हमें नहिं बात सुहाई ।
नारायण निज निज गृह जावो, याही में कुलधर्म बड़ाई ॥४॥

● समाजी वचन ●

दोहा—निठुर वचन सुनि श्याम के, ह्वै ब्रजबाल निरास ।
पग नखसों धरती लिखत, लै लै ठण्डे श्वास ॥५॥

● गोपिका वचन लालजी प्रति ●

दृष्य-

तब बोली इक चतुर, सुनो तुम नन्ददुलारे ।
श्रवण करत यह वचन, कढ़त हैं प्राण हमारे ॥
कढ़त हमारे प्राण, दया करि इनको राखौ ।
ऐसे वचन कठोर, लाल मति हम सों भाखौ ॥
अति ब्याकुल घर बार तजि, हम आईं या बेर तब ।
नारायण तुम नाम लै, वंशी में दईं ढेर जब ॥६॥

● गोपिका वचन ●

राग परज-

ऐसी न चाहिये तुमें चितचोर ।
नेक समझि के बात कहो तुम, नागर नन्दकिशोर ॥

प्रथम बुलाय लईं हव बन में, करि मुरली की घोर ।
 अब हमसों कहौ जाओ भवन में, प्रीतम निपट कठोर ॥
 तात मात पति भ्रात जगत में, जहँ लग नाते ओर ।
 अब उनसों कहा काज हमारो, हम आईं तृण तोर ॥
 कोटि भाँति सों समझावो तुम, जितौ तुम्हारो जोर ।
 नारायण अब तुम्हें त्यागि पग, परत न घर की ओर ॥७॥

❀ लालजी वचन ❀

राग बिहाग—

अब तुम मानो बात हमारी ।
 घर में जाय करो पतिसेवा, परखत हँ हैं बाट तिहारी ॥
 सोइ पतिव्रत वेदविहित है, सुनि लीज नवगोपकुमारी ।
 नारायण अपने भर्ता बिन, सकल जगत कों जाने नारी ॥८॥

❀ गोपिका वचन ❀

राग देव—

प्रीतम अब यह प्राण बचावौ ।
 हम दासिन कों बेर बेरजिन, वचन कठोर सुनावौ ॥
 हमें निराश न करो प्राणपति, हँसिकर कण्ठ लगावौ ।
 नारायण कर कमल फेरि उर, मनभव ताप मिटावौ ॥९॥

❀ लालजी वचन ❀

दोहा—हम तुमसों हित की कहैं, सुनो सकल ब्रजबाम ।
 अब इतनो हठ जिन करो, जावो अपने धाम ॥१०॥

❀ गोपिका वचन ❀

प्राणनाथ या जगत में, सो अभागिनी नार ।
 तुम्हें प्यागि पुनि चहै जो, सुख कुटुम्ब परिवार ॥११॥

राग जङ्गला-

प्रीतम जाओ जाओ मति भाखो ।
 यह जो नेम धर्म को पोथी, बांधि निकट धरि राखो ॥
 कहो काहु सों अमी त्यागि के, तुम अरिण्ड फल चाखो ।
 नारायण वह कब मानत है, लोभ दिखावो लाखो ॥१२॥

● लालजी वचन ●

वातिक-

हे गोपियो ! या समय हमारे पास तिहारो आयबे को कछू
 प्रयोजन नहीं ॥१३॥

● गोपिका वचन ●

राग देश सोरठा-

प्रीतम ऐसे निठुर जिन बोलौ ।
 श्रवण कराय के वचन सुधासम, अब कहा विषरस घोलौ ॥
 तजि परिवार शरण लई तुमरी, नेक तौ मन में तोलौ ।
 नारायण तजि प्रीति डगर कूं, क्यों अनीति मग डोलौ ॥१४॥

● लालजी वचन ●

राग मल्हार-

जो तिय अपनो धर्म नशावत ।
 ताहि न कोऊ भलौ कहै जग में,
 उभय लोक में अपयश पावत ॥
 नहिं शुभ गति न मिलै सुख सम्पति,
 योहीं वृथा वह जनम गंवावत ।
 नारायण ऐसी मनमुडिया,
 निज कुल माहिं कलङ्क लगावत ॥१५॥

* गोपिका वचन *

राग गहानो-

वेद विरुद्ध कहा हम कीनों ।

जा मन सों कीजं पतिसेवा, सो मन तो तुमने हरि लीनो ॥

जो तुम फल सब नेम धर्म के, तुमरे तिन चरणन चित दीनों ।

नारायण जो सार निगम करि, सो हमने तुमहीं को चीनों ॥१६॥

* लालजी वचन *

राग जंजवन्ती-

नारी के निज पति ही देवा ।

मूरख बृद्ध रंक अति रोगी, ताहू की कीजं रुचि सेवा ॥

सुपनेहु परपुरुष न ध्यावै, मन में धर्म विचारै ।

तनक विषं रस भोग कारनै, परमारथ न बिगारै ॥

तासों तुम अपने गृह जावो, करो जो वेद बखानें ।

नारायण नहिं झूठ कहैं हम, धर्म भलीविधि जानें ॥१७॥

* गोपिका वचन *

राग जंजवन्ती-

हम बन आय के धर्म कमायो ।

वे पति तो झूठे या जग में, साँचो पति तुमहीं कूं पायो ॥

प्राण जायं पै भवन न जंहे, यह जिय भाहि समायो ।

नारायण ऐसो को मूरख, मणि कों पाय पुनि चहत गिरायो ॥१८॥

* सखी वचन सखी प्रति *

बोहा—देखि सखी निर्दईपन, अजहूँ तजत नहिं श्याम ।

पहले हमें बुलाय के, अब कहें जावो धाम ॥१९॥

❀ सखी वचन ❀

सुनो लाल ऐसे वचन, फिर जिन करो बखान ।
नतु सगरी ब्रजगोपिका, भवहि तजंगी प्रान ॥२०॥

❀ समाजी वचन ❀

जब जानी निज हिये में, अति दयाकुल ब्रजबाम ।
हैंमि बोले तब प्रेमवश, परम कौतुकी श्याम ॥२१॥

❀ लालजी वचन ❀

राग मल्हार—

यह बात बड़े अचरज को भई ।
हम ती सहज सुभाव कही हंसि, तुम सांची जिय मान लई ॥
आओ गोपियो रास करें अब, शरद रंन अति मोबमई ।
नारायण तातत्थेई कहि लैन लगे गति श्याम नई ॥२२॥

❀ समाजी वचन ❀

दोहा—सुनत वचन अति हरष मन, निरतत मिलि ब्रजबाल ।
उभय उभय नवगोपिका, बीच बीच नन्दलाल ॥२३॥

राग नाईकी कान्हड़ा—

आज रघो रस रास बिहारी ।
जंतोई वृन्दाविपिन सुहावन, तंसहि शरद रंन उजियारी ॥
यमुना तीर पुलिन की शोभा, फूल रही चहुँद्विंशि फुलवारी ।
चलत पवन मन मोद बढ़ावन, शीतल मन्द सुगन्धित प्यारी ॥
निरतत लाल सहित ब्रजबाला, छपल चतुर गति लं लं न्यारी ।
बजत अनेक भाँति मृदु बाजे, परम प्रवीन बजावनवाही ॥
कोऊ सखी सुर दुगुन अलापत, करत बड़ाई लाल गिरधारी ॥
नावत सुमन झरत हैं शीस ते, मुख श्रमबिन्दु देत छवि न्यारी ॥

कबहूँ श्याम बिलग हूँ नाचत, ताल देत मिलि गोपकुमारी ।
नारायण नभ ते सुर निरखत, बरषत फूल सहित निज नारी ॥२४॥

राग भैरों—

वंशीवट यमुना तट निरतत बनवारी ॥
अति सुगन्ध मन्द मन्द पवन चलत प्यारी ।
चन्द्र वदन श्याम रसिक, मुकुटचन्द शीश लसत,
चन्द्र मुखी प्रिया शरद चांद की उजारी ॥
बाजे बाजत विशाल, गति मति सुर अधिक ताल,
राग रंग विविध भाँति नूपुर धुनि न्यारी ।
नारायण शिव सुजान, गोपिका को भेष ठान,
निरखि निरखि नृत्य गान, भये चित्रकारी ॥२५॥

दोहा—प्रिय प्रीतम के गुण ललित, निगमागम को सार ।
नारायण गावं सुनै, निश्चय हो भवपार ॥२६॥

इति श्रीनारायण स्वामीजी कृत रासपञ्चाध्यायो लाला सम्पूर्ण ॥३०॥



अथ सरस्वीअनुराग लीला प्रारम्भ

● सखी वचन सखी प्रति ●

राग जोगिया—

निशि सोवत में अंगना में सखी, हरि आय के द्वार पै ढेर वई ।
सुनि वचन मनोहर चौक परी, दृग नौद न जाने कहाँ कूँ गई ॥
निज सास के त्रास न बोल सकी, उन अपने भवन की गैल लई ।
निधि पाय के हाथ सों जात रही, तब सों नारायण बिकल भई ॥१॥

● अनुरागवती वचन ●

राग काफ़ी—

अब वाकी चरचा जिन कर री ।
जाकी टेर सुनत भई व्याकुल, रूप देखि त्यागंगी घर री ॥
यह हम जानि चुकीं अपने मन, गयो लाज को खेल बिखर री ।
नारायण जहं प्रगट भयो है, मोहनि मूरति नन्दकुमर री ॥२॥

● अनुरागवती वचन ●

राग काफ़ी धीमा ताल—

या साँवरे सों मैं प्रीति लगाई ।
कुल कलङ्क ते नाहिं डहूँगी, अब तो करूँ अपने मन भाई ॥
बीच बजार पुकार कहूँ मैं, चाहे करौ तुम कोटि बुराई ।
लाज भ्रजाद मिली औरन कूँ, मृदु मुसिकान मेरे बट आई ॥
बिन देखे मनमोहन को मुख, मोहि लगत त्रिभुवन दुखदाई ।
नारायण तिनकूँ सब फीको, जिन चाखी यह रूप मिठाई ॥३॥
दोहा—ताही छिन वा ठौर पै, आय गये व्रजचन्द ।
निरखि सखी के हिये में, भयो परम आनन्द ॥४॥

इति श्रीनारायण स्वामीजी कृत सखी अनुराग लीला सम्पूर्ण ॥३१॥

—❖❖❖—

अथ साँझी लीला प्रारम्भ

—❖❖—

● प्रियार्जा वचन सखीन प्रति ●

दोहा—हे ललिते चंपकलते, चलौ विपिन में आज ।
फूल बीन लावें सखी, निज साँझी के काज ॥१॥

वार्तिक--

सखी बोलों जो आज्ञा—फिर वन में जाय फूल बीनबे
लगीं ॥२॥

* समाजी वचन *

दोहा—ये सुधि पाय गये तहाँ, मोहन गुनन प्रवीन ।
सखिन सखिन श्रीलाडिली, सुमन रही जहँ बीन ॥३॥

* लालजी वचन *

राग आसावरा—

फूल यहाँ को बीनति है चोरी ।
करत प्रकाश फिरत या वन में, गजगाम्नि तन गोरी ॥
हिये माहि छल बल चतुराई, देखत में अति भोरी ।
नारायण या ठीर काहु की, चलत नहीं बरजोरी ॥४॥

* प्रियाजी वचन लालजी प्रति *

राग भैरवी—

फूल हम बीनति बिपिन हमारो ।
तुम ऐसे बोलत कोउ जाने, सानो बन है तिहारो ॥
हट वृथा क्यों रारि बड़ावो सूधे भवन पधारो ।
नारायण मन में लडुवन सों, भूँख न होय सहारो ॥५॥

* लालजी वचन प्रियाजी प्रति *

दोहा—सुनत लली मुख के वचन, बिहँसे नन्दकुमार ।
बोले अजी हम बीन दें, फूल अनेक प्रकार ॥६॥

वार्तिक—

प्रियाजी बोलों बस तुम्हारी कृपा ही चाहिये, ऐसे कह
हँसती खेलती भई निज भवन में आय के सांझी की रचना

में तत्पर भईं । उत में श्रीलालजी कों और जहाँ तहाँ सखीन को साँझी निरखबे को न्योतो पठवायो । जब श्रीलालजी ने आय के साँझी निहारी, तब अति प्रसन्न हूँ के प्रियाजी की चतुराई की बड़ाई करबे लगे ॥७॥

❀ सखी वचन ❀

राग ईमन कल्याण—

आज प्रियाजू ने साँझी बनाई ।
निज कर कमल रची यह रचना, को बरने इनकी सुघराई ॥
कहूँ गिरिराज कहूँ बरसानो, कहूँ वृन्दावन छबि अधिकाई ।
कहूँ यमुना तट घाट मनोहर, विविध कुँजवर गाखे(?) सुहाई ॥
कहूँ द्रुमलता कहूँ फुलवारी, बरन बरन खग मृग समुदाई ।
नारायण लखि प्रीतम प्यारो, पुनि पुनि हरषत करत बड़ाई ॥८॥
दोहा—विविध कथा गोपाल की, नारायण सुखरास ।

गति पावें सुन भक्तजन, दुष्ट करें उपहास ॥९॥

इति श्रीनारायण स्वामीजी कृत साँझी लीला सम्पूर्ण ॥३२॥



अथ फुटकर पद प्रारम्भ

राग घनाश्री—

रथ पर राजत दोउ महाराज ।
मणिमय कलश पताका सोहैं, सुन्दर चारों बाज ॥
अद्भुत छत परदा पिछवाई, रतनन को सब साज ।
नारायण सजनी ढिंग गावत, धन्य दिवस है आज ॥१॥

राग कार्लिगड़ा—

मोहन दीजें हमारौ चोर ।

हम कबसों काँपति हैं ठाढ़ी, शीतल यमुना नीर ॥

बिना वसन अति लाज लगति है, किहि विधि निकसें तीर ।
नारायण तुम कंसे पुरुष हो, निरखत नगिन शरीर ॥२॥

फुटकर बोहा—

नारायण संज्ञा समय, चढ़ी अटा ब्रजनार ।
कृष्णपाख शशि को उदय, यह अचरज करतार ॥३॥

होरी कूट-

एरी उठि देखि सखी होरी मच रही तेरे द्वार ।

चन्द्रमा मृग गज चाल कंबल
दधिसुत वाहन दृग, करि गामिनि, सरसुत सों मुखसार ॥
बलदेव श्रीकृष्ण भीर गुरु
वीर अनुज टेरत हैं तोकों, डर लिये साथ अपार ।

लाल
गुरु को आदि लाल पद पूरण, ले प्रीतम मुख डार ॥
शेर मांस ग्यारह
हरि भोजन नवदोय पं आवैं, ताहुम दिन गये चार ।
सोना श्याम
नारायण हाटक तजि सजनी, भ्रमर को रंग निहार ॥४॥

होरी कूट-

काल होरी गये हार श्याम आज फिर तुम आये ।

अक्रूर कंस देवकी वसुदेव नन्द यशोदा
सुफलकमुत स्वामी भगिनी पति, मोत की नारि पठाये ॥

मेघनाद मन्वोदरी रावण राम रंगजी
मेघशब्द जननी पति रिपु कुलदेव नाम संग लाये ।

नृसिंह हिरण्य होरी
नरकेहरि रिपु की भगिनी को नाम लेत न लजाये ॥

कमल सूर्य राहु श्वेत चन्द्रमा
सरसुत मित्र शत्रु भ्राता अरि, सो मुख पान चबाये ।
गो कुल
नारायण सुरभी कुल अस्थल, क्यों अब चहत हंसाये ॥५॥

राग जोगिया --

आज सखी सुपनों में देख्यो रंन ।
जबही सों जिय भई अतिव्याकुल, पल छिन परत न चैन ॥
श्यामवरण इक पुरुषमनोहर, नवयौवन छबि ऐन ।
शोश मुकुट कुण्डल गलमाला, सुन्दर बाँकेनैन ॥
मैं उनसों कछु कहन न पाई, सुने न उनके बैन ।
नारायण तब आँखि उघर गई, ना कछु लैन न दैन ॥६॥

राग सारङ्ग-

करौ तुम गोवरधन की पूजा ।
मंग भात को परवत रचि के बीच लगावौ गुंजा ॥
बौले लाल नन्द सों बाबा, प्रथम पूजिबे तू जा ।
नारायण ऐसो त्रिभुवन में, देव नहीं है दूजा ॥७॥

गजल-

जहाँ ब्रजराज कल पाये, चलो सखी आज वा बन में ।
बिना वा रूप के देखे, बिरह की दों लगी तन में ॥
न कल परती है बेकल को, न जी लगता है बिन जानी ।
भई फिरती हूँ जोगन सी, सरे बाजार गलियन में ॥
करूँ कुरवान जी उस पर, जनम भर गुन न भूलूंगी ।
मेरा महबूब जो लाके, बिठावे मेरे आँगन में ॥
नहीं कछु गरज दुनिया से, न मतलब लाज सों मेरा ।
जो चाहो सो कहो कोई, बसा अब तौ वही मन में ॥
तेरी यह बात साँची है, नहीं शक इसमें नारायण ।
जो सूरत का है मस्ताना, वह परचे कैसे बातन में ॥८॥

गजल—

किया बिसमिल मुझे उसकी, अदां के हाथ क्या आया ।
 तड़फता छोड़कर तेगे, कजा के हाथ क्या आया ॥
 दिखाकर टुक जमाल अपना, मुझे तो कर दिया शंदा ।
 भला पूछे कोई उससे, महिल के हाथ क्या आया ॥
 मेरे इस गुंघये दिल को, कभी उसने न आ खोला ।
 गई बालाईवाला उस, सबा के हाथ क्या आया ॥
 लगाना खूब दिल चाहा, था मैंने उसके पाऊ से ।
 बले इस पेशकदमी से, हिना के हाथ क्या आया ॥
 फिरा शहरों बियाबां, तालिबे दीदार नारायण ।
 बिठाया उसको परदे में, हया के हाथ क्या आया ॥६॥

राग सारङ्ग—

फूलन के बँगले में राजें पिया प्यारी हो ।

फूलन के भूषण बिविध सोहैं अंग अंग,

फूलन के वसन वदन छबि न्यारी हो ॥

फूल से मुखारविन्द वचन फूलन सम,

फूलि सखी तन मन शोभा लखि भारी हो ॥

तैसोही समाज साज आज नारायण,

मानों कुंजभवन में फूली फुलवारी हो ॥१०॥

राग शहानो—

करत आरती नवब्रजनारी ।

अगर कपूर सुगन्धित बूका, विविध भांति की सोज संवारी ॥

घण्टा झालर शख नृसिहा, बिजंघण्ट धुनि परम सुखारी ।

बंशी बांन मृदंग तँबूरा, सहनाई बाजत है न्यारी ॥

हर्षत सखी करत नौछावन, नारायण होवें बलिहारी ॥११॥

इति श्रीबृन्दावननिवासी श्रीनारायण स्वामीजीकृत

श्रीब्रजविहार सम्पूर्ण ॥३३॥

परिशिष्ट :—

लंगड़ी लावनी—

रूपरसिक, मोहन, मनोज-मन-हरन, सकल-गुन-गरबीले ।
 छँल-छबीले, चपल लोचन, चकोर चित चटकीले ॥टेका॥
 रतनजटित सिर मुकुट लटक रहि, सिमट स्यामलट घुंघरारी ।
 बाल बिहारी कन्हैयालाल, चतुर, तेरी बलिहारी ॥
 लोलक मोती कान कपोलन, झलक बनी निरमल प्यारी ।
 ज्योति उज्यारी, हमें हर बार दरस दें गिरिधारी ॥
 बिज्जुछटा-सी दंतछटा मुख देखि सरद-ससि सरमीले ।
 छँल-छबीले, चपल लोचन, चकोर चित चटकीले ॥
 मन्द हँसन, मृदु बचन तोतलें बय किसोर भोली-भाली ।
 करत चोचले, अमोलक अघर पीक रच रही लाली ॥
 फूल गुलाब चिबुक सुन्दरता, रुचिर कण्ठ छबि बनमाली ।
 कर सरोज से, बुन्द मेहेंदी अति अमन्द है प्रतिपाली ॥
 फूलछरी-सी नरम कमर करधनी-सब्द हैं सुरसीले ।
 छँल छबीले, चपल लोचन चकोर चित चटकीले ॥
 झंगुली झीन जरीपट कछनी, स्यामल गात सुहात भले ।
 चाल निराली, चरन कोमल पंकज के पात भले ॥
 पग नूपुर झनकार परम उत्तम जसुमति के तात भले ।
 संग सखन के, जमुन तट गौ-बछरान चरात भले ॥
 ब्रज-जुवतिन कौ प्रेम निरखकर घर-घर माखन गटकीले ।
 छँल गबीले, चपल लोचन, चकोर चित चटकीले ॥

गावें बाग-बिलास चरित हरि सरद-रैन रस-रास करै ।
 मुनिजन मनमोहैं, कृष्ण कंसादिक खल-दल नास करै ॥
 गिरिधारी महाराज सदा श्रीव्रज वृन्दावन वास करै ।
 हरि चरित्र कौं खवनन सुन-सुन करि अति अभिलाष करै ॥
 हाथ जोरि करि करै बीनती "नारायण" दिल दरदीले ।
 छल छबोले, चपल लोचन, चकोर चित चटकीले ॥

